



150.5 Whoctaw

GUACANAGARI	PONTIAC	BLACK HAWK
MONTEZUMA	CAPTAIN PIPE	KEOKUK
GUATIMOTZIN	LOGAN	SACAGAWEA
POWHATAN	CORNPLANTER	BENITO JUAREZ
POCAHONTAS	JOSEPH BRANT	MANGUS
SAMOSET	RED JACKET	COLORADAS
MASSASOIT	LITTLE TURTLE	LITTLE CROW
KING PHILIP	TECUMSEH	SITTING BULL
UNCAS	OSCEOLA	CHIEF JOSEPH
TEDYUSKUNG	SEQUOYA	GERONIMO
	SHABONEE	



TO PERPETUATE THE HISTORY
AND DEVELOPMENT OF THE
PEOPLE REPRESENTED BY THE
ABOVE CHIEFS AND WISE MEN
THIS COLLECTION HAS BEEN
GATHERED BY THEIR FRIEND
EDWARD EVERETT AYER

AND PRESENTED BY HIM
TO
THE NEWBERRY LIBRARY
1911




421

Cd84 (2)

B408ma

1845







THE
GOSPEL ACCORDING TO MATTHEW,

TRANSLATED INTO THE

CHOCTAW LANGUAGE.

UBANUMPA.

MAHLU UT HOLISSOCHI TOK,

CHAHTA ANUMPA ISHT A TOSHOWA HOKE.

Second Edition.

BOSTON:

PRINTED FOR THE AMERICAN BOARD OF COMMISSIONERS FOR
FOREIGN MISSIONS, BY CROCKER & BREWSTER.

1845.

638



UBA ISHT ANUMPA MAHLU UT HOLISSOCHI TOK.

CHAPTER I.

1. Chisvs Kilaist a haknip imma isht ai in tikba vhleha nana annoa.

1. Eblaham isht ai unchululi, Lewi a Ushi, Chisvs Kilaist vtta tok isht annoa holisso hoke.

2. Eblaham vt Aisaak a tobachi tok ; atuk o Aisaak vt Chekob a tobachi tok : atuk o Chekob vt Chutas micha itibapishi vhleha aiena ka tobachi tok.

3. Atuk o Chutas vt Fales, micha Sala aiena ka Tama ya a tobachi tok : atuk o Fales vt Eslom a tobachi tok : atuk o Eslom vt Elam a tobachi tok.

4. Atuk o Elam vt Aminatab a tobachi tok ; atuk o Aminatab vt Naason a tobachi tok : atuk o Naason vt Salmon a tobachi tok.

5. Atuk o Salmon vt Boas a Lakab a a tobachi tok ; atuk o Boas vt Obet a Luti a a tobachi tok ; atuk o Obet vt Chessi a tobachi tok ;

6. Atuk o Chessi vt miko Lewi a tobachi tok ; atuk o miko Lewi vt Solomon a Ulias tekchi vt tok a a tobachi tok ;

7. Atuk o Solomon vt Loboam a tobachi tok ; atuk o Loboam vt Abia ya tobachi tok : atuk o Abia vt Esa ya tobachi tok ;

8. Atuk o Esa vt Chosafat a tobachi tok ; atuk o Chosafat vt Cholam a tobachi tok ; atuk o Cholam vt Osias a tobachi tok ;

9. Atuk o Osias vt Choahlam a tobachi tok; atuk o Choahlam vt Akas a tobachi tok; atuk o Akas vt Esekias a tobachi tok;

10. Atuk o Esekias vt Manasses a tobachi tok; atuk o Manasses vt Amon a tobachi tok; atuk o Amon Chosaias a tobachi tok;

11. Atuk o okla ha Babilon ishtia hosi foka ma, Chosaias vt Chekonias micha itibapishi vhleha aiena ka tobachi tok;

12. Atuk o okla ha Babilon ishtona haya, Chekonias vt Salahliel a tobachi tok; atuk o Salahliel vt Solobabel a tobachi tok.

13. Atuk o Solobabel vt Abivrt a tobachi tok; atuk o Abivrt Eliakim a tobachi tok; atuk o Eliakim vt Aso ya tobachi tok;

14. Atuk o Aso vt Satok a tobachi tok; atuk o Satok vt Akim a tobachi tok; atuk o Akim vt Elivt a tobachi tok;

15. Atuk o Elivt vt Eleasa ya tobachi tok; atuk o Eleasa vt Mattan a tobachi tok; atuk o Mattan vt Chekob a tobachi tok;

16. Atuk o Chekob vt Meli, yummak o Chisvs vt a tobvt vttta tuk osh Kilaist hochifo ka, i hatak Chosef a tobachi tok.

17. Yohmi hatok o Eblaham a ai vhlit it ai unchululit mihinti kvrt Lewi a ant ai vhli kvrt moma kvrt it ai unchululi auah ushta hoke: yohmikma Lewi a ai vhlit mihinti kvrt okla ha Babilon ishtia tok a ant ai vhli kvrt it ai unchululi auah ushta hoke; yohmikma okla ha Babilon ishtona tok a ai vhlit mihinti kvrt Kilaist a ant ai vhli kvrt it ai unchululi auah ushta hoke.

2. Shilombish Holitopa yak osh ik yohmi ai ahni pulla na, Chisvs vt ohoyo himita hatak haleli keyu Meli hochifo mako, im ai vttta tok nana annoa.

18. Chisvs Kilaist vttahpi ka ilvppak osh a yakohmi tok; ishke Meli vt Chosef a im vlhpoa tok vt, ik it im ono kisha ho, Shilombish Holitopa ya vlla i shali tuk osh otvni tok.

19. Yohmi ma i hatak Chosef vt hatak achukma hatuk osh, nana vllhpisa vt onvtula hi a ik ahno mvt, lumvt kancha ki vt im anukfila tok.

20. Yohmi kia ilvppa puta ka anukfihinli tuk osh holhpokuna ma, Chihowa im enchil vt ant i haiaka cha, Chosef Lewi ushi chia ma! chi tekchi Meli a ishi ik chi nukwiyo kashke; Shilombish Holitopa ak atuk mak o yvmmak okvt toba hosh afoyuka hoka.

21. Yohmi ka vlla-nakni o sholikma, hohchifo ha Chisvs ish hochifa hi oke; yvmmak osh im okla talaia ai im ashvchika puta ma ai i hlakoficha hi oka, achi tok.

22, 23. Chihowa hvt hopaii ya isht ai anumpulit, Ohoyo himita hatak haleli keyu hosh chakalit vlla-nakni o shola he; mikma hohchifo ha Immanuel, yvmmt toshowak mvt, Chihowa hvt piba foka achi mak o, okla hochifa hi oke, achi tok mak o ont ai ahla chi ho, ilvppa moma kvv yvm mohmi tok.

24. Yohmi ma Chosef vt nusi tuk vt okcha mvt, Chihowa im enchil vt ai i miha tuk mak o yvm mohmi mvt, tekchi a ilauei tok.

25. Yohmi kia ik it apoto kisha ho, vlla-nakni ishi ahpi kvv sholi tok: mihma hohchifo ha Chisvs hochifo tok.

CHAPTA II.

3. Fochik in tikba hika ho hatak hopoyuksa vhleha hvt hvshi akochaka imma mintit Chelusalem a vla cha vloši Chisvs a aiokpvchi tok.

1. Chisvs vt Helot miko ai ahanta nitak o Chutea yakni Behlehem tumaha ha ai vttā ma, hatak hopoyuksa vhleha hvt hvshi akochaka imma mintit Chelusalem a ai vla mvt,

2. Chu okla i miko v^tta tuk m^{vt}to katimak o itu-yula cho? i fochik a hv^{sh}i akochaka imma ya il a pi-hisa tuk osh aiokp^{vch}it il it^vnova hatuk oke, achi tok.

3. Miko Helot v^t ilv^{ppa} puta ka haklo m^{vt}, Chelusalem okla moma aiena k^{vt} komunta tok.

4. Micha na holitompa isht a^{sha} pehlichⁱ puta, micha okla nan i holissochi v^hleha moma ka itahobbit taiyahli m^{vt}, kanima yo Kilaist v^t ai v^tta hinla hatuk a im a ponaklo tok.

5, 6. Mihma Chutea yakni Behlehem ak oke; hopaii holissochi k^{vt}, Behlehem chia Chuta yakni ish talaia hok^{vt} Chutea i miko v^hleha aiasha ka moma chik a lauwo ho keyushke; chisno ak o miko v^t chi atoba hosh v^m okla Isra^{el} oka pehlich^a he mak oke, achi tok oka, okla im achi tok.

7. Yohmi ma Helot v^t hatak hopoyuksa v^hleha ha lum^{vt} pit hoyo cha, kaniohmi fehna kash o fochik v^t haiaka tuk a achukmalit im a ponaklo tok.

8. Micha Behlehem a pit tihleli m^{vt}, Oh ia cha v^losi atukma achukmalit hv^{sh} hoyashke; atuk osh hv^{sh} ahayuchik m^{vt}, anonti ant hv^s sv^m anoli na v^{no} m^{vt} i^{vt} ont ai okp^{vch}i li ak inlashke, achi tok.

9. Mihma miko a haklot in taha m^{vt}, okla ilhkoli tok: yohmi ma fochik hv^{sh}i akochaka imma a pisa tuk ash o itikba takalit mahaya m^{vt}, v^losi ai itola ka pak-naka ya ont takali tok.

10. Fochik a okla pisa m^{vt}, nayukpa ai^{ah}li fehna mak osh okla nayukpa tok.

11. Micha aboha okla ont abeha m^{vt}, v^losi, micha ishki Meli aiena ka pisa m^{vt}, aka hlipk^{vch}it, y^{vm}mak ash o okla aiokp^{vch}i tok; micha im v^lbi^{hpo} a tiwichi m^{vt}, y^{vm}mak ash o v^lli-holisso-lakna, micha fil^{akin}-sen, mikm^{vt} mv^h aiena ho okla haben^{vch}i tok.

12. Mihm^{vt} holhpokuna ho falam^{vt} Helot a okla ik im ono ka hi a, Chihowa hv^t i miha hatuk o, hina inla ho v^lhtot i yakni atuk akinli ho okla ilhkoli tok.

4. Hatak hopoyuksa v^hleha hash osh i yakni a falam^{vt} ilhkoli tok. Chosef v^t Echip ia chi ka enchil osh im anoli tok. Helot v^t Chisvs a hot v^bi b^{vnna}; micha nana ai ahni tuk v^t ai a^hlich^a chi k^{vt} v^{lla} chipota moma Behlehem a ai

vbi tok. Helot vt illi tok. Chosef vt Chutea yakni falamvt ia chi ka enchil osh im anoli tok. Yohmi tuk o Nasalet ak o ant ai ahanta tok.

13. Mihma ai ilhkolit taha ma, Chosef vt holhpokuna ho, Chihowa im enchil vt ant i haiaka mvt, Tani cha, vloši mikmvt ishki aiena ka ishit mallelit Echip a ish ona cha, yummak o ish ahanta tuk o, anumpa ishit chim aya lashke; Helot vt vloši a vbi bunnvt hoy a chi hoka, achi tok.

14. Mihma tani mvt, vloši micha ishki aiena kash ninak o pehlich i cha, Echip a ia tok.

15. Chihowa hvt hopaii isht ai anumpulit, Echip ak o srso ha a hoyo li tuk, achi tok a ont ai ahla chi ka, yummak o ahashwa na Helot vt illi tok.

16. Yohmi ma Helot ash osh, hatak hopoyuksa vhleha hvt ik ahobalo ho pisa mvt anukhobela fehna cha, pit on tihlelit, vlla chipunta Behlehem, micha auet a bilika maya kv afvmmi tuklo ai vhlit ola minti, hatak hopoyuksa vhleha ha achukmalit im aponaklo tok vt pit ai it vhlpesa ka, mominchit vbit tahli tok.

17, 18. Yvmohmi hoka Chelemaias hopaii vt anumpohonlit, Lama ya a yaiya, micha nishkin okchi minti, mikmvt nukhaklo chinto, Lechel vt im vlla vhleha hvt iiksho hatuk oka ishit yahaya mvt, hopohla hi a ik ahno ka, takali na haiyaklo tok oke, achi tok a ont ai ahli tok.

19, 20. Yohmi tuk kia Helot vt illi haya, Chihowa im enchil vt, Chosef vt holhpokuna ho Echip a im a haiaka mvt Tani cha vloši micha ishki aiena ka pehlich i cha, Israel okla i yakni a ish iashke; vloši im ilhfiopak a hoyo tok vt illi hoka, achi tok.

21. Yohmi ma tani mvt, vloši micha ishki aiena kask pehlich i cha, Israel okla i yakni a vla tok.

22. Yohmi kia Akelavs vt iki vlhtobvt Chutea ya i miko na haklo mvt, yvmma ona nukshopa tok: yohmi nana kia holhpokuna ka Chihowa hvt nana i miha hatuk oka, fullotvt Kalili i kaniohmi ho ona tok.

23. Mihka hopaii vhleha hv̄t anumpulit, Yvmmak okv̄t Nasalet hatak v̄tta hohchifa he oke, achi tok a ont ai aḡla chī ka, tv̄maha Nasalet hohchifo hq̄ ona cha ahanta tok.

CHAPTA III.

5. Chani Baptist vt vba anumpa h̄a Chutea yakni haiaka isht anumpohonli, mihmv̄t baptismohonchi tok.

1. Nitak yvmma foka ma Chani Baptist vt Chutea yakni haiaka ya v̄banumpa isht ai anumpohonlit aya tok;

2. Mihmv̄t, Uba apelihchika yv̄t olanlosi v̄la hoka, hv̄sh ilekostininchashke, ahanchi tok.

3. Ilvppak o hopaii Esaias vt isht anumpulit, Achv̄fa hosh yakni haiaka ya ai anumpohonlit, Chihowa ataya hi a apoksiachit, i hina puta ka hv̄sh apissv̄lechashke, ahancha hi oke, achi tok mak oka.

4. Mihmv̄t Chani yvmmak okv̄t im ilefoka yv̄t Kamel hishi yosh toba ma, na-hakshup chuhlafa v̄skufv̄chi o v̄skufaiyachi tok; mihmv̄t im ilhpak vt h̄awa micha foi-bila aiena kak vt tok.

5. Yohmi ma Chelusalem, micha Chutea pit a moma, mikmv̄t Chatan auet a bilika yakni moma ka asht a kohchv̄t iv̄t;

6. Yvmmak ash o im ai onv̄t, nan im aiashv̄chika puta ilanolit, Chatan a ai im a baptismo tok.

7. Yohmi kia Falisi vhleha mikmv̄t Satusi vhleha kv̄t laua hosh im a baptismot ai v̄la na pisa mv̄t, yvmmak ash o, Sinti chilita isht-atiaka hv̄chia ma! na palv̄mmi mihinti ka hv̄sh i hlakofa hi okv̄na kv̄ta hosh hv̄chim anoli tuk oh cho?

8. Yohmi hokv̄t ilekostininchi ai itv̄lhpesa mak o v̄nit hv̄sh wayashke;

9. Micha, Eblaham ak osk piki oka, acha hi okvno hvch ik il anukfillo kashke; Chihowa hvrt tvli yak aiasha ka Eblaham im vlla ya chi ka ai ikba hinla hoke, hvchim achi lishke.

10. Yohmikma himak ak kia iskifa yvt iti puta akishtvula ya itonla hoke; yohmi hatuk o iti yvt vni achukma ho vnit waya keyu kvrt moyumvt chayvt akakoha cha, luak pit itokaha chatuk oke.

11. Uno yokvto hvsh ilekostinincha chi mak o, oka ya ishit hvchi baptismochi li ho mvhlshke; yohmi kia auet siakayvt mihinti hokvto vno a shaiyahli, yvmma i shulush a isht im aya hi o si ahoba keyu hoke; yvmmak osh Shilombish Holitopa, micha luak aiena mak o ishit hvchi baptismocha hi oke.

12. Yvmmak osh i nan-isht-mvshahchi yvt ibbak a foyuka; yohmi hokvt i nan-anihichi yatuk ma achukmalit kashofit tahli cha, onvsh atuk ma kanchak a pit ashacha hi oke; yohmi kia hakhlopish okvno luak moshola hi keyu mak o ishit hukma hi oke, im achi tok.

6. Chisvs vt Chani ak o im a baptismo tok; mihma Shilombish Holitopa yvt vba mintit onitula tok.

13. Yohmi ma Chisvs vt Kalili a vttvt minti hosh Chani a im a baptisma chi hosh Chatan a ai im ona tok.

14. Yohmi kia Chani vt yvmmak ash o im alvm-mi mvt, Uno ak osh chisno a chim a baptismo la he si vlhpiesa ka, anonti vno ak o is svm vla cho? achi tok.

15. Mihma Chisvs vt afalaminchi mvt, Himak okvno yakohma hi oka ish ahnashke: ai yakohmi hosh nana ai vlhpiesa puta ka mominchit il aiahlichia he pim vlhpesa hoke, im achi tok. Yohmi ma vlhpesa im ahni tok.

16. Yohmi na Chisvs vt baptismo mak inli hosh oka ya vttvt kocha ia tok; yohmi ma vba shutik vt auet in tiwa tok; mihma Chihowa imi Shilombish vt

pvchiyoshuba chiyuhmi hosh aka mihintit, yummak ash o ant o binili tok.

17. Yohmi ma vba shutik a auet ai anuhumpa kv̄t, Ilvppak osh sv̄so a holitopa yō, ilvppak o nan isht a sai yukpa mak oke, achi tok.

CHAPTER IV.

7. Shilombish osh Chisvs a ilauelit yakni haiaka isht ona : mihmo nitak pokoli ushta ka nahullochi tok : micha Setan ak osh imomaka pisa : tok kia Chihowa im anumpa pulla ho isht im olvbbi tok : mihma enchil v̄hleha hv̄t nan isht im anta tok.

1. Yvmohmi ma Setan vt imomaka pisa chi ka, Shilombish vt Chisvs a yakni haiaka isht ia tok.

2. Atuk o yummak ash osh ik impo hosh nitak pokoli ushta cha ninak pokoli ushta aiena ho anta tuk osh, misha pila m̄vno hohchv̄fo tok.

3. Mihma imomaka pisa yash osh im v̄la mvt, Chihowa Ushi chia hokmvt, tv̄li yak m̄aya kv̄t pv̄ska toba chi ka i miha, im achi tok.

4. Yohmi kia yummak ash osh afalaminchi mvt, Hatak vt pv̄ska yak bano ho ai okchaya he keyu ; amba anumpa moyuma kv̄t Chihowa itih akohoncha kak a hi o, holisso tok oke, achi tok.

5. Yohmi ma Setan ash osh ilauelit tv̄maha holi-topa ya ont isht chukowa cha, tempel wishakchi yō ont o hilechi tok.

6. Mihmvt, Chihowa Ushi chia hokmvt, aka pit ish ile pilashke ; chi apesahancha chi ka im enchil v̄hleha ha atohno na ibbak a isht vba takalihinchit chisht aya na nitak kaniohmi kia chiyi ya tv̄li isht chik ai isso ka hi a, holisso tok oka, im achi tok.

7. Mihma Chisvs ash osh, Chin Chitokaka Chihowa hoka imomaka chik peso kashke, achi kv̄t holisso tok ak inli hoke, im achi tok.

8. Mihma anonti Setan ash osh ilauelet nvnih chaha fehna hq isht oiya cha, yakni apelichika moma, mikmvt nan-isht-im-aholitopa aiena ka pit pisachi tok ;

9. Mihmvt, Aka hlipvt is si aiokpvchi hokma, ilvppa moma ka chima lashke, im achi tok.

10. Mihma Chisvs ash osh, Setan vt kanima iashke: chin Chitokaka Chihowa hak o ish ai okpahan-chikmvt, yvmmak illa hq ish im antiashke, achi kvt holisso hoka, im achi tok.

11. Yohmi ma Setan ash osh i filvmmi ma, enchil osh ai vla cha okla ant nan isht im anta tok.

8. Kapenavm a Chisvs vt ai anta: mihmvt ile kostinincha he isht anumpohonli tok.

12. Yvmohmi tuk o Chisvs vt, Chani vt aboha kvlllo foka na haklo mvt, Kalili a ia tok.

13. Atuk osh Naselet a issvt ia mvt, Kapenavm yvmmvvt Sabulon yakni, micha Neftalim yakni aiena ont aivhli okhvta lapalika ak o ont ahanta tok.

14, 15, 16. Yakohmi kvv hopaii Esias anumpulit, Sabulon yakni, micha Neftalim yakni okhvta lapalika, Chatan misha, Chentail okla i Kalili vt aiokhlileka asha tuk vt tohwikeli chinto pisa tok ; mihma isht-aiilli yakni, micha isht-aiilli i hoshontika maya tuk a tohwikeli hvv i kohchvt takalishke, achi tok a ont aiahla he mak vt tok.

17. Yumma foka aivhliit mihinti ma, Chisvs vt vba isht anumpulit, Oh ilekostininchi ; vba apelichika yvt olanlosi vla hoka, ahanchit ishtia tok.

9. Pita, Antilu, Chemis, Chani aiena kvv nan im aiithvna ya chi hq, Chisvs vt atokolechi.

18. Atuk osh Chisvs vt Kalili okhvta lapalika nowvt aya tuk osh, itibapishi tuklo, Saimon Pita hohchifo, anonti nakfish Antilu itatuklot nvnihokli atuk osh nvnihokli a okhvta pit okvchi hosh aghwa na pisa tok.

19. Mihmvt yvmmak ash o, Hvs siakaiyashke, mikma hatak hokli o hvch ikbi lashke, im achi tok.

20. Yohmi ma mih makinli ho i nwni-isht-hokli a issa cha, yvmmak ash o iakaiyvt okla tok.

21. Mihma yvmmak ash vttvt is hosh aya mvt, anonti itibapishi tuklo inla, Sebate ushi Chemis, micha nakfish Chani itatuklo kvv iki Sebate a apihvt nwni-isht-hokli a apoksia hosh peni alhto na pisa tok; micha pit i howa tok.

22. Yohmi ma mih makinli ho peni, micha iki aiena kash o issvt, yvmmak o iakaiyvt okla tok.

10. Chisvs vt Kalili yakni a nan im avchit a hlopullit, abeka puta atuk ma hlakofihinchit tok.

23. Mihmvt Chisvs vt Kalili a mominchit ayvt, i sinakak puta ka nan ai im avchit, apelhichika isht anumpa hanta ya isht anumpohonli; micha okla hvv abeka, micha haknip ik in chukmo im asha tuk a mominchit hlakofihinchit tok.

24. Mihma isht annoa kvv Silia moma ka ont hlopulli tok; mihma okla hvv abeka ilaiyuka puta isht issikkopa hatuk; micha nan isht-ahullo okpulo ai i foka hatuk; mihmvt tasimbo yatuk; micha palsi isht abeka yatuk moyuma ka okla isht im ai ona tok; mihma yvmmak ash hlakofolichi tok.

25. Yohmi ma okla chinto Kalili minti, mikmvt Tekapolis minti, mikmvt Chelusalem minti, mikmvt Chutea minti mikmvt Chatan misha minti aiena kvv iakaiya tok.

C H A P T A V .

11. Chisvs vt nwnih chaha ya ai anumpuli tok. Yohmi kvv kva hosh nan isht ilaiyukpa anoli.

1. Yohmi ma okla chito ka pisvt, nwnih chaha yo pit oiya tok; atuk osh ont binili ma, nan im aiithvna vhleha hvv im ai ona tok.

2. Mihma itih ha wakummi cha, yummak ash im abvchi mvt,

3. Chukvsh ilbvsha vhleha yokvto vba apehlichika yak osh immi hokvt nayukpvshke.

4. Nanukhaklo vhleha yokvto hopohla hi okvt nayukpvshke.

5. Anukhobela iksho vhleha yokvto yakni a ai ahanta hi okvt nayukpvshke.

6. Ahopoyuksaka aiahni vhleha hvrt hochahafu, itukshihinla aiena hokvto, kaiya hi okvt nayukpvshke.

7. Nan i nukhaklo vhleha yokvto ilap ma i nukhaklo na pisa hi okvt nayukpvshke.

8. Chukvsh kashofa vhleha yokvto Chihowa ya pisa hi okvt nayukpvshke.

9. It i nanaiyvchi vhleha, yummak okvto Chihowa ushi hohchifa hi okvt, nayukpvshke.

10. Ahopoyuksaka pulla hatuk mak o isht i palvmmi vhleha yokvto, vba apehlichika yvt immi hokvt nayukpvshke.

11. Uno atuk pulla mak o hatak puta kvrt isht hvchi yopulvt, hvchi ilbvshachit, ahli heyu kia nana okpulo ilaiyuka puta ka isht hvchi mihahanchikma, na hvchi yukpvshke.

12. Nayukpvt hvchi yukpa fenashke: isht hvchim vltoba hi vt chinto hosh vba ya asha hoka; hopaii vhleha hvchin tikba aiasha ka yakohmichit ilbvshachi tok mak oka.

Kilaist i yimmi vhleha hvrt yakni i hvpi;—yakni a im a toh-wikelika;—tumaha yosh nvnih ai o talaia ka chohmi;—pvla ha chohmi.

13. Yakni i hvpi hvchia hoke; yohmi kia hvpi hvrt homi kvrt i kunia hokmvt, nanta hak o isht a homa hinla cho? yummak okvt himmakma nana ho isht ai vllhpiesa he keyu; amba kocha pit hlava na hatak puta iyi yosh ahvhlhinchha he ak o pulla hoke.

14. Yakni in tohwikeli hvchia hoke. Tumaha chito yosh nvnih chaha ai on talaia hokvt luma he keyushke.

15. Mikma hatak vt pva ha pvalikmvt, tanchi isht vlhpisa nutaka yo talali chatuk keyu ; amba pva ai-o-hikia yo ai o hilechi chatuk ; yohmikma aboha anukaka maya ka mominchit tohwikelichi chatuk oke.

16. Hvchi pva hvv hatak puta itikba ya ik a tommy pulla na inla asha kvv nana kvsh akaniohmi hochukma puta ka pisa cha, Iki vba binili ka holitoblashke.

Chihowa i nanvlhpisa ya Chisvs vt aighlicha chi hosh vla.

17. Nanvlhpisa, micha hopaii puta im anumpa aiena hvv tok a okpvnit ayali tuk a, ik hvchim ahobo kashke ; okpvni la hi osh ayali tuk keyu ; amba aighlichi la he mak vt tok.

18. Ahli mak o hvchi miha lishke, Yakni, mikmvt vba shutik aiena hokvto ont ik ai iiksho kia, nanvlhpisa yvt moma ont ik a lauwo achvfona nana kia a kaniohmit aiokpuloka iksho mak osh, momvt ont aighla he mak oke.

19. Yohmi hoka kvna hosh nanvlhpisa ik a lauwo ilvppa puta ka achvfona ka kobvffi cha, hatak puta kvv ai yvmihcha chi ho im avvchi hokmvt, vba apeli-chika aiasha ka moma ik a lauwo hohchifa hé ; amba kvna hosh mihma holitobli cha, inla ma isht im avvchi hokvto, mihi yosh vba apeli-chika ya chito ont a hohchifa hi oke.

20. Hvchi hopoyuksa kvv na-holissochi vhleha, micha Falisi vhliha aiena ka ishali ho keyukmvt, nana hosh a kaniohmi kak o vba apeli-chika ya ont hvsh chukowa he keyu hoke, hvchim achi lishke.

Kaniohmi hosh nanvlhpisa hanali ka kobvffi ka anoli.

21. Nitak tikba aiasha kvv, Kvna kia ish bi na : kvna hosh inla vbi hokvvt nanvlhpisa yo isht im ahle-kashke ; achi tok a hvsh haklo chatuk.

22. Amba vno vto, Kvna hosh nana hosh a kaniohmi keyu ho, itibapishi ha i nukkilli hokmvt, nanvlhpisa yo isht im ahlekashke : mikma kvna hosh itibapishi ha, Ik chi ahobo, im achi hokmvt, nanvlhpisa

*kv*llo *i* shahli *h*o isht im ahleka he : amba *kv*na hosh, Im anukfila iksho chia hoka, im achi hokvto aiokpulo-ka luak *o* ont isht im ahleka hi oke.

23. Yohmi hoka *v*ba *ch*i nan-isht-aiokpvchi *y*a ieszit alta *y*a ish ona *kv*t, ish itibapishi *h*a nana ish *i* kaniohmi tuk *a* *a*sha ka ish ithaiyana hokmv;

24. *U*ba *ch*i nan-isht-aiokpvchi ash alta itikba *y*o ish bohli cha, *i*vt, *t*ikba ish itibapishi ak *o* ont ish it *i* nanaiya ha yosh, *v*lv^t *v*ba *ch*i nan-isht-aiokpvchi ash pit isht ish aiokpvchashke.

25. Nanv^lhpisa chi onochi *b*vⁿna yatuk ma apeh^vt ish *m*aya *t*akla kak osh, *t*ushp^vt ish it ibai ach^v-fashke; keyukma nitak kaniohmi kash inli *h*o nanv^lhpisa chi onochi *b*vⁿna yash osh chisht nan apesa ibbak *a* chi fohkikma, anonti nan-apesa yash osh nan-v^lhtoka ibbak *a* chi fohki na aboha *kv*llo *y*a ish fohka he mak oke.

26. *A*hli mak *o* *ch*i miha lishke, Ont ishtaiyopi fehna ka atobbit ish kaiyanchi *h*o keyukmv, kaniohmi kak osh *y*vmmak atuk *a* ish kohcha he keyu mak a hi oke.

Kaniohmi hosh nanv^lhpisa untuklo ka kobvfi ka anoli.

27. Nitak *t*ikba aiasha *h*vt, *H*vsh it in lumaka na; achi tok *a* *h*vsh *h*aklo chatuk.

28. Amba *v*no *v*to, *K*va hosh ohoyo *h*a *i* nukp^vli hosh pisa hokv^t, *ch*ukvsh anukaka *y*a isht in lumaka mashko hoke, *h*vchim achi lishke.

29. Micha chi nishkin isht impak-imma *y*vt chi ibetv^plichi hokma, halv^llit kohchit ish kanchashke: *ch*i nana achvfona hosh okpulo kia, chi haknip *v*t momv^t aiokpuloka ik aiyo ka he ak osh chim v^lhpesa hoke.

30. Mikmv^t chibbak isht impak-imma *y*vt chi ibetv^plichi hokma, bvshlit tv^plit ish kanchashke; *ch*i nana achvfona hosh okpulo kia, chi haknip *v*t momv^t aiokpuloka ik aiyo ka he ak osh chim v^lhpesa hoke.

31. *K*va hosh tekchi *a* kanchikmv^t, it *i* *kv*nia holisso *h*a imashke; achi tok *a* takalishke.

32. Amba vno vto, Kvna hosh tekchi vt lumaka tuk o keyu ho kanchikmvt, haui ikbicha he : yohmik-ma kanchi haya kvna hosh itauwayakmvt, haui toba mak a hi oke, hvchim achi lishke.

Anumpa kvllo ishit ile onochi im olvbbi.

33. Micha anonti, nitak tikba aiasha kv, Anumpa kvllo ish ile onochi tuk vt chik kobvffo kashke : amba anumpa kvllo ish ile onochi tuk okvt Chitokaka ya ish im aighlicha hi oke ; achi tok a hvsh haklo chatuk.

34. Amba vno vto, Anumpa kvllo chik ile onochi kvmomashke ; vba shutik ak kia pit isht chik ai a miho kashke ; yvmmak okvt Chihowa im aiasha mak oka :

35. Mikmvt yakni vt iyi im ai-o-heli mak oka, yvmma isht chik ai a miho kashke ; anonti Chelusalem a isht chik ai a miho kashke ; yvmmak okvt Miko chito in tvamaha chito yoka :

36. Micha chi noshkobo ak kia isht chik ai a miho kashke ; chi pashi achvfa kia ish tohbichikma, ish lusachikma, nana he keyu hokvt :

37. Amba chim anumpa hv Ome, ome ; Keyu, keyu ; achi aiena kak ashke : ilvppak o nana kv ont atampa hokvt o nana ik vlhpeso mak o a minti hoke, hvchim achi lishke.

Nukchintot nana ik achukmo ka a pim ahleka he pi miha.

38. Nishkin atuk ma, nishkin makinlashke, mikmvt noti atuk ma, noti makinlashke ; achi tok a hvsh haklo chatuk :

39. Amba vno vto, Nan ik vlhpeso ka chik i sanalo kashke ; amba kvna hosh chitisopi isht impakimma ya issokma, in tvnnvp ma pit ish i weli makinlashke.

40. Micha hatak nana kia nan vlhpisa chi onochi cha, chim ilefoka ya chim ai ishikma, chim anchi ma ik ishi, ish im ahni akinlashke.

41. Micha k^vna kia awant i^vt kowi ach^vfa ka ish one pulla hi a chim ahnikma, awant i^vt tuklo h^o ish onashke.

42. Nana chim asilhhakma, ish emashke: mikm^vt chim a pota b^vнна hoka, chik i shanaiyo kashke.

Pin t^vn^vp puta ka i^l i hulla he; mikm^vt nana aia^hla he pim anukfila he aiena ka pi miha.

43. Chin chukapanta hatak a ish i hullo cha, chin t^vn^vp ok^vno ish i nukkillashke; achi tok a h^vsh h^ak-lo chatuk.

44. Amba vⁿo v^to, H^vchin t^vn^vp v^hleha h^a h^vsh i hullo cha, nana okpuloka h^vchim anukfillit miha aiena ka, nana achukma h^o im ahnit h^vsh mihashke; h^vchi nukkilli ma ai achukma hi o isht h^vsh i y^vmoh-mik m^vt, h^vchi kanimachit, h^vchi ilb^vshachikma, v^ba isht h^vsh anumpohonlashke.

45. Yakohmi hosh h^vch Iki v^ba binili ka im v^lla h^vchia hashke: y^vmmak ok^vt i h^vshi atuk ma nan ik ai v^lhpeso, micha n^a-hochukma aiena ka i kohchihin-chikm^vt, kocha umba ka nan-aia^hli hochukma, mikm^vt nan ik a^hlo aiena ka auet i pihinla chatuk oka.

46. H^vchishno a h^vch i hullo h^o h^vsh i hullo hok^vt, nanta hosh isht h^vchim v^lhtoba h^o? p^vblikan v^hleha ak kia y^vmmak ok^vno yohmi akinli chatuk key^u?

47. Micha h^vsh itibapishi v^hleha ak bano ho h^vsh aiokp^vchi hokm^vt, inla a^hsha ka nantak o isht i shah-lechi hosh h^vchi y^vmohmi h^o? p^vblikan v^hleha ak kia yohmi ak inli chatuk key^u?

48. Yohmi hoka aia^hli h^vchi achukma k^vt, h^vch Iki v^ba binili k^vt aia^hli achukma kak inli h^o h^vsh chiyuhmashke, h^vchim achi lishke.

CH Á P T A V I .

Chisvs vt nvniñ chaha ai anumpuli tuk vt a moma. Yohmi kv̄t na-habenv̄chi isht anumpuli.

1. Ahah! hv̄sh aiahnit nā hv̄sh habenv̄chi kv̄t, hv̄chi p̄isa ch̄i ka, hatak puta itikba yō hv̄ch ik a yvm̄ihcho kashke; yvm̄mak keyukm̄vt hv̄ch Iki v̄ba binili ka im a hv̄chim v̄lhtoba hi o keyu hoke.

2. Yohmi ka nā hv̄sh habenv̄chi kv̄t, isht-pufa ya ch̄i tikba yō ai olachit, nan-ilahobi v̄hleha hokv̄to hatak puta kak o im a holitopa ch̄i hosh sinakak anu-haka, micha ai itv̄nowa puta ka a yvm̄ohmi chatuk oka, hv̄ch ik chohmo kashke: ah̄li mak o hv̄chim achi lishke, yvm̄mak okv̄to im v̄lhtomba chatuk oke.

3. Amba nana ish habenv̄chi hokm̄vt, chibbak isht impak-imma yvt nana kaniohmi ka, chibbak v̄lhfv̄beka yvt akostinincha hi a chik im ahno kashke.

4. Yohmi na nā ish habenv̄chi ka a lum̄akashke; yohmikma Ch̄iki alum̄aka a p̄isa yvt ilap inli hosh otv̄nich̄i achukma hosh chim atobba hi oke.

Anumpa ilbv̄shvt asilh̄ha isht anumpuli.

5. Mich̄a v̄ba pit ish anumpuli kokv̄t, nan-ilahobi v̄hleha hokv̄no chik chohmo kashke; yvm̄mak okv̄to, hatak vt p̄isa ch̄i ka, sinakak anukaka, ai itv̄nowa ai itai-okhv̄nk̄v̄chi aiena kak o hiohm̄ayvt v̄ba pit anumpuli kak osh im achukma chatuk oka; ah̄li mak o hv̄chim achi lishke, yvm̄mak okv̄to im v̄lhtomba chatuk oke.

6. Amba chisno v̄ba pit ish anumpula ch̄i hokv̄to, chim abohushi pit ish chukowa cha, okhissa ya pit ish akv̄mmikm̄vt, Ch̄iki ai-alum̄aka ai ahanta yatuk ma pit ish im asilh̄hashke; yohmikma Ch̄iki alum̄aka a p̄isa yvt otv̄nich̄i achukma hosh chim atobba hi oke.

7. Yohmi kia v̄ba pit hv̄sh anumpuli hokv̄t it v̄lbillit mih̄iha, oklushi nan ik ithano ak okv̄no hv̄ch

ik chohmo kashke; yvmmak akvto anumpuli fehna kak o, hakla hinla, im ahoba chatuk oka.

8. Yohmi hoka yvmmak oka hvch ik holbo kashke; nana a hvchi bvna puta hokvt hvch ik im asilhho kisha kak inli ho, hvch Iki vt ithana hoke.

Chitokaka im anumpa ilbvsha.

9. Yohmi hoka yakohmichi hosh vba hvsh anum-pulashke: Piki vba ish binili ma! Chi hohchifo hv holitopashke.

10. Ish apehlichika yvt vlashke. Nana ish aiahni ka yakni pakna ya a yohmi kv, vba yakni a yohmi mak o chiyumashke.

11. Himak nitak ilhpak pim ai vlhpesa hoka ish pi ipetashke.

12. Mikmvt nana il aheka puta ish pi kashofi kv, pishno vt nana pim aheka puta il i kashofi chatuk a ish chiyuhmichashke.

13. Mikmvt anukpvlika yoka ik ia chik pim aiahno hosh, amba nan-okpulo a ish pi a hlakofihinchashke: Apehlichika, mikmvt nan-isht-aiahli, micha isht aholi-topa aiena kv chimmi a bilia yoke. Amen.

Nan-ilbvshali puta ka i kashofa he isht anumpuli.

14. Hatak nan ai ashvsheka puta ka hvsh i kashofi hokma, hvch Iki vba binili kv hvchishno ma hvchi kashofa hinla ak inli hoka.

15. Amba hvchishno vt hatak nan ai ashvchika puta ka hvsh i kashofi keyu hokma, hvch Iki vba binili kak kia na hvchim ai ashvchika puta ka hvchi kashofa he keyu hoke.

Na hollochi ka isht anumpuli.

16. Yohmikmvt anonti, nana hvsh hullochi kv nashuka ilapisa, nan ilahobi vhleha hoka hvch ik chohmo kashke; yvmmak okvto na hullochi kv hatak puta im otvna chi kv, nashuka ya ilapisachi chatuk oka. Ahli mak o hvchi miha lishke, yvmmak okvto im vlhtomba hoke.

17. Amba chisno *vt* na ish hullochikmvt, chi noshkobo ish ahvmmi cha, chi nashuka ma ish ache-fashke.

18. Yohmi cha hatak puta kano na hullochi ho chik i holbo hosh, amba ai alumaka ai ahanta Chiki ak illi ho ish im otvnashke; yohmikma Chiki ai alumaka a pisa yatuk mvt, otvnichi achukma hosh chim atobba he mak oke.

Na pim ilayak kanima yo il a boyula hi a pim anoli.

19. Hvchim ilayak puta ka yakni paknaka nan- ilayak i shushi, micha na-lakna kvv tvli a vpa chatuk aiena kvv ai okpvn chatuk, micha hukopa puta yvt tiwit isht chukowvt a hukopa ya hvchik ai atahlo kashke.

20. Amba hvchim ilayak puta ka vba yakni nan- ilayak i shushi, micha na-lakna kvv tvli a vpa chatuk aiena kia ai okpvn keyu, mikma hukopa puta kia tiwit isht chukowvt a hukopa keyu ak o hvsh ai atahlashke.

21. Kanima yo hvchim ilayak vt itonla hokma, hvchi chukvsh ak kia mihi yo pit takanla hinla ak inli hoka.

Nishkin achukma imma ka isht anumpuli.

22. Haknip a i pvla hvv nishkin ak oke. Yohmi hatuk o chi nishkin vt achukma hokma, chi haknip vt momvt tohwikelit alotowa hinla hoke.

23. Amba chi nishkin vt ik achukmo hokma, chi haknip momvt okhlilit alotowa he. Yohmi ka tohwikelit chi foyuka, yvmmak atuk vt ont okhlieli hokma, okhlili yvmmvvt chinto fehna hinla hoke.

I shahli ha tuklochit il ai okpvcha he keyu ka miha.

24. Hatak nana kia i shali ha tuklochit holitobla he keyu; achvfalit i nukkilli cha, achvfa yak o holitobla hinla; keyukmvt achvfalit pit halanli cha, achvfa yak

o kanimancha hinla hoke. Chihowa micha Mammon it aieninchit hvsh holitobla he keyushke.

Yakni paknaka nana a kaniohmi ka ai isht im anukfilvt isht ik ilbvsho hosh, amba Chihowa apehlichika yak o na tikba e hoy a miha.

25. Yohmi hoka hvchi ai okchaya hi a, nana ho hvsh pa he, micha nana ho hvsh ishka he aiena; mikmvt hvchi haknip ma nana ho hvsh fohka hi a anukfillit isht hvch ik ilbvsho kashke, hvchim achi lishke. Ilhfipak vt ilhpak, a i shahlikma, anonti haknip vt ilefoka ya i shahli ho keyu cho?

26. Hushi vba itvnova ko hó pesá: yvmmak okvt nana ho hokchi keyu, anonti vmot, kanchak kia pit ashachi ho keyu; yohmi kia vba hvch Iki vt yvmma ipehinta hoke. Holitopa kvv yvmma hvsh i shahli fehna ho keyu?

27. Hvsh katima kak osh anukfihinlit isht ilbvsha kvv hvchi chaha ka kubit achvfa kia hvsh il achakala hinla cho?

28. Micha nanta katiohmi ho na fohka ya anukfihinlit isht hvsh ilbvsha cho? Na pakanli hochukma lilli oktak aiasha kvv kaniohmit offo hoka anukfihinlit ho pesá: yvmmak okvt toksvlt a hoyvbli keyu, anonti nana ho shvnni keyushke.

29. Yohmi ak inli kia Solomon ak kia nan-isht im a holitopa moma isht a shema kvv ilvppa achvfona kia chohmi tok keyu, hvchim achi lishke.

30. Yohmi ka hvshuk himak nitak ano oktak aia-sha tuk osh onna ha apalvska vlpita chi kia, Chihowa hvv shemvchi kvv, yvmihchi kvto hvchishno a i shahlichu hosh ik hvchi shemacho ko hinla cho? na yimmi fehna keyu hvchia ma!

31. Yohmi hoka anukfihinlit isht ilbvshvv, Nantak o e pa chi? mikmvt nantak o iloh ishka chi ho? micha nantak o eho fohka chi cho? hvch ik acho kashke.

32. Ilvppa puta kak o okla nan ik ithano vhleha hvv hoyo chatuk oka; ilvppa moma ka a hvchi bvna hokvno vba hvch Iki vt ithana hoka.

33. Amba Chihowa apehlichika, micha im anuk-fila isht i hukhaklo aiena kak o tikba hvsh hoyashke; yohmikma ilvppa moyuma kvv kvchim aiena he mak oke.

34. Yohmi hoka onna ha ya hi a nana pit anukfihinlit isht hvch ik ilbvsho kashke; onna ha yokvto ilapo inli nan isht il ai anukfihinlit isht ilbvsha hi oka. Nana ik ai achukmo itonla kak osh nitak oka im vllhpesa hoke.

CHAPTA VII.

Nvni chaha Chisvs vt anumpuli tok osh a moma; yohmi kvv himakfokalechit inla ya na mihacha chi ka imolvbbi; micha nana kvv holitompa hokvto ofi puta, keyukmvv shukha aiena ka pit ik in hlatapo ka he miha.

1. Hvchishno a nana ik hvchi mihacho ka chi ka, inla ya nana hvch ik mihacho kashke.

2. Kanimihchit inla ya nana mihachi hosh hvsh mihachi tuk ma, hvchishno ma ishit hvchi mihacha he; mikmvv isht vllhpisa nana ho isht hvsh apesa tuk mvv, hvchishno mvv isht hvchim vllhpisa he akinli hoka.

3. Micha nanta katiohmi ho na hishonluk iskvtinosi kvv ish itibapishi nishkin a fokka na ish pisa ho kak osh, anonti iti chito yvv chi nishkin ak inli ka fokka kano chik akostinincho cho?

4. Micha katiohmi ho iti chito yvv chisno chi nishkin ak inli ho fokka ka, ish itibapishi ha, Na-hishonluk iskvtinosi ka chi nishkin a ai ishit ak kochi, ish im acha hinla cho?

5. Nan ilahobi chia hoka, chisno chi nishkin ak o tikba iti chito a ish a kokchashke; yohmikmak osh ish pisa achukma cha na hishonluk iskvtinosi ka ish itibapishi nishkin a ish a kohcha hinla hoke.

6. Nana kvv holitompa hokvno ofi puta ma pit hvch ik imokmvv, anonti hvchi na holitopa puta hatuk

ma shukha itikba ya hvch ik ashacho kashke; yvm-mak keyukma yvmmak ash o iyi isht a hahlichhi cha, anonti filemvt hvchishno ash o hvchi okpvna hinla hoke.

Anumpa ilbvsha ishit asilhha ka miha.

7. Hvsh asilhhakma, hvch ima he; hvsh hoyok-mvt, hvsh ahayucha he; hvsh sokqhakma, hvchin tiwa he oke.

8. Asilhha aiyyuka kokvto ishi bano hoke: mikma kvna hosh hoyo hokvto, ahayuchi hoke; mikma kvna hosh sokqha hokvno, in tiwa pulla hi oke.

9. Yohmi ka hatak hvsh katima kak osh, ushi osh pvaska im asilhha ka, tvli yo isht ima hinla ho?

10. Keyukmvt nuni yo asilhhakma, sinti yo isht ima hinla cho?

11. Yohmi ka nan ik ai vlhpeso hvchia kia chim vlla ya na hochukma isht ima kvv hvchimponna chatuk a, im asilhha hoka hvch Iki vba binili kvv na hochukma isht ima kvv i shahlechi ik fehno ka hinla ho?

Nan vlhpisa ya ai ataiyahli tok a yvmmak o inla ya ai isht iloh im a kaniohma hetuk. Micha okhissa iskvtinosi, micha hina ik pvtho, mikmvt okhissa chito, micha hina putha isht anumpli.

12. Yohmi hoka nan-oklyha ka hatak puta kvv hvchim a yvmohma hi a hvsh aiahni hosh, mih mak o hvsh ai i yvmohmi mak inlashke: ilvppak o nan vlhpisa, micha hopaii puta aiena kvv miha hoka.

13. Okhissa iskvtinosi ak o hvsh ai abehashke; okhissa yvt chito cha, hina mvt putha hosh aiokpuloka ya ona hatuk o, yvma ai abeha kvv laua hoke.

14. Okhissa yvt iskvtinosi cha, hina mvt ik pvtho hosh ai okchaya ya ona hatuk o, ik lauwo hosh yvm-mak oka ahayuchi hoke.

Hatak ilap nana a kaniohni kak osh ai isht il ithaiyana kv̄t, iti vt ilap nihi vni kak osh ai isht il ithaiyana chatuk a chohmi.

15. Hopaii ilahobi vhleha chukfv̄lhpoba i n̄a fohka fohka hosh hv̄chim ai v̄la kia, anukaka yokv̄to nashoba isikopa vhleha mak oka, ahah! hv̄sh im ahnashke.

16. Ilap v̄ni kak o ishit hv̄sh akostininchi pulla hi oke. Hatak vt kv̄ti hak o paki a ai v̄mo chatuk o? micha fik a shumv̄ti ak o ai v̄mo chatuk oh cho?

17. Yvm̄mak inli h̄o chohmit iti hochukma moma kv̄t v̄ni hochukma h̄o v̄ni chatuk; amba iti okpulo yokv̄to v̄ni yvt okpulo ȳo v̄ni chatuk.

18. Iti achukma yvt v̄ni okpulo ȳo v̄na he keyukma, anonti iti okpulo vt v̄ni achukma k̄o v̄na he keyushke:

19. Iti vt v̄ni achukma h̄o v̄ni keyu hokv̄to momv̄t chayvt akakoha cha, luak itokaha chatuk oke.

20. Yohmi hoka ilap v̄ni ak o isht hv̄sh akostininchi pulla hi oke.

Kv̄na hosh v̄ba aephlichika chukowa he isht anumpuli.

21. Chitokaka ma! Chitokaka ma! v̄m achi kak osh momv̄t v̄ba yakni a chukowa ho o keyushke; amba Aki v̄ba binili nan aiahni ka yvm̄ohmi tuk mak a hi oke.

22. Nitak yvm̄ma fehnakma Chitokaka ma! Chitokaka ma! ch̄i hohchifo h̄a nan isht anumpulit, ch̄i hohchifo h̄a nan-ishtahullo okpulo puta isht kocha welit, anonti ch̄i hohchifo h̄a n̄a fehna l̄awa ka isht il a yvm̄ihchi tok keyu cho? v̄m achi kv̄t laua hi oke.

23. Yohmikma otv̄nichit, Nitak nana ash̄o hv̄ch ithana li tuk keyu, nan ik v̄lhpeso yohmi hv̄chia hv̄t a filv̄mmit misha oh ia chá, im achi la hi oke.

Kv̄na hoh kia Chisvs im anumpa h̄a im antia hokv̄t tv̄li chito chuka yvt ai itv̄bana chatuk a chohmi; mikma kv̄na hoh kia i yimmi keyu hokv̄t chuka yvt shinuk o ai itv̄bana chatuk a chohmi.

24. Yohmi hoka kv̄na hosh v̄m anumpa ilv̄ppa puta hatuk ma haklo cha, mihma yvm̄ohmi ka, hatak

hopoyuksa yosh tvli paknaka yo in chuka a talali tok a it apesa lashke.

25. Yohmi tuk o umba hatuk mvt aka ituyula na okchitot vla ma, anonti mahli kv̄t mahli cha, chuka yvm̄mak ash ai ih̄iso ka, tvli paknaka yo ai itvbana hatuk okv̄t, ik akamo ki tok.

26. Yohmikma kv̄na hosh vm̄ anumpa ilv̄ppa puta hatuk ma haklo cha, mihma ik yvm̄ohmo hokv̄to, hatuk ik hopoyukso yosh in chuka ya shinuk paknaka yo a talali tok a it v̄lh̄pisashke.

27. Yvm̄ohmi tuk o umba hatuk mvt aka ituyula na okchitot vla ma, anonti mahli hv̄t mahli cha, chuka yvm̄mak ash ai ih̄iso ma, akama tok; micha okpuloka kv̄t aiahli tok oke, ahanchi tok.

28. Atuk o yakohmi tok; Chisvs vt ilv̄ppa ahan-chit ont in taiyaha ma, nan isht im abv̄chi tuk a okla hv̄t anukhlakanacha tok.

29. Im ai v̄lh̄pesa mak osh nana im abv̄chi tok; amba na holissochi v̄hleha hokv̄no ik chohmo ki tok.

CHAPTA VIII.

12. Chisvs vt leposi vbi ya hlakofichi.

1. Atuk osh nv̄nih chaha ya v̄ttvt akowa ma, okla chinto kv̄t iakaiya tok.

2. Mihma leposi vbi yosh v̄lv̄t ant aiokpv̄chi mvt, Chitokaka ma! v̄lh̄pesa ish ahni hokmvt, is sa kashofa hinlv̄shke, achi tok.

3. Mihma Chisvs vt ibbak a pit weli cha, potoli mvt, V̄lh̄pesa ahni lishke; chi kashofashke, achi tok. Yohmi ma leposi yash osh ashalika i kashofa tok.

4. Yohmi ma Chisvs vt, Ahah! ish ahni cha, hatuk nana kia chik im anolo kashke; amba okla isht im otv̄na ch̄i ka, Moses nana apesa tok v̄ba isht aiokpv̄chi a isht ivt, na holitompa isht asha ak o ont ish ile haiakachashke, im achi tok.

13. Chisvs vt Sintuliyvn in tishu hā hlakofichi.

5. Atuk osh Chisvs vt Kapenavm a ont chukowa ma, sintuliyvn vt mintit im vla tok.

6. Micha im asilhvvt, Chitokaka ma! an tishu hvvt palsi isht abeka hosh issikkopa fehna kvvt chuka ya itonlvshke, achi tok.

7. Mihma Chisvs vt, Ia lish ont hlakofichi lashke, im achi tok.

8. Mihma sintuliyvn ash osh afalaminchi mvvt, Chitokaka ma! vm aboha ya ant ish chukowa he si vlvhesa keyu hoke; amba anumpa illa ho ish anum-puli kia, an tishu hatuk mvvt hlakofa hinlvshke.

9. Uno yokvvt hatak tvshka chipota vhleba pehlichit i shahli nutaka ahanta chatuk sia hoke; yomhi kvvt ilvppak atuk ma, Ia, im achi likma, ia hoke: mikmvvt inla ho, Minti, achi likma, minti hoke: mikmvvt an tishu ha, Ilvppa yakohmichi, im achi likma, yvmihchi chatuk oke.

10. Chisvs vt yvmma haklo kvvt nukhlakancha mvvt, apihvt aya kash o, Ahli mak o hvchi miha lishke; Israel okla ak o kia nayimmi chinto yakohmi ka ak a pesoshke.

11. Yohmi ka, Hvshi akochaka, mikmvvt hvshi a opiaka aiena ka a minti kvvt laua hosh vba apehlichika ya ai vlvvt Eblaham, micha Aisaak, mikmvvt Chekob aiena ka ant ai itvpehvt binohla hi oke, hvchim achi lishke.

12. Yohmi ka ilvppa apehlichika im vlla yatuk okvno kocha aiokhlilika ka pit kampila he; yvmmak oka a yahayvt noti ma ahampa hi oke, im achi tok.

13. Mihmvvt Chisvs vt sintuliyvn ash o, Ish iashke: yohmikma isht a chi yimmi hatuk oka, mih mak osh a chi yvmohmashke, im achi tok. Mihma in tishu hatuk vt hvshi kanvlli vlvpisa mih mak inli ho hlakofi tok.

14. Chisvs vt Pita tekchi ishki, micha inla aiena ka hlakofichi.

14. Atuk o Chisvs vt Pita in chuka ya ont chukowa mvvt, yvmma tekchi a ishki vt yvnhvt abeka hosh itonla na pisa tok.

15. Mihmvt ibbak a pit potoli ma, yvnhā kv̄t shipvchi tok: mihma yvm̄mak ash osh wakaya mvt, nan isht im vtta tok.

16. Atuk o opiv̄t taha ma nan isht ahullo okpulo ai i foka puta kv̄t laua hō isht im ai ona tok; yohmi ma shilombish okpulo puta kash im anumpa hak o ishit kocha weli mvt; abeka yatuk a mominchit hlakofichi tok.

17. Yvm̄mvt hopaii Esaias vt anumpulit, Ilap ak inli hosh nan isht ik pi ai iksitopo puta ka pim ai ishit, nan isht pi abeka a puta ma isht pi kanchishke, achi tok a ont ai ahla chi mak vt tok.

15. Chisvs vt Taibelias okhvta hā kohcha cha mahli chito ya yokovchi; micha kaniohmi hosh il iakaya he pim anoli.

18. Yohmi ma okla chito fehna kv̄t apehvt ai asha na Chisvs vt pisa mvt, misha in tvnnvp ak o ilhkola hinla ka miha tok.

19. Mihma nā holissochi achvfa hosh vla mvt, Nanithvnanchi ma! kanima yō chik aya kia, chiakaiya la chi mak oke, im achi tok.

20. Mihma Chisvs ash osh, Chula puta kv̄t chiluk vt im ashakma, vba hushi puta kv̄t vlhpichik vt im asha hoke; amba Hatak Ushi okvto noshkobo hā kanima a bohla hi vt ik im iiksho hoke, im achi tok.

21. Mihma nan im ai ithvna vhleha hash osh achvvt, Chitokaka ma! vmm̄ona kano iv̄t aki a ont hohpi la hi a, vlhpesa is sv̄m ahnashke, im achi tok.

22. Yohmi kia Chisvs ash osh, Is siakaiyashke; yohmikma illi ak osh ilap bika illi yokvno hohpashke, im achi tok.

23. Mihmvt peni chukowa ma, nan im ai ithvna vhleha hv̄t iakaiya tok.

24. Atuk o mahli kv̄llo fehna kv̄t okhvta hā a tobv̄t kocha ma, peni ash o oka banvtha kv̄t isht ompohomo tok; yohmi kia yvm̄mak okvto nusi hosh itonla tok.

25. Mihma nan im ai ithvna vhleha hv̄t im ai vlv̄t ant okchali mvt, Chitokaka ma! ish pi okchalinchashke; pilli mak oke, achi tok.

26. Mihma yummak ash o, Na-yimmi fehna keyu hvchia ma! na katihmi ho hvchi nukshopa cho? im achi tok. Micha tani mvt, mahli mikmvt okhvta aiena kash im alvmmi tok; mihma yokopa ai ahlit talaia tok.

27. Yohmi ma hatak ash osh okla nukhlakancha mvt, Ilvppvt hatak katiohmi hatuk okak o, mahli micha okhvta aiena hokak kia im antia cho? im achi tok:

16. Nan isht ahullo okpulo vhleha ha Chisvs vt kocha weli ma; nan isht ahullo okpulo vhleha hash osh shukha laua ya iba chukowa; yohmi tuk o Kekesenenes okla hvt i yakni a Chisvs a a kochechi.

28. Atuk o misha in tvnnvp Kekesenenes yakki a ona ma, nan isht ahullo okpulo ai i foka kvv tuklo hosh anukshomunta fehna hatuk o, hatak nana kia yvmma imma ka ont ia he keyu chatuk o, hatak illi aiasha ya ashvvt kohchvt minti hosh ont afama tok.

29. Mihmvt tahpvlvt okla mvt, Chisvs, Chihowa Ushi chia hvt nanta ho isht ish pi ahalaia cho? ik ai ono kisha ho, ish pilbvshacha chi hosh ilvppa ish la hoh cho? achit okla tok.

30. Yohmi ma shukha laua kvv impa hosh auet i hopaki ka ai asha tok.

31. Yohmi hatuk o nan isht ahullo okpulo vhleha hash osh im asilhha mvt, Ish pi kocha weli hokmvt, ivt shukha laua ya ont il abeha he ak o ish pim ahnashke, achit okla tok.

32. Mihma, Hvsh iashke, im achi tok; mihma kocha wiha mvt, shukha laua yash, o ont abeha tok; mihma shukha laua yash osh momvt yihlepa fehvvt okhvta sakti chaha yo pit ai oka kahvt ok ai illit taha tok.

33. Mihma apesvchi vhleha hatuk vt yihlepvvt, ilhkolit tvamaha ona cha, nana ka mominchit anoli tok; micha nan isht ahullo okpulo ai i foka tuk vt nana im a kaniohmi tuk a aieninchit anoli tok.

34. Yohmi ma tvamaha hash osh momvt Chisvs a afamvt ilhkoli tok; atuk osh yummak ash o okla pisa mvt, i yakni a a kohchvt aya hinla ka okla im asilhha tok.

CHAPTER IX.

17. Chisvs vt palsi isht abeka ya hlakofichi.

1. Yohmi ma yvmmak ash osh peni o pit chukowa mvt, pit tanvbli cha, ilap in tvamaha ak inli ho ona tok.

2. Mihma hatak vt palsi isht abeka hosh potvlhpo pakna itonla ho okla isht im vla tok; mihma Chisvs vt okla na yimmi ka pisa mvt, palsi isht abeka ash o, Svso ma! chi yukpashke; na chim ai-ashvchika puta kvv chii kashofa hoke, im achi tok.

3. Yohmi ma na holissochi vhleha kaniohmi kvv, Hatak ilvppvt nan ik ahobalot anumpulishke, chukvsh anyakaka okla ahni tok.

4. Yohmi ma Chisvs vt okla im anukfila ha ithana hatuk osh, Nanta katiohmi ho hvchi chukvsh a nan okpulo ishit hvsh anukfilli cho?

5. Na chim ai ashvchika puta kvv chii kashofa hoke, achi kak okma, keyukmvt, Tani cha nowa, achi kak okma, katimampo kak osh achiba kvv ik lauwo cho?

6. Yohmi kia, Hatak Ushi yvt yakni paknaka anta kvv nan ai ashvchika puta ka kashofa hi vt im ai vlhpesa hatuk a, hvsh akostinincha chii kak oka, palsi isht abeka ash o, Tanit chii potvlhpo ishi cha, chii chuka ish iashke, im achi tok.

7. Mihma yvmmak ash osh tani cha in chuka ia tok.

8. Yohmi ma okla chinto kvv pisa mvt, nukhlakan-chvt hatak a nan-isht im ai ahli yohmi ka ima tok Chihowa ash o ai okpahanchi tok.

18. Chisvs vt Mahlu i howa; micha Falisi vhleha ha Mahlu im ai impa asha mvt ai it im anumpuli.

9. Mihma Chisvs vt yvmmak ash o vttvt ia mvt, hatak vt Mahlu hohchifo hosh, tvli holisso ai itahoba

ya binili ho ont pisa tok; mikmvt yvmmak ash o, Is siakaiyashke, im achi tok; mihma wakaya mvt iakaiya tok.

10. Atuk o yakohmi tok; Chisvs vt impa hosh aboha anuka asha ma, pvblikan vhleha, mikmvt nan ashvchi vhleha aiena kvt laua hosh ai vlvvt yvmmak ash, micha nan im ai ithvna aiena ka ant takla binohli tok.

11. Mihma Falisi vhleha hvt pisa mvt, yvmma nan im ai ithvna vhleha hash o, Katiohmi ho nan hvch ithvnanchi vt pvblikan, micha nan ashvchi vhleha aiena ka it ibai impa cho? im achi tok.

12. Yohmi kia Chisvs vt yvmma haklo mvt, Haknip im achukma hokano alikchi a ai im ai vlhpiesa keyu chatuk, amba abeka yok mak oh chatuk oke.

13. Uba isht-ai okpvchi ak okano ak aiahno; amba nan i nukhaklo ak o ai okpanchi li hoke, achi yvmmak osh nana hokma, ont oh ithvna; hopoyuksa vhleha ak o hoyot aya li hvt tok keyu; amba nan ashvchi vhleha hvt ile kostininha chi mak vt tok oke, im achi tok.

19. Chisvs vt Chani nan im ai ithvna vhleha na hullochi imma ka isht anumpuli.

14. Yohmi ma Chani nan im ai ithvna vhleha hvt im ai vla mvt, Katiohmi ho pishno, micha Falisi vhleha il aiena kvtto nukhaklot nan e hullochi fehna ma, amba nan chim ai ithvna vhleha hvt nukhaklot nan ik hullocho cho? achi tok.

15. Mihma Chisvs vt, Hatak himonna ohoyo itauwaya tuk vt takla anta moma ka i kanomi vhleha hvt nukhakla hinla cho? yohmi kia hatak himonna ohoyo itauwaya tuk ash ant im ai isha he nitak vt ai ona he; yohmikmak o okla hvt nukhaklot na hullocha hi oke.

16. Hatak nana kia anchi sipokni a nantvna hlilafa himona ya lapalichi chatuk keyu; vlhkvt lapali kash osh anchi ash hlilvfit ishikma, i shahlit hlilavt okpulo chatuk oke.

17. Mikma hatak puta kvt oka-paki himona ya shukcha sipokni yo apitta chatuk keyu; yvmmak ke-

yukma shukcha yvt mitahli na oka-paki yvt hlayak-ma, shukcha yvto okpulo chatuk; amba oka-paki himona ya shukcha himona yo apittakmak o, tuklot nan ik okpulo chatuk oke, im achi tok.

20. Chisvs vt na pehlichy ushetik vt illi tuk a okchalinchit tanichi: micha ohoyo hvv issish umbokapa isht abeka tuk a hlakofichi.

18. Ilvppa puta ka isht im anumpulik fehna, hatak na pehlichy achvfa hosh vla cha, ant aiokpvchi mvt, Himonasi ak kia svso-tek vt illi mak osh itonlvshke: yohmi kia minti cha, chibbak ant isht ish umbitepa hokma, okchaya hinla hoke, achi tok.

19. Mihma Chisvs vt wakaya cha, iakant ia ma, nan im ai ithvna vhleha aiena kvv yohmi ak inli tok.

20. Yvmohmi tuk o ohoyo hvv issish umbokapa isht abeka tok afvmmi auah tuklo hosh, yvmmak ash im ashaka ya mayvt ona cha, im anchi aposhokvchi a pit potoli tok.

21. Im anchi ak illa ho ak potoli kia, sa hlakofa hinlvshke, ahnit im anukfila hatuk osh.

22. Yohmi kia Chisvs vt filemvt yvmmak ash o pisa mvt, Svso-tek ma! na chi yukpa achukmashke; na chi yimmi pulla hosh chi hlakofichi hoke, achi tok. Mihma hvshi kanvlli vlvhpa yvma fehna ho ahoyo yvmmak ash osh hlakofi tok.

23. Mihma Chisvs vt hatak na-pehlichy in chuka yash ona cha, oskula olachi vhleha, micha okla yaiya aiena ka ont pisa mvt,

24. Oh iti kanvlli; ohoyo himita yvt illi keyu hoka; amba nusi hoke, im achi tok. Mihma isht yopulvt okla i yukpa tok.

25. Yohmi kia okla hvv kocha wihvt taha ma, pit chukowa cha, ibbak a ont halvlli ma, ohoyo himita yash osh tani tok.

26. Yohmi ma ilvppak atuk vt annovt yakni yvma moma hlopulli tok.

21. Chisvs vt hatak nishkin lva tuklo ho i fatummi.

27. Atuk o Chisus vt yummak ash vttut ia ma, hatak lva tuklo kv̄t iakaiyvt ayvt, tahpahanlv̄t, Lewi ushi chia ma! ish p̄i nukhaklashke, ahanchi tok.

28. Mihma yummak ash osh aboha ont chukowa ma, hatak lva atuk vt im onvt okla tok: mihma Chisvs vt, Ilvppa yakohmichi la hinla ka hv̄chi yimmi cho? im achi ma, Yau, Chitokaka ma! im achit okla tok.

29. Yohmi ma nishkin a pit potoli mvt, Na hv̄chi yimmi tuk pulla mak osh isht a hv̄chim v̄lhpesashke, achi tok.

30. Mihma nishkin vt i fatumvt okla tok: yohmi ma Chisvs vt kv̄llochi fehna hosh i mihvt, Ahah! hv̄sh ahni na hatak nana kia ik akostinincho kashke, achi tok.

31. Yohmi tuk kia itiachi mvt, yummak ash o yakni yv̄mma mominchit ai im annowachi tok.

22. Chisvs vt hatak ik anvp̄polo nan-isht ahullo okpulo ai i foka yatuk a im achukmali: micha anonti vbanumpa Kalili yakni ya ai anumpohonli; mikmvt na-toksvli v̄hleha hv̄t lauv̄t i shahlit nan ahoyo ya ilhkola hi a, v̄ba pit anum-pohonla hi a i miha.

32. Yv̄mmvt a kohcha ma, hatak ik anvp̄polo nan-isht ahullo okpulo ai i foka ho okla isht im v̄la tok.

33. Atuk o nan-isht ahullo okpulo yash osh a khocha ma, ik anvp̄polo yash osh anumpuli tok: yohmi ma okla laua yash osh nukhlakancha mvt, Himonna kia Israel okla ha a yakohmi na kv̄na hosh pisa chatuk keyushke, achi tok.

34. Yohmi kia Falisi v̄hleha hash osh, Ilvppvt nan-isht ahullo okpulo puta ka nan-isht ahullo okpulo i miko yak o isht kocha weli hoke, achi tok.

35. Yohmi ma Chisvs vt tv̄maha moma, micha tv̄mahushi puta aiena ka mominchit ayvt, i sinakak puta kak o nan im ai abahanchi, mihmvt v̄ba apehlichika isht anumpa hanta isht anumpohonli, mihmvt

abeka moma ka hlakofihinchit, haknip ik in chukmo okla im asha tuk a mominchit hlakofihinchi tok.

36. Yohmi tuk kia okla laua yash osh hoyvbli cha, it a fimimpvt aiasha, chukfulhpoba yosh apesvchi ik im iksho ho, chohmi na pisa hatuk osh i nukhaklo tok.

37. Yohmi mvt nan im ai ithvna vhleha hash o, Nahoya hi okvto laua ho mvhli, amba toksvli vhleha hak osh ik lauwoshke.

38. Yohmi hoka na-hoya hi okvt Chitokaka immi hoka nan im ahoya hi a toksvli vhleha ha auet tihlela chi ka, hvsh im asilhashke, im achi tok.

CHAPTER X.

23. Chisvs vt nan im ai ithvna auah tuklo kvv vbanumpa ha isht anumpohonla chi ka, micha na fehna puta ka ai yvmohma chi aiena ka kanompit tihleli.

1. Yvmohmi tuk osh nan im ai ithvna auah tuklo kash o itahobit tahli mvt, nana im ai ahlit, nan-isht ahullo okpulo puta imaiyvt, yvmmak atuk ma kocha welit abeka ilaiyuka puta, micha haknip ik in chukmo ilaiyuka moma hlakoficha hi a im apesa tok.

2. Yohmi ka vbanumpeshi auah tuklo hochifo kvv yakohmi kak oke: vmmona Saimon atuk osh Pita hohchifo tok; mihma itibapishi Antilu ak vt tok; Se-bete ushi, Chemis ak osh, nakfish Chani itatuklo tok:

3. Mihma Filip, micha Batalomu; Tamas, mikmvt pvblikan hatak Mahlu; Alfevs ushi Chemis, micha Lebevs osh hohchifo apunta kvv Tatevs vt tok.

4. Mihma Kenan hatak Saimon, micha Chutas Iskaliot ak atuk osh yvma haksichi tok ak inli ka aiena tok.

5. Auah tuklo ilvppak o Chisvs vt pit tihleli mvt, nan im apesvt, Chentail aiasha pilla hokvno hvch ik aiyo kashke, mikmvt Samalia okla in vmaha ha ont hvch ik chukowo kashke.

6. Amba Israel in chuka-chufa chukfulhpoba tuma pulla kak o hvsh im ai onashke.

7. Micha ia hosh hvsh itunowa kvrt, vba isht anumpohonlit, Uba apehlichika yvt olanlosi vlvshke, hvsh ahanchashke.

8. Mikmvt abeka ya hlakofichit, leplosi vbi puta ka i kashofit, illi puta ka tanichit, nan-isht ahullo okpulo puta ma hvsh kocha welashke : pilla ho hvsh habena hatuk okvt, pilla ho hvsh imashke.

9. Hvchi shukcha atuk ma tvli holisso lakna, micha tvli hvta, mikmvt tvli lakna nana kia fohkit hvch ik ieshokmvt ;

10. Anonti nowvt hvsh aya hokvt bahta kia, ilefoka lumbo tuklochit, shulush aiena ma tuklochit, tvbi nana kia hvch ik iesho kashke ; hatak toksvli yvt ilhpita he ak o vlhpesa hoka.

11. Micha tumaha, keyukmvt tumaha chito yokma nana ho ont hvsh chukowa chi kvrt, kurna hosh vlhpesa kvrt yvmma anta ka, hvsh ponaklashke ; micha yvmmak o hvsh asha tuk osh a kohchvt hvsh iashke.

12. Micha chuka yo ont hvsh chukowakmvt, hvsh ai okpvchashke.

13. Yohmikma chuka yatuk mvt vlhpesa hokma, na yukpa he hvsh im ahni tuk a onitulashke : amba vlhpesa keyu hokmuno, na yukpa he hvsh im ahni tuk a hvchi falamashke.

14. Micha kurna kia ik hvchi aiokpacho, micha hvchim anumpa ma haponakla he keyukma, chuka yokma, tumaha hokma, nana hatuk a hvsh a kohchakmvt, hituk tohbi hvch iyi asha hatuk ma hvsh tahtulashke.

15. Ahli mak o hvchi miha lishke, Nan-vlhpisa nitak okvno Sotom, micha Komola aiena kvrt im ahleka hohkia, pit im vlhpisa kvrt tumaha yvmmak vt tok a i shahla hi oke.

16. Inta ! chukfulhpoba yo nashoba itintakla pit tihleli ho hvch itilauечи lishke ; yohmi hoka kostini kvrt sinti ak o hvsh chiyuhmi cha, nuktaiyala mvt pvchi-yoshuba ak o hvsh itilauashke.

17. Yohmi kia hatak puta ka ahah ! hvsh im ahnashke : yvmmak okvt ishit nanapesa vhleha ibbak

a hvchi fohokikma, i sinakak puta ka a hvchi fahama he mak oke.

18. Micha na pehlichy vhleha, mikmut miko puta, Chentail okla aiena ka, na hvsh im ai atokola chi ka, vno pulla hatuk mak o yvmma puta ka itikba hvch isht ohona hi oke.

19. Yohmi kia hvch isht ohona ka, kanimichit, micha nana ho hvsh anumpula he aiena kvrt hvch ik anukfillo kashke: nana ho hvsh anumpula hi a hvshi kanvlli vllhpisa yvmmak inli ho hvchi anuk-fohka hi oka.

20. Hvchishno ak osh hvsh anumpula hi o keyu, amba hvch Iki imi Shilombish yvmmak osh a hvchi anumpula he oka.

21. Mikma itibapishi hatuk vt itibapishi ha illi issakma, anonti iki atuk vt vlla ya illi issa he: yoh-mikma vlla puta kvrt iki ishki aiena hatuk ma i nuk-killi cha, illi issa hi oke.

22. Mikma sa hohchifo pulla hatuk mak o momvt hvchi nukkilli he: yohmi kia kvna hosh achunanchit mahayvt ai vlli ka ona hok mak osh okchaya hi oke.

23. Yohmi kia tvnaha chito ilvppa a hvch issik-ko-palikma, yihleptv inla yo hvsh onashke. Ahli mak o hvchi miha lishke, Israel okla in tvnaha puta ka hvch ik hlopullo kisha ho, Hatak Ushi yvt vla hi oke.

24. Nan-ithvna yvt nan-ithvnanchi ya imaiya ke-yukma, anonti tishu hvt i shahli ha imaiya ho keyu chatuk.

25. Nan-ithvna yvt nan-ithvnanchi ya itilavikma, anonti tishu hvt i shahli hatuk ma itilavikmak osh im vllhpesa hoke. Chuka-chvfa pehlichika ya Beelsebub okla hochifo tuk vt in chuka-chvfa ya i shahlechi kvrt katiohmichi hosh hochifa hinla cho?

26. Yohmi hoka yvmmak oka hvch ik i nukshopo kashke. Nana kvrt ompoholmo tuk osh ik otano ka hi vt iksho ma, anonti nana kvrt luma tuk osh ik anno-wo ka hi vt iksho hoka.

27. Nana ka okhlilika yo a hvchim anoli li ka a tohwikelika yo hvsh ai anolashke: micha nana ka haksobish tikelichi hosh hvsh haklo kvrt, yvmmak ash aboha pakna yo hvsh ai anolashke.

28. Mikmvt haknip a vbi kia, shilombish a illicha he keyu yummak okvno hvch ik i nukshopo kashke: amba shilombish micha haknip it aieninchit aiokpuloka ai ilbvshala hinla kak pulla ho hvsh i nukshopashke.

29. Hushi chipunta yvt tuklokmvt sint achvfa iklvna itatuklo vlhtoba chatuk keyu? mikma yvmvt, hvch Iki vt ahni keyukma, achvfona kia aka itula hi o keyu hoke.

30. Amba pashi hvchi noshkobo o hikia kak kia momvt holhtinvt taha yoke.

31. Yohmi hoka ik hvchi nukshopo kashke; holi-topa kvv hushi chipunta laua kia hvsh i shahli hoke.

32. Yohmi hoka kvna hosh hatak puta itikba ya si ai ahninchit tuk ma, vno ak kia ilapa Aki vba binili ka itikba ya ai ahninchit la hi oke.

33. Amba kvna hosh hatak puta itikba ya ik si ai ahninchit tuk ma, vno ak kia ilapa Aki vba binili ka itikba ya ak ai ahninchit ka he oke.

34. Yakni pakna ya nanaiya a bohliit aya li tok ik hvchim ahobo kashke: nanaiya ho a bohliit aya li tok keyu, amba bvshpo falaia ak vt tok.

35. Hatak a iki ik it im a vlhpesochit, ushetik a ishki ik it im a vlhpesochit, ipok atuk ma ipokni a ik it im vlhpesochit aya li hvv tok.

36. Mikma hatak in tvnvp puta kvv ilap in chukachvfa ash inla hi oke.

37. Kvna hosh iki yokma, keyukmvt ishki yokma, nana ho i hullo kvv vno a im i shahli hokvt, vmmi ha he vlhpesa keyu hoke: mikmvt ushi yokma, keyukmvt ushetik okma, nana ho holitobli kvv vno a im i shahli hokvt, vmmi ha he vlhpesa keyu mak inli hoke.

38. Yohmikma kvna hosh im iti-taiyukhvna ya sholi cha, siakaiya keyu hokvt, vmmi ha he vlhpesa keyu mak oke.

39. Kvna hosh im ilbfopak a ahayuchi tuk mvt i kvnia he: mikma kvna hosh vno pulla hatuk mak o im ilbfopak vt i kvnia hokmvt, ahayucha he mak oke.

40. Kvna hosh hvchi aiokpvchi hokvt, vno a si aiokpvchikma; anenti kvna hosh vno a si aiokpvchi kvv, auct sa kanchi tok ma aiokpvchi hoke.

41. Kuna hosh hopaii ya hopaii atuk mak o aiokpuchi hokvt, hopaii im ai vhltoaba mak o isha he: yohmikma kuna hosh hatak ahli achukma ka, ahli achukma atuk mak o, aiokpuchi hokvt, hatak ahli achukma im ai vhltoaba mak o isha hi oke.

42. Mihma kuna hosh chipota vhleha ilvppa achv-fona kia, nan ithvna yatuk mak o ishka chi ka ok kapvssa isht-ishko achvfa illa ho ipeta kia, yvmmvt kaniohmit nan-vhltoaba hvv i hlakofa he keyu, ahli mak o hvchim achi lishke, achi tok.

CHAPTA XI.

24. Chisvs vt vba isht anumpohonli kvv a moma; Chani Baptist na pit ponaklo tuk a Chisvs vt afalaminchit im anoli, micha Chani Baptist a aiahlit isht anumpuli.

1. Atuk o yakohmi tok; Chisvs vt nan im ai ithvna auah tuklo kash nan im apesvt in taiyaha mvt, in tvmahaha puta ka nan ai ithvnanchi, micha vba isht anumpuli aiena chi hosh yvmma vttvt ia tok.

2. Atuk o Kilaist vt nan-isht-anta puta ka Chani yvt aboha kvullo anukaka ya a haklo mvt, nan im ai ithvna vhleha tuklo ho pit tihleli tok.

3. Mihmvt yvmmak ash o, Chishno ak osh aya he tok mak o chia hokma, ak chu? inla yo e hoyokma, nanta chi cho? yit im achi tok.

4. Mihma Chisvs vt a falaminchi mvt, Anonti hvsh ia cha nana ka hvsh haklo, micha hvsh pisa aiena tvk vt Chani ya ont hvsh im anolashke.

5. Lvpa yvt hopokoyo ma, imomokpulo yvt nowa; leplosi vbi okla hvv i kashofa; mikma ik haponaklo yvt haponaklo; illi tuk vt tani; mihma ilbvsha puta ka vbanumpa hvv isht im anuhompvshke.

6. Yohmi ka kuna hosh vno a ik si ai ibetvblok-mvt na yukpa he mak oke.

7. Mihma itiachi ma, Chisus vt okla laua ya im anumpulit ishtia mvt, Chani ak o miha hosh, Nanta ho hvsh pisa chi hosh yakni haiaka ya hvsh ilhkoli tok o? Kushak vt mahli na faiokvchi kak atuk o?

8. Amba nanta ho pisvt hvsh ilhkoli tok o? Hatak nafohka lapushki fohka kak atuk o? nafohka lapushki abehkvchi hokvto miko in chuka puta kak o aiasha hoke.

9. Amba nanta ho pisvt hvsh ilhkoli tok o? Hopaii atuk o? ahli, yohmi ka hopaii ak kia imaiya hoke, hvchim achi lishke.

10. Um anumpeshi ya chi tikba chvffichi li hoka, mihi yosh chi hina ya tikbanli apoksiacha chi hoke, achit isht holisso tok a ilvppak osh mih mak oke.

11. Ahli mak o hvchim achi lishke, Ohoyo ho a tobvrt aiasha ka itintakla hikia kvrt Chani Baptist a imaiya chatuk keyushke: yohmi nana kia moma ik lauwo hosh vba apehlichika ya anta kvrt, yvmma imaiya hoke.

12. Yohmi ma Chani Baptist vt ahanta nitak atuk a ai vhlit mihinti ka, vba apehlichika ya ishi bvna kvrt achilita fehna, yohmikma achilita puta kvrt onitvlt ihishi na himakvshke.

13. Hopaii vhleha moma micha nan vllhpisa aiena kvrt na tikbanli anoli kvrt, Chani ak o ant im ai vhli hoka.

14. Micha hvchi yimma hinla hokma, ilvppak osh vla he tok Elias mak oke.

15. Kvna hosh isht haponakla he haksobish vt i hinlikmvt, haklashke.

16. Amba himak okla aiasha ilvppak okvno nantak o it-apesa la chi cho? Ulla yosh ilhpak a kanchi yo binohmaya hosh ilap bika iti howvt,

17. Oskula ha e hvchim olachi ka, hvch ik heh-loshke e hvchi yaiya ka, hvch ik yaiyoshke, achi ho itilauishke.

18. Chani vt ik impo, micha nan ik ishko aiena hosh aya ma, Yvmma nan-isht ahullo okpulo il ai eshi hoke, okla achishke.

19. Hatak Ushi yvt ihmipa, mikmvt nan ihishko aienvt aya ma, Yake! hatak isikopa, oka-paki ishko shahli, pvblikan micha nan ashvchi vhleha aiena ka

i kana yoke, achishke: yohmi kia Ahopoyuksaka yokvto im vlla vhleha hā isht im a holitopa hoke, im achi tok.

25. Chisvs vt tumaha kanimi ka na palvmmi kv̄t onitula chī ka anoli, yvmmak oka na fehna laua ka ai yvmihinchī tuk kia, okla ik ilekostinincho hoka.

20. Yohmi mvt tumaha na-fehna ka a yvmihinchī fehna tuk puta kash, okla ilekostininchi keyu hatuk o, nan isht a mihachit ishtia tok.

21. Kolasin na! na chī palvmmi mak oke: Bet-saita ma! na chī palvmmi mak oke; na-fehna puta kv̄t hvchishno ya hvchim a yvmohmi tuk vt Taiah, micha Saiton aiena ka a yvmohmi hv̄t tok okma, hopaki kash inli hō na pashi tv̄nna anchit hituk chubbi banot mav̄vt ilekostinincha he vt tok oke.

22. Yohmi kia nan vlhpisa nitak okv̄no Taiah, micha Saiton aiena kv̄t im ahleka hoh kia pit im vlhpisa kv̄t hvchishno yokv̄no i shahla hi oke, hvchim achi lishke.

23. Yohmikma Kapenavm chia shutik ak o ont ish talaia tuk vt, akivt ai okpuloka mak o ish ona hi oke: na-fehna puta kv̄t chishno ya chim a yvmohmi tuk vt Sotom a a yvmohmi hv̄t tok okma, himak nitak ak kia talaia hi vt tok oka.

24. Yohmi kia nan vlhpisa nitak okv̄no Sotom yakni vt im ahleka hoh kia, pit im vlhpisa kv̄t, chishno yokv̄no i shahla hi oke, hvchim achi lishke, achi tok.

26. Chisvs vt Chihowa pit aiokpv̄chi mvt, Iki vt nan okluha ka ibbak i foyuki tuk a achi; mikmvt a foha chī kv̄t hoyv̄bli puta kv̄t im ai ona chī ka i miha.

25. Nitak yvmma fehna ma Chisvs vt anumpuli mvt, Aki, shutik micha yakni aiena in Chitokaka ma! na yakohmi puta ka na-kostini micha nan ithana aiena kv̄no ish in luhmi tuk osh, vlōsi puta hō ish im otv̄nichi hoka, yak oke, chim aiahni lishke.

26. Ulhpeshake, Aki ma! yvmmak osh chim vlhpiesa hatuk oka, achi tok.

27. Aki-vt nan okluha ka svbbak fohkishke: yohmi ka Ushi ya hatak nana kia ik ithano ho, amba Iki ak banoshke; mikma Iki a hatak nana kia ik ithano ho, Ushi ak illa, micha Ushi ak osh kuna ho im otvnichi hok mak bano hoke.

28. Toksvlit ahantvt hoyvbli, micha shapoh i weki puta hvchia mvt, momvt hvs svm ai vla na hvchi fohchi lashke.

29. Um ikonla abana yak o isht hvsh il abanali cha, vno ak o hvs svm ai ithvnnashke: vno ak osh chuhvsh yohbi, micha chuhvsh akanlosi aiena sia hoka: yohmik mak osh hvchi shilombish puta a foha hi a hvsh ahayucha he mak oke.

30. Um ikonla abana ya il abanali ka im vlhpiesa, micha a shapoh hvt shohula hoke, im achi tok.

CHAPTA XII.

27. Nan im ai ithvna vhleha hash osh nitak hullo yo onush a hlehlit vpa tuk o, vlhpesa, Chisvs vt im ahni tok.

1. Nitak ymmma foka ma Chisvs vt nitak hullo nitak o osapa hlopullit aya ma, nañ im ai ithvna vhleha hvt hohchufo hatuk osh, onush a hlehli cha, vput ishtia tok.

2. Yohmi hia Falisi vhleha hvt pisa mvt, Yake! nana ka nitak hullo nitak a a yohma he vlhpesa keyu ka, na chim ai ithvna vhleha hvt yohmishke, im achi tok.

3. Yohmi kia ymmak ash osh, Lewi micha apehvt aya tok aiena kvt hohchufo mvt, kaniohmi tok,

4. Chihowa im aboha hatuk a ont chukowa cha, pvska otvni ymmak oka ilapvt, micha apehvt aya tok aiena kvt vpa he ai im vlhpesa keyu, amba na-holitompa isht asha ak illa hatuk a vpa tok a, holisso ha hvch ik ai it im anumpulo chatuk oh cho?

5. Yvmmak keyukmvt na-holitompa isht asha vhleha hvt nitak hullo nitak puta ma tempel anukaka ya nitak hullo a kobahafi kv ashvchi hvt tok keyuka, nan vllhpisa holisso ha hvch ik ai it im anumpulo chatuk oh cho?

6. Yohmi kia, Achvfa hosh tempel a imaiya kv ilvppa anta hoke, hvchim achi lishke.

7. Yohmi kia, Uba isht-aiokpvchi ya ak ahnincho, amba nan i nukhaklo ak o ai okpanchi li hoke, achi ilvppak osh nana ho miha hatuk a hvsh okostininchi hatuk okmvt, ashvchi keyu ka anumpa hvsh onocha he tuk keyu chishke.

8. Hatak Ushi yvt nitak hullo ak kia in Chitokaka ak inli hoka, im achi tok.

23. Chisvs vt ibbak bvshi yatuk a achukmali tuk o, Falisi vhleha hvt vbi bunna.

9. Micha yvmmak ash vttvt ia mvt, yvmma i sinakak ak o ont chukowa tok.

10. Yohmi ma hatak vt ibbak shulla yosh asha tok. Yohmi ma ilvppak ash o nan vllhpisa onocha chi hosh okla im ponaklot, Nitak hullo nitak a na hlakoficha he vllhpesa cho? achi tok.

11. Yohmi ma yvmmak ash osh, Hatak hvchi kaima kak osh chukvllhpoba hvt achvfa hosh im anta tuk vt, nitak hullo nitak o yakni kula pit itula ka, pit halvllit ik kohcho ka hinla cho?

12. Yohmi ka hatak vt holitopa kv chukvllhpoba ya katvohmi ho isht i shahli ho? Yohmi hoka nitak hullo nitak a nana achukma ka yohma he vllhpesa hoke, im achi tok.

13. Yohmi mvt hatak ash o Chibbak a chisemochi, im achi tok. Mihma chisemochi tok: yohmi ma falamvt achukmvt taha mvt, in tvnnvp akinli ho chohmi tok.

14. Yohmi ma Falisi vhleha hvt kocha wiha mvt, kanimihchit vba he vt isht it im anumpulit maya tok.

15. Yohmi kia Chisvs vt ilvppa akostininchi mvt, yvmmak ash a kohchvt kvnia tok: mihma okla chito

hvt iakaiya ma, yummak ash o mominchit hlakofichi tok.

17. Yohmi mvt, hopaii Esaias vt anumpohonli mvt, An tishu hano ai atokoli li tuk a holitopa, sv shilombish vt isht ai yukpa fehna ka ho pesá: ilvppak o vmi Shilombish a onochi likma, yummak osh Chentail okla ha vba nan vhlpisa ya im otvnicha hi oke.

19. Yummak okvt ik it im paknokmvt, anonti ik tahpvlo ka he; mikma tvmaha ai itahoba puta ka im anumpa ha hatak nana kia a haiyakla he a keyu ka he.

20. Kushak kushkoa kia ik tilohlecho ka he, mikmvt pva i honnula lua shobulli ka ik mosholecho hosh vba nan vhlpisa ya fihimit isht imaiyacha he.

21, and 16. Yohmikma Chentail vhleha hvt yvma hohchifo ho anukchieta he, achi tok a ont ai ahla chi mak o, ilapa okla ik otvnicho ka hi a kvullochit i miha tok.

29. Shilombish okpulo ai i foka tuk a Chisvs vt hlakofichi; mihmvt Shilombish Holitopa ya ik ahobalot anumpuli kv i kashofa he keyu miha.

22. Yvma foka ma achvfa hosh nan-isht ahullo okpulo ai i foka hosh lva, micha ik anumpolo aiena ho isht im vla tok: yohmi ma yummak ash o hlakofichi na lva micha ik anumpolo aiena tuk vt anumpuli, micha pisa aiena tok.

23. Mihma okla hvt momvt nukhlakancha mvt, Ilvppvt Lewi ushi ash keyu ho? achi tok.

24. Yohmi kia Falisi vhleha hvt haklo mvt, Hatak ilvppvt nan-isht-ahullo okpulo a kocha weli ho keyu, amba nan-isht-ahullo okpulo i miko Beelsebub ak o ishit kohchi hoke, achi tok.

25. Mihma okla im anukfila ha Chisvs vt akostinichi hatuk osh, Apehlichika puta kv it a kashapvt ilap bika it i sanali hokvt, ont ai okpulo kv taha chatuk: anonti tvmaha chito, keyukmvt chuka puta kv it a kashapvt ilap bika it i sanali hokvt, talaia he keyu hoke.

26. Yohmi hoka Setan osh Setan a kohchi hokmvt, ilap o inli il i sanali hoke; yohmi ka katiohmi hosh im apehlichika yvt talaia hinla cho?

27. Micha vno vt Beelsebub ak o nan-isht-ahullo okpulo a ishit kocha weli li hokma, kvta hak o hvchim vlla vt yvmma ishit kocha weli chatuk oh cho? yohmi hoka yvmmak osh na hvchim apesa yashke.

28. Amba vno yvt nan-isht-ahullo okpulo a Chihowa imi Shilombish o ishit kocha weli li hokma, yohmi hokmvno Chihowa apehlichika yvt hvchim vla mak oke.

29. Keyukmvt katiohmi hosh achvfa kvv hatak hlampko in chuka ya ont chukowa cha, im ilayak a wehpula hinla? hatak hlampko ak o tikba takehi ha yo keyukmvt; amba yvmmak okmvto in chuka ya wehpula hinla hoke.

30. Kvna hosh vno a svbafohka keyu kvv, a sanali hoke; mikma kvna hosh svba hoyo keyukmvt, na fimmi yoke.

31. Yohmi hoka, Hatak vt nan im ai ashvchika il aiyuka moma, micha Chihowa ik ahobalot anumpuli moma kvv i kashofa he; amba Shilombish Holitopa yo ik ahobalot anumpuli tuk okvto hatak vt ik i kashofa ka hi oke.

32. Micha kvna hosh Hatak Ushi ak o na miha-chit anumpuli tuk okvto i kashofa he: amba Shilombish Holitopa ak o na mihachit anumpuli tuk okvto yakni ilvppak inli, micha yakni inla mihinti aiena ka ai i kashofa he keyu hoke.

33. Iti vt achukma ho hvsh ikbi hokma, vni ak kia achukma he: keyukmvt iti vt okpulo yo hvsh ikbi hokma, vni ak kia okpula he: iti vt ilap vni ak inli ho isht otvni chatuk oka.

34. Sinti chilita isht-ai-unchuli hvchia ma! ai vlvpiesa keyu hvchia kvv, katiohmi hosh nana achukma puta ka hvsh anumpula hinla cho? chukvsh a alotowak mak o, itih hvv kochehit miha chatuk oka.

35. Chukvsh anukaka ya na holitopa kvv asha kak o, hatak achukma kvv nana achukma puta ka a yvmohmi chatuk: mikma chukvsh anukaka ya nana ik achukmo kvv asha kak o, hatak ik vlvpeso kvv nana ik achukmo puta ka a yvmohmi chatuk oke.

36. Yohmi kia anumpa ik vllhpeso puta hatak vt anumpuli tuk okmvt, nan vllhpisa nitak okvno yvm-mak atuk a nan isht il anola hi oke, hvchim achi lishke.

37. Chishno chim anumpa atuk ak o ishit chi hlakofa he : mikmvt chishno chim anumpa atuk ak o nan isht chi palvmma hi oke.

30. Falasi vhleha hvv Kilaist a nan-isht-atokowa im a hoyo.

38. Yvmma foka ma na holissochi vhleha kanioh-mi, micha Falisi vhleha aiena kvv anumpuli mvt, Nan ithvnanchi ma ! nan-isht-atokowa e chi yopisa hin-lvshke, achi tok.

39. Yohmi kia afalaminchi mvt, Nan ik vllhpieso, micha haui aiena okla hash osh nan-isht atokwa ya okla hoyo : yohmi kia nan-isht-atokowa nana hosh in takala he keyu, amba hopaii Chonas nan-isht-im-atokowa ak illa hi oke.

40. Chonas vt nitak tuchina micha ninak tuchina aiena hvvni chito ikfoka anykaka ya foka tok a ; yvmmak inli hvv chomit Hatak Ushi vt nitak tuchina micha ninak tuchina aiena hvv yakni chukvsh anykaka yatuk ma foyuka hi oke.

41. Nana vllhpisa nitak okvno Ninefeh hatak vt okla ilvppa ai apihvv hieli cha, anumpa onocha hi oke ; yvmmak okvt Chonas vt vbanumpa isht anumpohonli ma, okla ilekostininchi tok okvt ; atuk o Chonas a imaiya mak osh ilvppa ahantvshke.

42. Nana vllhpisa nitak okvno oka mahli ohoyo miko vt okla ilvppa awant hikia cha, anumpa onocha hi oke : yvmmak okvt yakni ont ai vlli pilla minti kvv Solomon isht im a hopoyuksaka ya haklot aya tok okvt : yohmi tok o himak a Solomon a imaiya mak osh ilvppa ahantvshke.

43. Shilombish okpulo yvt hatak a akohchakmvt, afoha he hoyo kvv oka ik ai iksho puta ka hlopullit aya kia, ik ahayucho chatuk ;

44. Yohmikmvt, An chuka ai vttv kohchvv a minti li kash osh falamvt ia lashke ; achi tuk osh onakmvt, yvmmak ash kvna iksho hvv, pashpovt, shemvt taiyaha cha hikia hvv, ont pisa hoke.

45. Yohmikmvt shilombish okpulo untuklo inla yvt ilap a i shahli hō ivt ont pehlichit vla ma, yvm-mak ash okla pit abeha cha ai asha chatuk; yohmik-ma hatak yvmmvt ont ishtaiyopi kak o okpulo kvv vmmona tuk a i shahli chatuk oke. Yohmi ka yvm-mak inli hō okla nan ik vlhpeso ilvppvt chiyuhma chi hoke.

31. Kvna hosh Kilaist a i kanomi hoka isht annoa.

46. Okla hā im anumpuli kvv moma hō, ishki mi-cha itibapishi vhlēha aiena kvv it im anumpuli bvna hosh kocha yā hinli tok.

47. Yohmi ma achvvt, Yake! chishki micha ish itibapishi vlēha aiena kvv chit im anumpuli bvna hosh kocha yā hiohmāyvshke, im achi tok.

48. Yohmi kia afalaminchi mvt, nan im anoli yash o, Hvshki ak osh kvta hō? mikma itibapishi li vhlēha ak osh kvta hoh cho? im achi tok.

49. Mihmvt nan im aiithvna vhlēha aiaska ka imma yō ibbak a pit weli mvt, Hvshki, micha itibapishi li vhlēha aiena ka pisá;

50. Kvna hosh Aki vba binili nan aiahni ka yvmohmikmvt, yvmmak osh itibapishi li, micha an tek, mikmvt hvshki aiena mak oke, achi tok.

CHAPTA XIII.

32. Nā hokchi nan isht vlhpisa; mikma nana a kaniohmi kak o Chisvs vt nan isht vlhpisa hō isht ithvnanchi.

1. Mihmvt Chisvs vt nitak yvmmak inli ka aboha yā a kochevt ia mvt, okhvta lapalika yō ont binili tok.

2. Yohmi ma okla laua fehna kvv ant im ai ita-hoba, yohmi ma peni yō pit chukowa cha binili tok; mihma okla laua yash osh momvt oka vhli hā hiohmāya tok.

3. Mihma nana laua ka nan isht apesa hosh isht im anumpohonli mvt, Inta! na hokchi vt na hokchit ia tok.

4. Atuk osh hokchi ma, na nihi kanimi kv̄t hina lapalika yō kaha tok; atnk o hushi puta kv̄t ant v̄pvt tahli tok.

5. Kanimi kv̄t tv̄li foka yakni āsha fehna keyu hō kaha tok; atuk osh yakni vt i suko keyu hatuk okvt, chekosi fehna offo tok;

6. Atuk o hv̄shi vt kohcha ma, anakshua tok; yohmi kv̄t hakshish vt ik im iksho hatuk okvt, bv̄shit taha tok.

7. Yohmi ma kanimi kv̄t kv̄ti foka yō kaha tok; atuk o kv̄ti vt offo mvt, olv̄bbit ishi tok.

8. Amba inla ka yvt o yakni achukma hō kaha: yohmi tuk mvt achv̄fa tuk kia kanimi kv̄t tahlepa achv̄fa; kanimi kv̄t pokoli hanali; kanimi kv̄t pokoli tuchina aiena hō v̄nit waya tok oke.

9. Kv̄na hosh ishit haponakla he haksobish vt i hinlikmvt, haklashke, achi tok.

10. Mihma nan im ai ithv̄na v̄hleha hv̄t im ai ona mvt, Nanta katiohmi hō nan isht v̄lh̄pisa hō isht ish im anumpuli cho? im achi tok.

11. Mihma afalaminci mvt, Hv̄chishno yokv̄to nan ik otano v̄ba apehlichika ahalaya puta ka hv̄sh ithana hi okvt hv̄chim v̄lh̄pisa hv̄t tok; amba yvm-mak okv̄to im v̄lh̄pisa keyu hoka.

12. Kv̄na hosh ishikma, mihi yō ima he; mikma in laua kv̄t i shahla hi oke: amba kv̄na hosh īshi keyuk mv̄no, īshi tuk ash kia im ai isha he oka.

13. Okla pih̄sa hokak osh, pisa keyu; mikmvt hah̄klo hokak osh, haklo keyu; micha akostininchi keyu aiena hatuk; yohmi kak o nan isht v̄lh̄pisa hō isht im anumpuli li hoke.

14. Mihma Esaias vt nana tikbanli anoli kv̄t, Hah̄klo hokv̄no hv̄sh haklo kia, hv̄ch ik akostinincho ka he; mikmvt pih̄sa hokv̄no hv̄sh pisa kia, hv̄ch ik ithano ka he.

15. Okla ilv̄ppa chukv̄sh atuk mvt nīvt taiyaha, mihma haksobish ā isht haponah̄klo kv̄t in takobi mvt, nishkin atuk ma okla okhishtv̄shke; yvmmak keyukmvt nitak kanih̄mi kia nishkin atuk ma ishit

pisvt, haksobish a ishit haklo cha, chukvsh ma ishit akostininchi ilekostininchi na hlakofichi la hinla kak o, yohmi achi tok a okla ilvppak o ont isht aiahli hoke.

16. Amba hvchi nishkin okvto pisa; mikma hvchi haksobish atuk mvt haklo aiena hokvt na yukpvshke.

17. Ahli mak o hvchi miha lishke, Hopaii yvt lawa, micha hatak hochukma aiena kvv nana hvsh pisa ka pisa bvna tok kia, okla ik peso tok; micha nana hvsh haklo ka haklo bvna tok kia, ik haklo tok oke, achi tok.

33. Na hokchi nan isht vlvhvisa ho otvnihi.

18. Yohmi hoka na hokchi isht vlvhvisa hatuk ma hvsh haklashke.

19. Kva kia apeshlichika isht anumpa ha haklo cha, ik akostinincho, yohmik ma nan okpulo yosh vlv, chukvsh anukaka nana im a holokchi tuk ash yichiffit ishit kanchi chatuk. Ilvppak osh hina lapalika yo na nihi ai ishi tok mak oke.

20. Amba tvli foka yo na nihi ai ishi tok okvto vba anumpa ha haklo mvt, na yukpvt ashalika ishi kak oke.

21. Yohmi kia hakshish vt im a toba keyu hatuk osh, imoma na hopaki keyu chatuk; vba anumpa pulla hatuk mak o isht issikkopali, micha isht hofah-yali aienakma, chekosi mak inli ho ibetvbli chatuk.

22. Mikma kvvti foka yo na nihi ai ishi kak kia vbanumpa ha haklo kak oke; yohmi tuk o yakni ilvppak inli nana ai anushkunna, micha nan in laua bvna kvv isht ashvchi aiena kvv vbanumpa hatuk ma ai olvbbit ishi na ik vno toba kak oke.

23. Amba yakni achukma yo na nihi ai ishi vto vbanumpa ha haklo mvt, akostininchi kak oke: micha yvmmak ash osh vnikmvt, achvfa tuk kia kanimi kvv tahlepa achvfa, kanimi kvv pokoli hanali, kanimi kvv pokoli tuchina, yohmi hosh ishit waya hoke, achi tok.

34. Onush micha haiyukpulo ita tuklo ka isht vlhpisa.

24. Mihmvt nan-isht vlhpisa inla yo in takalechit yak ahanchi mvt, Uba apehlichika ka yvt hatak osh im osapa ya na nihi achukma ho hokchi tok a holba hoke.

25. Yohmi tuk kia hatak puta kvt nusi hosh maya takla ma, in tvnvp vt vla cha, onush ash haiyukpulo yo ant a hokchichi cha, knia tok.

26. Yohmi tuk o offot vpi toba cha, waya ma, haiyukpulo ak kia otvni tok.

27. Yohmi ma chuka-chvfa pehlichika in tishu vhleha hash osh ona cha, Pi shahli ma! na nihi achukma yo chim osapa ya ish a hokchi tok keyu ho? katiohmi ho anonti haiyukpulo vt asha cho? im achi tok.

28. Mihma, Tvnpv osh ilvppa yvmihechi tok, im achi ma; tishu vhleha hash osh, Yohmi ka ivt yvm-mak atuk ma ont aiovt il itahoba hi a, ish ahni cho? im achi tok.

29. Yohmi kia yvmmak ash osh, Keyu; yvmmak keyukma haiyukpulo a aiovt hvsh itahobi takla kvt, onush a aieninchit hvsh lobba hinla hoke.

30. Itapihvt hiohmayvt avsha onashke: atuk o avsha onak mak o na-bvshli vhleha ha, Haiyukpulo ak o tikba aiovt itahobit hvsh sitohli cha, hvsh huk-mashke; yohmikmvt onush ak okvno a kanchak ak o pit hvsh ai itahobashke, im achi lashke, achi tok.

35. Mvstvt nihi, micha nan isht shatvmmichi ita tuklo ka nan isht vlhpisa ka: micha na kaniohmi ho Chisvs vt nan isht vlhpisa bano ho isht anumpohonli.

31. Nan-isht vlhpisa inla yo in takalichika mvt, Uba apehlichika yvt mvstvt nihi achvfa ho hatak vt ishi cha, im osapa ya hokchi tok o holba;

32. Yvmmak okvt iskitini kvt na nihi moma ka ik lauwo ho mvhli; yohmi kia offot hofantikmvt, haiyukpulo puta ka moma imaiya cha, iti o toba; yohmi na vba hushi puta kvt naksish atuk ma ant a binohli chatuk oke, achi tok.

33. Anonti nan isht vllhpisa inla yō isht im anum-puli mvt, Uba apehlichika yvt pvska shatvmmichi yō ohoyo hvt ishi cha, tanchi pushi vllhpisa tuchina hō ibafohki tuk o, momvt shatvmmi tuk o, holba hoke, achi tok.

34. Ilvppa puta ka nan isht vllhpisa bano hō Chisvs vt okla laua yatuk ma isht im anumpohonli tok.

35. Hopaii vt anumpuli mvt, Nan-isht vllhpisa hō svtih hā isht anumpohonli lashke; yakni toba tok taiyakla ka nā luma āsha chatuk puta ka anohonli lashke, achi tok ā ont aiahli chi ka, nan-isht vllhpisa hō keyukma im anumpuli tok keyushke.

36. Onush micha haiyukpulo ita tuklo nan-isht vllhpisa hō otvnihi.

36. Yohmi mvt Chisvs vt okla laua yā kanompit tihleli mvt, aboha ont chukowa tok; mihma nan im ai ithvna vhleha hvt im ai ona mvt, Haiyukplo osapa anuka āsha tok nan-isht vllhpisa ka achukmalit ish pim anolashke.

37. Mihma afalaminchi mvt, Na nihi achukma yō hokchi kvt Hatak Ushi ak oke.

38. Osapa vt yakni moma kak oke: nihi achukma yvt vba apehlichika im vlla ak oke; amba haiyukpulo vto nan okpulo im vlla ak oke.

39. Tvrvp vt yvmma hokchi tok vt Setan ak oke: avsha ona kvt yakni ont im ishtaiyopi kak a he; mikma nā bvshli vhleha hvt enchil vhleha ak oke.

40. Yohmi ka haiyukpulo yvt itahoba cha, luak ishit hollokmi chatuk ā, yakni ilvppvt ont im ishtaiyopik-mvt, yvmmak inli hō chiyuhma hi oke.

41. Hatak Ushi vt im enchil vhleha hā atohonokma, nā yoshubi, micha nan ik vllhpeso yohmi vhleha aiena ka mominchit im apehlichika atuk ma ai ishit kocha wela he;

42. Mikmvt yvmmak atuk ma tvli a bila luak chinto hō pit ai ashacha he: yohmikma yaiya micha noti ahampa aiena hosh yvmmak oka aiasha hi oke.

43. Yohmikma hopoyuksa vhleha hokvt shohpa-kali kv̄t, hvshi ak o chiyuhmi hosh Iki im apehlichika atuk ma aiasha hi oke. Kv̄na hosh ishit haponakla he haksobish vt i hinlikmvt, haklashke.

37. Na holitopa luma kv̄t ituyula, micha nan chumpa, mikmvt nv̄ni isht hokli aiena ka nan isht v̄lpisa.

44. Anonti, Uba apehlichika yvt n̄ holitompa luma hosh osapa anuka itonla tuk o; hatak vt yvm-mak ash o ahayuchi cha, luhmi mvt, n̄ yukpa fehna hatuk osh ia mvt, nana im āsha tuk vt mominchit kanchi cha, osapa yvmmak ash o chumpa kak o chohmi hoke.

45, 46. Anonti, Uba apehlichika yvt hatak nan chumpa yosh tv̄li holitompa hochukma hoyot ahanta; yohmi tuk osh tv̄li holitompa achv̄fa kv̄t v̄lhtoba chinto ahayuchi mvt, ivt nana im āsha tuk vt mominchit ont kanchi cha, chumpa kak o chohmi hoke.

47. Anonti, Uba apehlichika yvt nv̄ni-isht hokli yo okhv̄ta okv̄chi n̄ ilaiyuka puta pehli;

48. Atuk o alota ma, okla halv̄llit oka v̄hli isht ona mvt, aka binohli cha, hochukma ka aiort nan-aīvlbeha pit apitta mvt, amba okpulo yv̄no kampila kak o chomi hoke.

45. Yakni vt ont im ishtaiyopikma yvmmak inli h̄o chiyuhma he; enchil vhleha hv̄t kohchvt ayakmvt, hatak haksi uhleha hv̄t hopoyuksa vhleha h̄a ibv̄lhto tuk ā filamohliche he:

50. Mikmvt yvmmak ash o tv̄li a bila luak chito ka pit ito-ashacha he; yohmikma yah̄aya, micha noti ahampa aiena hosh yvmmak oka aiasha hi oke, im achi tok.

51. Mihmvt Chisvs ash osh, Iv̄ppa puta ka mominchit hv̄sh akostininchi cho? im achi ma, Yau, Chitokaka ma! okla im achi tok.

52. Yohmi ma, N̄a holissochi aiyuka vba apehlichika isht im v̄lv̄chi kv̄t, hatak chuka-chv̄fa pehlich̄i yosh nan im aiasha ya nana kv̄t himona, micha hopaki aiena h̄o ai ishit kohchi ka chomi hoke, im achi tok.

38. Chisvs vt falamvt i yakni ak inli ho ona tuk o, okla hvt kanimachi.

53. Atuk o yakohmi tok; Chisvs vt nan isht vhl-pisa ilvppa puta ka ont taiyali mvt, kohchvt ia tok.

54. Atuk osh ilap i yakni ak inli ka vla mvt, i sinakak a nan ai im abahanchi; yohmi ma okla nuk-hlakancha mvt, Hatak ilvppvt nan ithana, micha na fehna aiena ka yvmihchi kv, katimak o ai im vlhtaha tok oh cho?

55. Ilvppvt chuka ikbi ya ushi keyu? ishki vt Meli hohchifo keyu? mikma itibapishi vhleha mvt Chemis, micha Choses, mikmvt Saimon micha; Chutas aiena kak keyu?

56. Mihma in tek vhleha hvt momvt hvpi takla maya keyu? Yohmi ka hatak ilvppvt katimak o nan ilvppa moma ka ai im vlhtaha tok oh cho? achi tok.

57. Mihmvt yvmmak ash o okla isht ai ibetvbli tok. Yohmi kia Chisvs vt, Hopaii vt ik holitopo heyu hosh ahanta kia, ilap i yakni ak inli, micha ilap in chuka kak illa hoh chatuk oke, im achi tok.

58. Yohmi mvt okla nan ik i yimmo hatuk mak o yvmmak atuk ma na fehna ka lauachit a yvmihchi tok keyushke.

C H A P T A X I V .

39. Chani Baptist vt nan ai ahli fehna hatuk osh Helot a nan i miha hosh aboha kvllo pit fohka, micha noshkobo tupa tok.

1. Yohmi ma nitak yvmma foka ma, miko Helot vt Chisvs vt annohowa ka, haklo tok.

2. Mihmvt in tishu vhleha hash o, Ilvppvt Chani Baptist mak oke; illi tuk vt falamvt tanishke: yohmi hatuk o na fehna puta kv yvmmak atuk ma a isht il otvnihinichishke, im achi tok.

3. Helot vt itibapishi Filip a tekchi Helotias ak atuk pulla mak o, Chani a hoklit, ishit takchi cha, aboha kullo ya fohki tok vt tok.

4. Chani vt, Yummak oka ish itauwaya he chim vlhpesa keyushke, im achi hatuk o.

5. Yohmi kak o yumma vbi bunna kia, okla laua yak o i nukshopa tok: yummak oka hopaii, okla ahni hatuk oka.

6. Yohmi tuk kia Helot vt ai vttta tok nitak a holi-toblit maya ma, Helotias ushetik vt itikba ya a hihla ma, Helot vt yukpa tok.

7. Yohmi kak osh anumpa kullo isht ai il onochi hosh nana ho asilhha hokma, ima hi vt miha tok.

8. Mihma ishki vt tikbanli i miha hatuk oka, Chani Baptist noshkobo vt amphvta chito fohka ho, ilvppak fehna ant is si ai vmashke, achi tok.

9. Mihma miko vt nukhaklo tok; yohmi nana kia anumpa kullo atuk pulla, micha okla ibai-impvt maya tuk aiena hatuk mak o, yummak atuk ma ima hi a apesa tok.

10. Micha pit atohno na aboha kullo anukaka yak o Chani noshkobo ya a tvbli tok.

11. Mihma yumma noshkobo hvvt amphvta chito yo fohka ho isht vla cha, ohoyo himita yash ima tok; mihma yummak ash osh ishki a isht im ona tok.

12. Yohmi ma nan im ai ithvna vhleha hvvt hak-nip a ont ishi cha, hohpi mvt, ivt Chisvs a ont im anoli tok.

40. Chisvs vt pvska lumbo tahlapi, micha nvni tuklo aiena ho hatak tahlepa sipokni tahlapi ho ipeta tok.

13. Chisvs ash osh haklo mvt, nan im ai ithvna vhleha bano ho ai itapihvvt yumma vttvt ia kvvt, peni vlhtot yakni haiaka yo ilhkoli tok; atuk o okla hvvt yummak ash haklo mvt, aka itvnowa hosh tumaha puta ka ashvt okla pit iakaiya tok.

14. Atuk o Chisvs vt kohcha cha, okla laua ya pisa mvt, i nukhaklo fehna cha, abeka im asha tuk a hlakofichi tok.

15. Atuk o opivt taha ma, nan im ai ithvna vhleha hash osh im ai vla mvt, Ilvppak okvt yakni haiaka yoke; mikma himak a shoba hosit tahvshke; okla laua ya pit ish tihleli na tvmahushi taloha ka ilhpak vpa chi kvt okla a chumpvshke, achi tok.

16. Yohmi kia Chisvs ash osh, Okla ik aiyo mak kia, impa chi ka hvsh ipetashke.

17. Yohmi ma, Pvska tahlapi, micha nvni tuklo aiena illa hosh ilvppa pim ashvshke, okla im achi tok.

18. Mihma, Ilvppak o isht oh vm vlá, achi tok.

19. Mihmvt okla laua yvt aka hvshuk ai om binohla hi a apesa tok; mihmvt pvska tahlapi cha nvni tuklo aiena kash o ishi cha, vba pit vba-chakali mvt, ai okpvchi cha tushahlichit, pvska yash o nan im ai ithvna vhleha ha ima na nan im ai ithvna vhleha hash osh okla laua ya pit ipeta tok.

20. Mihma okla momvt impvt kaiya tok; mihma boshulli atampvt asha ka kishi alota auah-tuklo ho okla ishi tok.

21. Yohmi ka okla impa tuk vt, ohoyo vlla aiena kvto asha ho, hatak tahlepa sipokni tahlapi foka tok.

41. Chisvs vt vba pit anumpula chi hosh nvni chaha pit oiya tok; atuk osh ninak a mahli fehna ma okhvta paknaka a nowvt nan im ai ithvna vhleha ha im ia tok; micha Pita yvt oka kvnia he tvk a okchalinchí.

22. Yohmi ma mih mak inli ho Chisvs vt ilapvt okla laua ya tishelichi taklakma, nan im ai ithvna vhleha hvrt peni pit abeha cha, tikba misha tvnnvp a ilhkola chi ka i miha tok.

23. Micha okla laua yash tishelichit tahli mvt, vba pit anumpula chi hosh ilap illvt nvni chaha yo pit oiya tok: atuk osh opivt taha ma ilap bano hosh yvm-ma anta tok.

24. Amba peni vto okhvta iklvnna ya, mahli ak osh a sanali hatuk o, oka banvtha ka takakanlit aya tok.

25. Atuk o ninak isht vlvhpsa ont isht ai ushtak fehna, Chisvs vt okhvta ha a nowvt ayvt im ona tok.

26. Mihma okhvta a nohqwtvut aya na nan im ai ithvna vhleha hvv pit pisvt, komunta mvt, Shilup oke, achi tok; mihmvt nukshopa cha tahpvla tok.

27. Yohmi kia Chisvs ash osh ashalinka pit im anumpulit, Hvchi nuktanla achukmashke; vno ash sia hoke; ik hvchi nukshopo kashke, achi tok.

28. Mihma Pita yvt afalaminchi mvt, Chitokaka ma! chishno ash chia hokmvt, oka ya a nowvt mayvt chim ona la hi a is sa mihashke, im achi tok.

29. Mihma, Minti, achi tok. Yohmi ma Pita yvt peni ash pit akowa mvt, oka ya a nowvt Chisvs a im ia tok.

30. Yohmi tuk kia mahli hvv kullo fehna ho pisa mvt, nukshopa tok; micha oka kvnivt ishtia mvt, tahpvvt, Chitokaka ma! si okchalinchí, achi tok.

31. Yohmi ma Chisvs vt ashalika ibbak a pit welit halvlli mvt, Na yimmi fehna keyu chia ma! nanta katiohmi ho chi anuktuklo tuk oh cho? im achi tok.

32. Atuk o peni a ant vlhto ma, mahli hvv yokopa tok.

33. Yohmi ma peni anukaka maya tuk ash osh yvmmak oka ant aiokpahanchi mvt, Chishno ak osh Chihowa Ushi a chia ho muhlshke, achi tok.

42. Chisvs vt Kenesalet ona mvt, abeka puta tuk a hlakofichi.

34. Atuk o yvmmak ash o hlopulli mvt, Kenesalet yakni o okla ona tok.

35. Yohmi ma hatak yvmma asha tuk vt yvmmak ash o akostininchi mvt, inla tohnot yakni yvmma fullota ka mominchit pit tihleli na abeka yatuk vt momvt ai im ona tok.

36. Mihma im ilefoka a poshokvchi ak illa kia okla potola hinla ka im asilhha tok; yohmi ma laua kvv kanihmi hosh potoli tuk okvt hlakofi aiahli tok.

CHAPTER XV.

43. Chisvs vt na holissochi vhleha micha Falisi vhleha aiena kv̄t anumpa kochanli i nan v̄lhpisa puta kak o ahninchi kv̄t, Chihowa i nan v̄lhpisa puta ka i shahlechi ka nan i miha tok. Micha nana puta nana hosh hatak a okpaiyani kv̄t asha ka anoli.

1. Yvmohmi ma na holissochi vhleha, micha Falisi vhleha aiena kv̄t, Chilusalem minti hosh Chisvs a im ai v̄la mvt,

2. Nanta katiohmi ho na chim ai ithvna vhleha hv̄t hatak tikba vhleha anumpa kochanli isht i nana v̄lhpisa hv̄t tok a kobvffi cho? okla ibbechifa keyu hosh pvska v̄pa kv̄t, achi tok,

3. Yohmi kia yvmmak ash osh afalaminchi mvt, Nanta katiohmi ho hv̄chishno mvt, Chihowa i nan v̄lhpisa ya anumpa kochanli chi nana v̄lhpisa ka ishit hv̄sh kobvffi cho?

4. Chihowa yvt apihisa kv̄t, Chiki micha chishki aiena ka ish holitoblashke; yohmikma, Kv̄na hosh iki okmá, keyukmvt ishki okmá, nana ho na mihachikmvt, illi mak o illashke, achi tok oka.

5. Amba hv̄chishno vt, Kv̄na kia iki, keyukmvt ishki okma nana kash o vm isht ish ai yukpa he tuk a, Uba-isht aiokpv̄chi oke, im achi: yohmi cha iki okmá, ishki okmá, nana ka ik holitoblo kia nan ik i kanihmo ka hi oke, hv̄sh achi.

6. Yohmi hosh Chihowa i nana v̄lhpisa ya anumpa kochanli chi nana v̄lhpisa ya ishit hv̄sh ai okpv̄nichishke.

7. Nan-ilahobi hv̄chia ma! Esais vt tikbanli nan isht hv̄chi anohonli hosh,

8. Okla ilv̄ppvt itih hokv̄ho a bilikasi isht v̄la mvt, itiv̄lbi ma ishit si holitoblishke; yohmi kia chukv̄sh okv̄to auet a hopakishke.

9. Nana av̄chi kv̄t hatak i nana v̄lhpisa yo ithananchi hokv̄t, nana v̄lhpesa hi o keyu ho okla si aiokpahanchishke, achi tok, im achi tok.

10. Yohmi mvt okla laua yash o itahobi cha, Haklot, hvsh ithaiyanashke;

11. Nana kv̄t itih h̄a pit chukowa kak osh hatak a okp̄vni h̄o keyu: amba nana hv̄t itih h̄a a kohcha, ilv̄ppak osh hatak a okp̄vni hoke, im achi tok.

12. Yohmi ma nan im aiithv̄na v̄hleha hash osh im ai ona cha, Falisi v̄hleha hv̄t anumpa ilv̄ppa haklot issa mvt, ik im v̄lhpieso tuk a ish akostininchi cho? achi tok.

13. Yohmi kia yv̄mmak ash osh afalaminchi mvt, N̄a holokchi moma kv̄t Aki v̄ba binili hosh hokchi tok keyu hokv̄no, tehvt taha hi oke.

14. Ant ik m̄aya, lv̄pa yosh lv̄pa pehlichī okla hoke: yohmi ka lv̄pa yosh lv̄pa ȳa ilauei kv̄t tuklot yakni kula ȳa pit kaha hi bano hoke, achi tok.

15. Yohmi ma Pita yv̄t afalaminchi mvt, Nan isht v̄lh̄pisa ilv̄ppa achukmalit pim anoli, achi tok.

16. Mihma Chisv̄s ash osh, Hv̄chishno ak kia nana ik akostinincho kv̄t hv̄chī moma hatō?

17. Nana kv̄t itih h̄a fohka cha ia kv̄t takoba ȳa ont fohka tuk osh, anonti ont kohcha chatuk a, hv̄ch ik akostinincho moma cho?

18. Amba nana puta kv̄t itih h̄a akohcha hokv̄to chukv̄sh ak o a minti; micha yv̄mmak osh hatak a okp̄vni chatuk oke.

19. Chukv̄sh ak o im anukfila okpulo puta, hatak b̄ika v̄bi, haui toba, ohoyo ik im iksho micha hatak ik im iksho it i lum̄aka puta, hukopa, anumpa ik āhlo isht atokoli, Chihowa ik ahobalot anumpuli puta kv̄t a toba hoka.

20. Ilv̄ppa puta kak osh hatak a okp̄vni hoke; amba ibbak ik ahchifo ȳo isht impa hokv̄no hatak a okp̄vni keyu hoke, achi tok.

44. Chisv̄s vt Kenan ohoyo h̄o v̄shetik in hlakofichi.

21. Yohmi ma Chisv̄s vt yv̄mmak ash v̄ttv̄t ia mvt, Taiah micha Saiton aiena yakni i kaniohmi h̄o ona tok.

22. Mihma Kenan ohoyo hosh yv̄mmak inli h̄o v̄ttv̄t āya tuk vt v̄la cha in tahpula mvt, Chitokaka

Lewi ushi chia ma ! is sa nukhaklashke ; suso-tek vt nan-isht-ahullo okpulo ai i foka ishit issikkopa fehna hoke, achi tok.

23. Yohmi kia ilap vt anumpa achvfa kia isht ik im afalamincho ki tok. Yohmi ma nan im aiithvna vhleha hash osh ona cha, Tabpvlvt hvpiakaiya ka, kanompit ish chvffichashke, achit im asilhha tok.

24. Yohmi kia yvmmak ash osh afalaminchi mvt, Inla yokvno im aya li hvrt tok keyu ; amba chukfvlh-poba tvmoa Israel in chuka-chvfa ak vt tok oke, achi tok.

25. Yohmi ma ohoyo hash osh mintit ant aiokpvtchi mvt, Chitokaka ma ! si apehlvchi, achi tok.

26. Yohmi kia afalaminchi mvt, Ulla im pvska ya ishi cha, ofi puta ka pit ipeta he vllhpesa keyu hoke, achi tok.

27. Mihma yvmmak ash osh, Ahlishke, Chitokaka ma ! yohmi kia ofi puta kvrt boshulli osh im pushnayo im ai-impva a chilofa kvno vpa hoke, achi tok.

28. Yohmi ma Chisvs vt afalaminchi mvt, Ohoyo ma ! na chi yimmi kvrt chintoshke ; chishno ish ai ahni tuk fehna mak o chim ai yvmohmashke, im achi tok. Mihma hvshi kanvlli vllhpisa yvmmak fehna ho ushetik atuk vt hlakofi tok.

45. Chisvs vt okla laua kvrt im ona na hlakofihinchi tok ; micha pvska lumbo untuklo, micha nvni chipunta kano-mosi aiena ho hatak tahlepa sipokni ushta ka ipeta.

29. Yohmi ma Chisvs vt yvmmak ash vttvt ia mvt, Kalili okhvta bilika yo ona tok ; mikmvt nvni chaha yo pit oiya cha, yvmmak o binili tok.

30. Mihma okla chinto fehna kvrt hanali okpulo, ik hoponayo, ik anumpolo, imomokpulo puta, mikmvt inla mvt laua ho il ai ishit im ai ona mvt, Chisvs iyi ituma ya ont ashachi tok ; mihma yvmmak ash o hlakofichi tok.

31. Yohmi na okla laua kvrt, ik anumpolo atuk vt anumpuli, imomokpulo atuk vt hlakofi, hanali okpulo atuk vt nowa, ik hoponayo atuk vt pisa aiena ho okla pisa mvt, nukhlakanha tok ; micha Israel in Chihowa ak o okla aiokpahanchi tok.

32. Yohmi ma Chisvs vt nan im ai ithvna vhleha hash o hoyo cha, Okla laua si apehvt maya na himak nitak tuchina ka nana vpa hi vt ik im iksho hatuk o, i sa nukhakloshke; yohmi hatuk osh nan ik po moma hokvno tishelichi la he keyu, yvmmak keyukma takla ya okla tikamba hinla hoka, im achi tok.

33. Mihma nan im ai ithvna vhleha hash osh, Yakni haiaka ya katimak o pvska laua ka il ahayuchi na okla chinto yohmi fehna kvv kaiya hinla cho? im achi tok.

34. Mihma Chisvs ash osh, Pvska yvt katohmi ho hvsh ishi ho? im achi tok. Mihma, Untuklo, micha nuni chipunta kanomosi ho aienvshke, im achi tok.

35. Yohmi ma okla laua yvt aka binohla hi a apesa tok.

36. Mihmvt pvska untuklo micha nuni aiena kash o ishi cha, vba isht aiokpvchi mvt, tushtoli cha, nan im ai ithvna vhleha ha ima na nan im ai ithvna vhleha hash osh okia laua ya ipeta tok.

37. Mihma momvt okla impvt, kaiya tok: mihma boshulli atampvt asha ka kishi alota untuklo ho okla ishi tok.

38. Mihma okla impa tnk vt, ohoyo vlla aiena hokvto asha ho, hatak tahlepa sipokni ushta tok.

39. Mihma okla laua yash o tishelichi mvt, peni fohka cha, ivt Maktala yakni a ona tok.



CHAPTA XVI.

46. Falisi vhleha hvt, Chisvs vt nan isht atokowa ya vba ya ai im otvnicha hi a ahni tok: micha nan im ai ithvna vhleha hvt, Falisi vhleha hvt nana ithvnanchi ka i nuktahtvt ahah ahna he i miha tok.

1. Falisi vhleha micha Satusi okla aiena kvv ai vla cha, yvmmak ash o imomaka pisa hosh nan isht atokowa ya vba ya auet ai im otvnicha hinla ka, im ahni tok.

2. Mihma afalamинchi mvt, Opiaka yokma, Shutik vt humma hoka, kocha yvt achukma chishke, hvsh achi.

3. Mikmvt onnahninli yokma, Shutik vt humma cha hoshontichi fehna hokvt, kocha yvt okpula chishke, hvsh achi. Nan ilahobi hvchia ma! shutik pisa yosh kaniohmi hokvno hvsh akostininchi kvt, anonti himak nitak isht ai vhpisa kvno hvch ik akostinincho ka hinla cho?

4. Hatak haksi micha haui aiena okla ash osh nan-isht atokowa ya pisa ka ahnishke: yohmi kia nan-isht atokowa nana hosh im otvna he keyu; amba hopaii Chonas a nan-isht im atokowa kak illa hi oke, im achi tok. Mihmvt yvmmak ash o issvt ia tok.

5. Atuk o nan im ai ithvna vhleha hvvt misha in tvnnvp a ona mvt, pvska okla isha he tuk vt imi-haksi tuk vt tok.

6. Yohmi ma Chisvs ash osh, Falisi vhleha micha Satusi vhleha aiena im pvska isht-shatvmmi ya i nuk-tahlvt ahah! hvsh aiahnashke, im achi tok.

7. Yohmi ma yvmmak ash osh, Pvska kil esho kak oka, achit ilap bika it im anumpulit maya tok.

8. Mihma Chisvs vt yvmmak ash o akostininchi mvt, Na yimmi fehna keyu hvchia ma! na katihmi ho pvska ya isht hvch ik ayo ke tuk ak osh isht it im anumpulit hvsh maya cho?

9, 10. Pvska tahlapi ho tahlepa sipokni tahlapi tuk a, kishi kanohmi ho hvsh ishi tok vt, micha pvska yvt untuklo ho, tahlepa sipokni ushta tuk a, kishi kanohmi ho hvsh ishi tok aiena kvt; hvch ik ithanot hvch ik akostinincho moma ho?

11. Katiohmi ho Falisi vhleha, micha Satusi vhleha aiena im pvska isht-shatvmmi ya ahah! hvsh aiahna he, yvmvt pvska imma yo ishit hvch im anumpuli li tuk keyu ka hvch ik akostinincho cho? im achi tok.

12. Yohmi ma pvska isht-shatvmmi hak o ahah! im ahna hi o i miha hatuk keyu; amba Falisi vhleha, mikmvt Satusi vhleha aiena nan-isht ia ithvnanchi ak atuk a okla akostininchi tok.

47. Pita yvt Chisvs a Chihowa okchaya Ushi aiahnit yimmi kvt miha tok.

13. Atuk o Chisvs vt Sesalea Fillippi yakni a ona mvt, nan im ai ithvna vhleha im ponaklot, Hatak vto, Hatak Ushi sia ha, kvt a hq si achi cho? achi tok.

14. Mihma, Kanimi kvt Chani Baptist chia hq mihakma; kanimi kvt Elias; mikma inlaka yvt Chelemaias; keyukmut hapaii vt tok achvfona mak o chia hq miha hoke, achi tok.

15. Mihma, Amba hvchishno vto kvt a hq hvs si achi cho? im achi tok.

16. Mihma Saimon Pita yvt afalaminchi mvt, Chihowa okchaya Ushi, Kilaist chia mak oke, achi tok.

17. Mihma Chisus vt afalaminchi mvt, Saimon Ba Chona chia hvt na chi yukpvshke: nipi micha issish aiena hosh yvma chim otvnichi hq keyu hoka, amba Aki vba binili kak oke.

18. Yohmi ma anonti, Chishno vt Pita chia, yohmi ka tvli ilvppak o vm iksa yatuk ma ai ikbit hilechi la hi oke: yohmikma aiokpuloka okhissa puta kvt yvm-mak atuk ma ik imaiyacho ka he mak oke.

19. Micha vba apelihchika ishit-tiwa puta ka chishno ak o chimalashke: yohmikma nana hq yakni ma a talakcha he: mikmvt nana hq yakni paknaka ya ish a takchi hoka, vba yakni ma a talakcha he: mikmvt nana hq yakni paknaka ya ish ai i hotofi hoka vba yakni ma ai i hotofa he mak oke, chim achi li akinlishke, achi tok.

20. Yohmi mvt ilap ak osh Chisvs Kilaist mak atuk a hatak nana kia okla ik im anolo ka hi a, nan im ai ithvna vhleha hash kvllochit i miha tok.

48. Chisvs vt iti-taiyukhvna ai illa he, atuk mvt nitak ont atuchinakma falamvt tana he aiena kvt tikbanli anoli; anonti Chisvs a im antia vhleha hut okla ile kaiyanchi, mikmvt tikba na yukpa ai im vltoba he takanli kak o isht ai ilbvsha he mak o achi.

21. Nitak yvma ai vhlit maya kak o Chisvs vt ilapvt Chelusalem a ona cha, hatak hochitoka vhleha,

micha na holitompa isht a₂sha pehlichi v₂hleha, na holissochi v₂hleha aiena ka nan isht im ai ilv₂sha in laua he, micha illichi tuk ma, nitak ont atuchinakma falamv₂t tana he aiena ka nan im ai ithv₂na v₂hleha ha im anolit ishtia tok.

22. Yohmi ma Pita yv₂t ilaue₂lit ishi cha, im alv₂m-minchit ishtia mv₂t, Na yakohmi kv₂t chi mishemashke, Chitokaka ma! ilv₂ppak okv₂t a chi yv₂mohma he keyu hoke, achi tok.

23. Yohmi kia yv₂mmak ash osh filema mv₂t, Pita yash o, Setan chia hv₂t v₂m ashaka yo ish hikiashke; chishno ak osh is si taklv₂mmichishke: na na kv₂t Chihowa ya a halaya kak o ish ahn₂nichi keyu, amba nana kv₂t hatak o a halaya hok mak bano hoka, im achi tok.

24. Yohmi mv₂t nitak yv₂mma foka ma Chisv₂s v₂t nan im ai ithv₂na v₂hleha hash o, Hatak nana hosh siakaiya bv₂na hokmv₂t, ile kaiyanchi cha, im iti-tai-yukhv₂na ya sholi hosh siakaiyashke.

25. Kv₂na kia ilap im ilhf₂iopak a okehalinchi bv₂na hokv₂to, i kv₂nia hi oke: yohmikma kv₂na kia v₂no pulla hatuk mak o im ilhf₂iopak v₂t ishit i kv₂nia hoh kia, ahayucha hi oke.

26. Hatak v₂t yakni a ai ila mominchi hosh ahanta na ilap imi shilombish ash osh i kv₂nia hokma, nanta ho ai-isht-il-aiyukpa hinla cho? yv₂mmak keyukmv₂t hatak v₂t nanta ak o ilap shilombish a isht atobba hinla cho?

27. Hatak Ushi v₂t enchil v₂hleha ha pehlichi cha, Iki isht aholitopaka ya il aieshi hosh aya hi oka; yohmik mak osh hatak moma ka ilap nana akaniohmi tok aiyuka mak o isht im atobba hi oke.

28. Ahli mak o hv₂chim achi lishke, Ilv₂ppa hioh-maya kv₂t kanimi kv₂t ik illo hosh ahanta cha, Hatak Ushi v₂t im apehlichika il aieshit minti ka, pisa hi v₂t. a₂sha hoke, im achi tok.

CHAPTER XVII.

49. Chisus vt inlet toba, micha Moses Elias ita tuklo kv̄t im v̄la na it im anumpuli.

1. Yvmohmi tuk o nitak hanali ka ont ia ma, Chisus vt Pita, Chemis, mikmvt itibapishi Chani aiena ka ilap bano h̄o pehlichī cha nv̄nih chaha ȳo pit oiya tok.

2. Mihmvt itikba ȳa ai inla tohv̄t hikia tok; mihma nashuka yvt shohpakali kv̄t hv̄shi ak o chiyuhmi ma, im anchi vt tohbi kv̄t tom̄mi hak o itilauī tok.

3. Yohmi ma Moses micha Elias itatuklo hosh yvm̄mak ash ant it im anumpuli hosh im otv̄ni tok.

4. Yohmi ma, Pita yvt anumpuli mut, Chitokaka ma! ilv̄ppa il āsha kv̄t pim achukmv̄shke; v̄lhpesa ish ahni hokma, ilv̄ppa v̄lhtipo tuchina ka il ai ikbashke; achv̄fa kv̄t chishno ak o chimmi hokma, anonti achv̄fa kv̄t Moses ak o immi hokma, anonti achv̄fa kv̄t Elias ok o immi hashke, Chisus a im achi tok

5. Yvm̄mvt anumpohonli moma h̄o, hoshonti tohbi kv̄t ant o hoshontikachi tok; mihma anumpa hoshontika auct a kocha kv̄t, Ilv̄ppak osh Sv̄so o holitopa ȳo, nan-isht a sai yukpa fehna hoke; hv̄sh i haponaklashke, achi tok.

6. Mihma nan ithv̄na v̄hleha hash osh haklo mvt, hleput kaha cha, okla nukshopa fehna tok.

7. Mihma Chisus vt v̄lv̄t ant tebli mvt, Ho tani; ik hv̄chi nukshopa kashke, achi tok.

8. Yohmi ma okla v̄ba chakali mvt, hatak nana kia ik peso, amba Chisus ak illa tok.

9. Yvmohmi tuk o nv̄nih chaha ȳa āsht akowvt okla minti ma, Chisus vt yvm̄mak ash o nan i mihvt, Nana hv̄sh p̄isa tuk vt hatak nana kia hv̄ch ik im anolo mak o, Hatak Ushi vt illit falamvt tani hayashke, achi tok.

10. Mihma nan im ai ithana vhleha hvt im po-naklot, Yohmi ka katiohmi hq na holissochi vhleha hvt, Elias ak osh tikba vla pulla he okla achi cho? achi tok.

11. Mihma Chisvs vt afalaminchi mvt, Elias ak osh tikba vla cha, nan okluha ka falaminchit achuk-malit taiyahla he tuk o mvhli:

12. Yohmi ka Elias vt himonasi ak kia vla mash-ko hoke; mihma yvmma okla ik ithano cha, amba nana hq okla ahni tuk mvt, yvmmak atuk ma i yvmihchi tok; yohmi ka Hatak Ushi ak kia mih mak o, chiyuhmit im ai issikkopa chi hoke, hvchim achi lishke, achi tok.

13. Yohmi ma Chani Baptist ak o yvmmvt isht anumpuli hatuk a nan ithvna vhleha hvt akosti-ninchi tok.

50. Chisvs vt nvni chaha vtvrt akowa mvt, haiochichi tuk a hlakofichi; micha illa he atuk mvt falamvt tana he tik-banlit anoli.

14. Atuk o okla laua aiasha kash vlvrt taha ma, hatak achvfa hosh im vla cha, ant i hvchukbihleptv hikia mvt,

15. Chitokaka ma! svso ha ish i nukhaklashke: yvmmak okvt haiochi atuk osh himonna luak a itvto-honla fehna, mikmvt oka ma himona oka itohonla fehna aiena hatuk osh issikkopa fehna hoke.

16. Yohmi hq nan chim aiithvna vhleha ha isht im vla li tuk a, okla hlakoficha he keyu tuk oke, achi tok.

17. Mihma Chisvs vt afalaminchi mvt, Na yimmi iksho micha na shanaiya fehna okla hvchia ma! hvchi takla ahanta li katiohmi foka chi cho? nana ka isht ak hvchi ahno hq katiohmi foka chi cho? Ilvppak o isht hvs svv vlashke, achi tok.

18. Mihmvt Chisvs vt nan-isht ahullo okpulo ya im alvmmi ma, yvmmak ash a kohcha tok; yohmi ma vlla yash osh hvshi kanvlli vhlpisa mih makinli hq hlakofi tok.

19. Yvmohmi tuk o Chisvs vt ilap bano ma, nan ithvna vhleha hvt im ona cha, Katiohmi hq pishno vto yvmma e kohcha he keyv tuk oh cho? achi tok.

20. Mihma Chisvs vt, Nan ik hvchi yimmo kak atuk oka, ahli mak o hvchim achi lishke: Na yimmi kvrt mvstvt nihi achvfa yak o chohmi hosh hvchi nukfoka hatuk okmvt, nvni chaha ilvppa, Ilvppak atuk ma a kanvllit yvmmak o ish onashke, hvsh im achi hoka, yvmmvrt kanvlla hinla hoke: mikma nana hosh hvchi na fehna hi vt iksho ka hinla hoke.

21. Yohmi kia ilvppa chohmi hokvt vba pit anum-puli, micha nahullochi aiena kak o kayukma kohcha chatuk keyushke, im achi tok.

22. Atuk osh Kalili a okla maya ho, Hatak Ushi a ishit okla ibbak a fohka chi hoke.

23. Yohmikma yvmmak ash o okla vbi tuk ma, anonti nitak ont atuchinakma falamvt tana hi oke, Chisvs vt im achi tok. Yohmi ma okla nukhaklo fehna tok.

51. Chisvs vt tvli holisso holitopa ka tempel a nan isht im ai atahla chi ho ima tok.

24. Yvmohmi tuk o Kapenavm a okla ai vla ma, vba isht ai okpvchi tvli holisso a sholi vhleha hvrt Pita ya im ona mvrt, Na hvch ithvnanchi vt vba isht aiokpvchi tvli holisso a bohli chatuk keyu ho? achi tok.

25. Mihma yvmmak ash osh, Ahli, achi tok. Micha aboha ya ont chukowa ma, Chisvs vt tikbanli, Saimon vt katiohmi ish ahni cho? miko vhleha yakni pakna aiasha kvrt ilap im vlla yak okma, keyukmut hatak inla yak okma, nanta ho vllhpoyak i nan vllhpisa tvli holisso, micha noshkobo chumpa tvli holisso, aiena ka im a hoyo chatuk o? achi tok.

26. Pita yash osh, Hatak inla vhleha ha, im achi tok. Mihma Chisvs vt, Yohmikma im vlla yokvto yvmma ik ahalaiyo ho tumvshke.

27. Yohmi kia kil ibetvblecho ka chi ka, ivt okhvta ona cha, nvni isht-vlbi ya pit okvchi, atuk osh nvni tikba kohcha ho ish ishashke: micha itakha ya ish wakvmmikmvrt, tvli holisso tushafa kvrt foka na ish pisa chi hoke; yvmmak o ish ishi cha, vno, micha chishno, il ita tuklo isht vlhtoba mak o yvmma ont ish imashke, im achi tok.

CHAPTER XVIII.

52. Chisvs vt pim anukfla hvt akanlosa he, micha ilap i yimmi ahli vhleha hoka e shitelema he keyu ka pi miha: anonti i yimmi vhleha ha i hullo kvt isht anoli mak osh chukfulhpoba kvnia isht apesvt anumpuli: micha itibapi-shi iksa ibafohka yatuk osh nana ka pim okpni hokma, il i kaniohma hi oka pi miha: anonti kvna hoh kia i hohchifo ha kanima yo ai it afama ka ai ibafoka hi vt achi.

1. Yohmi ma yummak fehna akinli ka nan ithvna vhleha hvt Chisvs a im ai vla mvt, Kvta hosh vba apelihika ya ibafoka kvt moma i shahli cho? achi tok.

2. Mihma Chisvs vt vlla iskitini o i howa cha, yummak ash itinlakla ya hilechi tok.

3. Mihmvt, Ahli ho hvchim achi lishke; Inlvt toba cha, vlla chipunta yo chiyuhmi ho keyukmvt, vba apelihika ya hvsh chukowa he keyu hoke.

4. Yohmi hoka kvna hosh ile akanlosichi kvvlla iskitini ilvppak o chiyuhmi hokmvt, mihi yosh vba apelihika ya ibafoka kvt moma i shahla hi oke.

5. Mikma kvna hosh vno a hohchifo hatuk mak o vlla ilvppa chohmi achvfa ka ahninchii hokmvt, vno ak o ahninchii hoke.

6. Amba kvna hosh a yimmi chipunta yakohmi achvfona kia ibetvblichi hokmvt, yummak ash o ilap ak o tvli tanchi botoli osh ikunla ya atakanli ho, okhvta ahofobi fehna yo ai oka illi hok mak osh im vlhpiesa he tuk mak a hi oke.

7. Nan-isht-ai ibetvbli ak pulla tok mak o yakni vt nan im palvmmi hoke: nana ai ibetvbli okakanto kaniohmi kia ik takalo ka wa: yohmi kia hatak nana ho ai ibetvbli vt isht a tobvt minti hatuk okvno im palvmmi mak oke.

8. Yohmi hoka chibbak okma, chiyi yokma, nana hosh chi ibetvblichi hokma, hokofit ish kanchashke; hanali okpulo, keyukmvt imomokpulo yokma, nana

hosh aiokchaya ya ont ish chukowa kak osh ibbak vt tuklo, keyukmvt iyi yvt tuklo, kanima hosh luak ataha iksho ma ish itokunia he tuk a chim i shahla he oke.

9. Mikmvt chi nishkin vt chi ibetvblich i hokma, kohchit ish kanchashke; nishkin vt im achvfa hosh aiokchaya ya ont ish chukowa hok mak osh nishkin tuklo hosh aiokpoloka luak a ish itokunia he tuk a chim i shahla he oke.

10. Ahah! aiahnit chipota vhleha ilvppa achvfona kia hvch ik kanimacho kashke: yvmmak oka im enchil vhleha vba yakni aiasha kv, Aki vba binili ka nashuka ya pisa na bilia hoke, hvchim achi lishke.

11. Hatak Ushi vt okpulot taha yak o okchalinchachi hosh aya hatuk oke.

12. Katiohmi hvsh ahi cho? Hatak vt chukfulhpoba tahlepa achvfa hosh im asha tuk osh, achvfonvt yoshubvt kunia ka, pokoli chakali akocha chakali kash ashachi cha, ivt yoshubvt kunia tuk a hoyot, nvnihi foka ya hikikia chatuk keyu cho?

13. Atuk osh ahayucha he yuba tuk osh, yohmi hokmvt, achvfa yvma isht a na yukpa kv, yoshubvt ik vmowo ke tuk pokoli chakali akocha chakali ka im i shahli chatuk oke, ahli mak o hvchim achi lishke.

14. Yohmi ka chipota vhleha ilvppa achvfona kia okpulot taha hi a, hvch Iki vba binili kv ik ahno kv, yvmmak inli ho chiyuhmi hoka.

15. Yohmi ka ish itibapishi hv nana ka chim ashvchi hokma, ivt chishno, micha ilap hvsh ita tuklo bano ho nana ai ashvchi tuk a ish im anolashke: chi haponakla hokma, ish itibapishi hatuk a falaminchit ish im ai yubacha he mak oke.

16. Amba chi haponakla he keyu, yohmi hokmvno, himmakma achvfa keyukmvt tukloma, nana ho pehlinchit ish ia na nan anoli tuklo, keyukmvt tuchinakma nana itih ho anumpa puta mvt isht ai ahlashke.

17. Yohmikma yvmmak atuk ma i haponakla he keyukma, hvch a ish im anolashke: yohmi kia hvch atuk ma i haponakla he keyu hokmvt, yvmmak atuk mvt Chentail hatak micha pvblikan aiena mak o chim ai itilauashke.

18. Ahli mak o hvchim achi lishke, Nana ho yakni pakna ya hvsh a takehi hoka, vba yakni ma a talakcha he; mikmvt nana ho yakni pakna ya hvsh ai i hotofi hoka, vba yakni ma ai i hotofa he mak oke.

19. Anonti hvsh tuklo hosh nana ka asilhba he imma ho yakni pakna ya hvsh ai it im achvfa hokma, Aki vba binili kvt ai im aiahlichha he mak oke, hvchim achi lishke.

20. Kanimma yo tuklokma, tuchinakma, nana hosh sa hohchifo ha isht ai itvnaha hoka, ymma ai iklvna hikia li hoka, achi tok.

53. Chisvs vt hatak okvt nana ka ai iti kaniohmi hokvt, peh iti kashofa he tuk nan isht apesa hosh anumpuli.

21. Yohmi me Pita yvt im ona mvt, Chitokaka ma! itibapishi li hvt katohmi ha yo vm ashvchi ka, i kashofi la hinla cho? untuklo haya hi o? achi tok.

22. Mihma Chisvs vt, Untuklo haya hi o ak chim achoshke: amba Pokoli untuklo bat untukla hi oke, chim achi lishke, im achi tok.

23. Yohmi hoka vba apelihchika yvt miko yosh in tishu vhleha ha aheka i hotinvt pisa bvna ho chohmi hoke.

24. Atuk osh i hotinvt ishtia ma, achvfa hosh talent tahlepa sipokni pokoli hosh aheka im asha tuk o, ilaelit im vla tok.

25. Yohmi kia isht atobba hi vt ik im iksho hatuk o, i shahli hash osh ymmvt, tekchi, micha im vlla vhleha, mikmvt nan im asha tuk moma aiena kvt kvnia na aheka yvt vlhtoba hinla ka apesa tok.

26. Yohmi hatuk o tishu hash osh aka hlipia cha, aiokpahanchi mvt, Chitokaka ma! is svmi svlaha hokma, mominchit chim atobbi lashke, achi tok.

27. Yohmi ma tishu ymma i shahli yatuk vt i nukhaklo cha, i hotofi mvt, aheka atuk a i kashofi tok.

28. Yohmi tuk kia tishu ymmak ash inli kvt kohchvt ia mvt, tishu ilapa ai itilauu yvt achvfa hosh, aheka iskvli tahlepa achvfa hosh in takanli hatuk a ont pisa tok: mihmvt ymmak ash o hoklit ishi cha, nuktihliffi mvt, Aheka chin takali kvt is svm atobbashke, achi tok.

29. Mihma tishu itilau i yatuk ash osh iyi ituma aka ya hlipia cha, Is sūmi sūlaha hokma, mominchit chim atobbi lashke, achit im asilbha tok.

30. Yohmi kia vhlpesa ik ahno ki tok : amba aheka ya atobbi pulla chi mak o, yummak ash o aboha kullo pit fohki tok.

31. Yohmi ma tishu bika vhleha hv t nana kv t yvmohmi na pisa mv t, okla nukhaklo fehna cha, i v t nana a kaniohmi tuk a mominchit i shahli ha okla ont im anoli tok.

32. Yohmi tuk a i shahli hatuk v t yummak ash o pit hoyo cha, Tishu haksi chia ma ! chishno v t is sūm aiahni ma, aheka yv mma mominchit chi kashofi li tuk.

33. Yohmi ka chishno ak kia tishu chi bika ya ish i nukhaklo kv t, vno v t chi nukhaklo li tuk a, ish chiyuhma he tuk keyu cho ? im achi tok.

34. Mihmv t i shahli hatuk v t anukhobela mv t, aheka in takanli tuk v t, mominchit atobbi pulla chi mak o, issikkopali vhleha ha im issa tok.

35. Yohmi ka hvchishno hvsh moma kv t hvsh itibapishi nana ai ashvchi ya hvchi chukvsh ak o isht hvsh i kashofi keyukma, yummak inli ho ohmichit Aki vba binili kv t hvchi yvmihcha he akinli hoke, achi tok.

C H A P T A X I X .

54. Falisi vhleha hv t Chisvs a nan im ponakolo ma, Chisvs v t afalaminchi mv t, I hatak v t tekchi it i kvnia ka ik vhlpe-so ka miha.

1. Atuk o yakohmi tok ; Chisvs v t ilvppa puta ka ahanchit tabli mv t, Kalili a vttv t i v t, Chatan misha Chutea yakni v hli ho ona tok.

2. Mihma okla chito yv t iakaiya tuk o, yummak o a hlakofohlich i tok.

3. Mihma Falisi vhleha hak kia im ai vla cha, yummak ash o imomaka pisa hosh, Nana hosh a kani-ohmi mak inli ho hatak vt tekchi a kancha hi vt im ai vlhpesa hoh cho? im achi tok.

4. Mihma yummak ash osh afalaminchi mvt, Ummona hokvno yumma ikbi hokvt, nakni micha tek itatuklo ho ikbi tok.

5. Mihmvt, Ilvppa pulla hatuk mak o hatak vt iki micha ishki aiena ka issa cha, tekchi ak o it asitia hi oke: yohmikma tuklo yummak atuk vt kaknip achvfa hi oke; achi tok holisso ha hvch ik it im anumpulo chatuk oh cho?

6. Yohmi hoka yummak okvt himmakma tuklo mak a hi o keyu, amba haknip achvfa hoke. Yohmi hoka Chihowa hosh nana ka ita halvllichi haya, hatak vt ik iti filvmmecho kashke, im achi tok.

7. Mihma okla hash osh, Yohmi ka katiohmi ho iti kvnia holisso ha ima cha, ohoyo ha kancha hi a Moses vt apesa tok oh cho? im achi tok.

8. Mihma, Hvchi chukvsh vt kullo pulla hatuk mak o, hvchi tekchi hvsh kancha hi a Moses vt hvchim ahni tok: amba vmmona a mihinti kvno yohmi tok keyushke.

9. Yohmi kia vno vt, Kvna hosh tekchi a inla itinlumaka tuk keyu ho, kanchi cha, inla itauwaya hokmvt, haui toba mak oke: mikma ohoyo kanchi tuk ash o kvna hosh itauwayakmvt, haui toba hoke, hvchim achi lishke, im achi tok.

10. Mihma nan im ai ithvna vhleha hash osh, Hatak vt tekchi a isht im a yakohma hinlakma, itauwawa ka achukma keyushke, im achi tok.

11. Yohmi ma yummak ash osh, Hatak moma kvt anumpa ilvppa aiokpvcha he keyu, amba kvna ho isht ai im vlhpesa ak illa hinla hoke.

12. Kanimi kvt ishki ikfoka anyka ak inli ho yohmi hosh atobvt vttu tuk yunvk vt asha; mikma kanimi kvto hatak osh yunvk ikbi tok o, yunvk vt asha: yohmi ma kanimi kvto vba apehlichika pulla hatuk mak o, ilap inli hosh yunvk il ikbi tok vt, yunvk vt asha hoka. Kvna hosh ilvppa aiokpvcha hinlakmvt aiokpvchi mak inlashke, im achi tok.

55. Chisus vt vlla chipunta hoka ibbak a onochi cha vba isht anumpuli.

13. Yvmma foka ma yvmmak atukma ibbak a vlla chipunta ya isht umbitepa cha, vba pit anumpula chi ka isht im ai vlla tok: mihma nan ithvna vhleha hvv okla ha im alvmmminchi tok.

14. Yohmi kia Chisus vt, Ulla chipunta yvt vm vlla hi a hvsh im ahni cha, hvch ik im alamno kashke: ilvppa chiyuhmi kak osh vba apehlichika mak oka, achi tok.

15. Mihmvt yvmmak ash o ibbak a isht umbitepvt tahli mvt, yvmmak ash a kohchvt ia tok.

56. Chisus a hatak himita yosh. Nantak o katiohmi li kak osh aiokchayvt bilia yoka ona la hinla cho? im achi ma, Chisus vt isht im anumpuli: nan in laua yvt aiokchaya yoka palvmmi ho chukowa he achi: anonti ilap i yimmi ahli vhleha ha yukpala hi vt miha.

16. Yohmi tuk o achvfa hosh ayvt ona mvt, Nan ithvnanchi achukma ma! aiokchayvt bilia yoka pisa la hi vto nana achukma nanta hak o yvmohmi la hinla cho? im achi tok.

17. Mihma yvmmak ash osh, Katiohmi ho achukma is si achi cho? achukma kvv iksho ho amba achvfa illa, yvmmvt Chihowa ak oke: yohmi kia aiokchaya yoka ont ish chukowa he ish ahni hokmvto, nan vlvpisa puta mak o ish holitoblashke, im achi tok.

18. Mihma, Katima kak o? im achi ma, Chisus vt, Kvna kia chik bo kashke, Chik itinlumako kashke, Chik hvkopo kashke, Anumpa ik ahlo isht atokolit chik anto kashke.

19. Chiki micha chishki aiena ka ish holitoblashke: mikmvt, Chin chukapanta hatak a ish holitobbi kvv, chishno akinli ka chim itilauashke, achi tok.

20. Hatak himita yash osh, Ulla sa tomba mak inli hosh nana ilvppa moma ka holitoblit isht mihinti li tok mak oke: nanta hosh ik svm ono moma cho? im achi tok.

21. Mihma Chisvs vt, Aiahli kak o ish ahni hok-mvt, ia cha nan chim asha ka kampilvt ilbvsha vhleha ha ish i hopelashke; yohmikmvt na holitompa kvt vba yakni ya chin tonla he mak oke: mikmvt ish la cha, ant is siakaiyashke, im achi tok.

22. Yohmi kia hatak himita yash osh anumpa yvm-ma haklo mvt, nan im laua fehna hatuk okvt, nuk-haklo fehna hosh kanvllit ia tok.

23. Yohmi ma Chisvs vt nan im ai ithvna vhleha hash o, Ahli mak o hvchi miha lishke, Hatak nan in laua yvt vba apehlichika ya palvmmi ho chukowa hi oke.

24. Mikma anonti, Kamel vt chofak ushi nishkin a hlopulli ka palvmmi kvt, hatak nan in laua yosh Chihowa apehlichika pit chukowa hokvno, ik lauwo ka he hvchim achi lishke, achi tok.

25. Mihma nan im ai ithvna vhleha hvvt okla haklo mvt, nukhlakanha fehna tok: mihmvt, Yohmikma kvt hosh okchaya hinla cho? achi tok.

26. Yohmi kia Chisvs vt yvmmak ash o atokolit pisa mvt, Hatak okmvno ilvppvt yohma he keyu, amba Chihowa hokmvno nan okluha kvt yohmi he bano hoke, im achi tok.

27. Yohmi ma Pita yvt afalaminchit mvt, Inta! pishno vt mominchit il issa cha, e chiakaiya tok; yoh-mi kvt nanta hak o il isha chi cho? im achi tok.

28. Mihma Chisvs vt. Ahli mak o hvchi miha lishke; Si apehvt hvsh itvnova tuk vt, nan okluha kvt himonvt tobakma, Hatak Ushi yvt im aholitopa-ka ya aiasha holitopa ai om binilikma hvchishno ak kia aiasha holitopa auah tuklo ka hvsh a chieyvt, Israel oklushi auah tuklo ka na hvchim apesa hi oke.

29. Yohmikma chuka puta, mikmvt itibapishi vhleha, micha in tek vhleha, keyukmvt iki okma, ishki okma, tekchi okma, keyukmvt vlla yokma, yakni okma, nana ho sa hohchifo pulla hatuk mak o issvt aya tuk vt momvt yvmmak atuk a ohmi tahlepa achvfa ka pisa tuk mvt, anonti aiokchayvt bilia ma iesha he mak oke.

30. Yohmi kia tikba tuk vt ont ishtaiyopa hi vt lauwakma, anonti ishtaiyopi atuk vt tikba he vt asha hi oke.

CHAPTER XX.

57. Na pilesa vhleha hv̄t nitak achvfa ka hv̄shi kanvlli v̄h̄pisa ilaiyuka h̄o p̄k̄vpi a holokchi ilhkoli tok nan isht v̄h̄pisa. Nan isht v̄h̄pisa ilv̄p pak o Chisvs vt ilap im anta vhleha aiahli ka na yukpa isht im atobba hi vt ai isht apesa.

1. Uba apehlichika yvt, hatak chuka-chvfa pehlichī osh i p̄k̄vpi aholokchi a toksv̄la chī ka, tohna chī hosh onnahinli fehna ia h̄o chohmi hoka.

2. Atuk osh yvm̄mak ash osh ilhtohno vhleha h̄a nitak achvfa ka iskv̄li achvfa chī h̄o it im apesa cha, p̄k̄vpi aholokchi a pit tihleli tok.

3. Atuk osh hv̄shi kanvlli v̄h̄pisa ont atuchina foka h̄o kohchvt aya mvt, inla yvt nan-isht vtta ik im iksho hosh ilhpak a kanchi a hiohmaya na pisa tok,

4. Mihmvt yvm̄mak ash o, Hv̄chishno ak kia p̄k̄vpi aholokchi a pit hv̄sh abehashke; atukma kaniohmi kak osh ai v̄h̄pesakma, hv̄ch ima lashke, im achi na okla ilhkoli tok.

5. Atuk o anonti hv̄shi kanvlli v̄h̄pisa ishit hanali, mikmvt ont ishit chakali aiena ka kohchvt aya mvt, yvm̄mak ash inli h̄o chohmichi tok.

6. Atuk osh hv̄shi kanvlli v̄h̄pisa ishit anah achvfa foka h̄o kohchvt ia mvt, anonti inla yvt nan-isht vtta ik im iksho hosh hiohmaya na pisa cha, Katiohmi h̄o nan isht vtta ik hv̄chim iksho hosh hv̄sh hiohmaya na shoyubi cho? im achi tok.

7. Mihma yvm̄mak ash osh, Amba hatak nana kia nan ik pi tohno kv̄uo, im achi tok: mihma yvm̄mak ash o, Hv̄chishno ak kia p̄k̄vpi aholokchi a pit hv̄sh abeha ak inlashke; atuk ma kaniohmi kak osh ai v̄h̄piesak ma, mih mak o hv̄sh ishashke, im achi tok.

8. Yvm̄ohmi tuk o ont opiv̄t taha ma, p̄k̄vpi aholokchi in talaja atuk ash osh nan im apesv̄chi ash̄o, Na pilesa vhleha h̄a i howa cha, v̄lhtoba h̄a ima: ishtaiyopi tuk ak o ai ishtai hosh tikba tuk a ont ish tashlashke, im achi tok.

9. Atuk o hvshi kanvlli vhlpisa ont ishit auah achvfa foka hō tohno tuk ash o okla ai vla mvt, hatak achvfa kvt iskvli achvfa aiyuka hō ishi tok.

10. Amba tikba tuk vto ai vla mvt, i shahli hō okla isha chi ka im ahoba tok: atuk o yvmmak ash kia hatak achvfa kvt iskvli achvfa aiyuka hō ishi tok.

11. Micha yvmma okla ishit tahli mvt, chuka-chvfa pehlichī hatak ash o nanumachit maya mvt,

12. Ishtaiyopi tuk yakohmi kvto hvshi kanvlli vhlpisa achvfa illa hō toksvli tuk a pishno nitak lvshpa hō toksvli kullo ka isht il ahanta tuk a, ish pi ai itilauechishke, achi tok.

13. Yohmi kia afalaminchi mvt, achvfa hō, A kana ma! nan ik vhlpeso nana hō a chi yvmohmi li keyushke: chishno vt iskvli achvfa hi o il it im apesa tuk keyu?

14. Chimmer mak o ish ishi cha, ish iashke: ishtaiyopi tuk ilvppak kia chishno a it ilauechit ima la chi hoke.

15. Vno vmmi hatuk vt vno nana aiahni li hosh kanimihchi la hi vt vm vhlpesa keyu? vno ak osh si achukma kak o, chi nishkin vt ik vhlpeso hoh cho? achi tok.

16. Yohmi ka yvmmak inli chiyukmit ishtaiyopi tuk vt tikbakma, tikba tuk vt ishtaiyopa hi oke; im annoa hokvto laua; amba vlhtoka kak osh achafoa hoka, achi tok.

53 Chisvs vt anonti illa chi kvt tikbanlit anoli tok. Mihma Sebate ushi ishki vt Chisvs a nan im asilhha tok, mihma afalaminchit i miha.

17. Atuk osh Chisvs vt Chelusalem a ia hosh aya mvt, takla ya nan im aiithvna vhleha auah tuklo hash pehlichit naksika isht ona mvt,

18. Inta! Chelusalem a, iloh ivshke; yohmi ka Hatak Ushi ishit na holitempa isht asha pehlichī vhleha, mikmvt naholissochi vhleha aiena ka ibbak fohkikma, yvmmak ash osh illa hi a okla im apesa chi hoke.

19. Yohmikma yummak atuk mvt ishit yopula chi, micha fummi, mikmvt iti taiyukhvna ahonvhllichit vbi aiena chi mak o, Chintail okla ha ibbak fohka chi hoke: yohmi tuk kia nitak ont atuchinakma falamvt tana hi oke, im achi tok.

20. Yohmi ma Sebate ushi vhleha ishki osh ushi a pehlinchit im ona cha aiokpahanchi kvrt, nana achvfa ho im asilhha tok.

21. Mihma ohoyo hash o, Nanta hak o ish aiabni hoh cho? im achi ma, yummak ash osh, Suso tuklo ilvppvt ish apehlichika ya achvfvrt chibbak isht-impakimma ya ont a binilikma, anonti achvfa yvt vlfhvbe-kimma ya asha hi a ish im apesashke, im achi tok.

22. Yohmi kia Chisvs vt afalaminchi mvt, Nana ho hvsh asilhha hokvt hvsh akostininchi keyushke. Hvchishno vt isht-ishko ai ishko la chi, yumma hvsh ai ishka hinla cho? anonti babtismo isht a sa babtismo ka ishit kvchi babtisma hinla cho? im achi ma, yummak ash osh, Pi yvmohmi hinla hoke, im achi tok.

23. Mihma yummak ash o, Um isht-ishko yoka hvsh ai ishka chi ho mvhli; mikmvt babtismo isht a sa babtismo ka ishit hvchi babtisma chi ko mvhli hoke; yohmi kia svbbak ishtimpakimma micha vlfhvbe-kimma aiena aiasha hokvno vno yosh ima la hi o keyu, amba Aki vt kvna ho im atahli tok mak illa hi oke, achi tok.

24. Yohmi ma pokoli kash osh haklo mvt, itibapishi tuklo kash o isht ik i yukpo fehna tok.

25. Yohmi kia Chisvs vt yummak ash o i howa mvt, Chentail miko vhleha hvrt ai i shahlit pehlichi chatuk, mikma i hochitoka vhleha hvrt nana im ai vhlpesa hatuk osh im ai yvmihchi chatuk a hvsh ithaiyanvshke.

26. Amba hvchishno yokvno ai yvmohma he keyushke: amba kvna hosh ai i shahlit hvch itintakla ya anta bvna hokmvt, yummak osh hvchi tishu hashke.

27. Mikma kvna hosh holitopa i shahli bvna hosh hvchi itintakla ahantakmvt, yummak osh nan isht hvchim vtta yashke.

28. Hatak Ushi vt ilapo ak o nan isht im vtta chi ho aya hvrt tok keyu: amba nan isht vtta chi, mikmvt

laua hō ilap im ilhfiopak a ishit chumpa chī aiena hosh
āya tok a, mih mak o chiyuhmashke, achi tok.

59. Chisvs vt hatak lva tuklo hō hopokoyochi.

29. Yohmi ma Cheliko a asht ilhkoli ma, okla laua
fehna kv̄t yummak ash o iakaiya tok.

30. Atuk o hatak lva tuklo kv̄t hina lapalika yo
chiya tuk osh, Chisvs vt ont ia hō haklo mv̄t, pit tah-
pvl̄vt, Chitokaka Lewi ushi chia ma! ish pī nukhāk-
lashke, achi tok.

31. Yohmi ma okla laua yash osh, yvm̄mv̄t nuk-
chinta chī ka, im alv̄m̄mi tok; yohmi kia yvm̄mak o i
shahlichit tahpvl̄vt, Ish pī nukhākklashke, Chitokaka
Lewi ushi chia ma! achi tok.

32. Mihma Chisvs vt lum̄vt hikia cha, yvm̄mak
ash o pit i howa mv̄t, Nanta hak o a hv̄chi katimichi
la he a hv̄sh aiahni cho? achi ma,

33. Pi nishkin vt fatuma he ak oke, Chitokaka ma!
im achit okla tok.

34. Yohmi ma Chisvs vt i nukhāklo cha, nishkin
a pit potoli tok: yohmi ma mih mak inli hō nishkin vt
falam̄vt pisa ma, yvm̄mak ash o iakaiyvt okla tok.



CHAPTA XXI.

60. Chisvs vt kaniohmi hosh Chelusalem a chukowa; anonti
nā-chumpa vhleha micha nā-kanchi vhleha aiena ka tem-
pel a a kocha weli.

1. Yvmohmi tuk o Chelusalem pit bilika okla onvt
Alif nv̄nih Befachi ak o ai ona ma, Chisvs vt nan
ithv̄na tuklo hō pit tihleli tok.

2. Mihmv̄t, Tvmahushi hv̄chi chapaka anet talaia
ka hv̄sh onashke; yokmikmv̄t mih mak inli hō isuba
haksobish falaia ushi ilauei kv̄t asinta hō hv̄sh pisa

chi hoke: yvmma hvsh i hotofi cha, isht hvs svv
vlashke.

3. Micha kvna kia nana ka hvchim achi hokma,
Chitokaka yak osh bvna hatuk oke, hvsh im achash-
ke: yohmikma mih mak inli ho auet pila chi hoke, im
achi tok.

4, 5. Hopaii vt anumpohonlit, Saion ushetik a,
Inta! chi miko chukvsh yohbi achukma, isuba hak-
sobish falaia a toba tok isubushi haksobish falaia yo
om binili hosh avvt chim vlvshke, hvsh im achashke,
achi tok a ont aighla chi mak o ilvppa moma kvv a
yakohmi tok.

6. Mihma nan ithvna yash osh itiachi mvt, Chisvs
vt i miha tuk mak o ont yvmohmit okla tok.

7. Micha isuba haksobish falaia, mikmvt ushi
aiena kash o isht vla ma, im ilefoka ya om pullit tahli
cha, yvmmak ash o okla om binilichi tok.

8. Yohmi ma okla chinto fehna hosh hina ya im
anchi a okla pulli tok; kanimi mvto iti naksish o vmot
hina ya pulli tok.

9. Yohmi ma okla chito tikba itvnowa tuk, mih-
mvt iakaiya aiena kash osh, tahpvlvt, Lewi Ushi a
Hosanna im ahanchashke. Chitokaka i hohehifo ho
il ai eshi hosh aya hokvt holitopa mak oke.. Shutik
tvbokaka fehna ma, Hosanna ai ahanchashke, achi
tok.

10. Atuk o Chelusalem a ant chukowa ma, tvma-
ha hash osh momvt nukhlakanacha mvt, Ilvppvt kvta
ho cho? achi tok.

11. Mihma okla lauo yash osh, Ilvppak osh Kalili
yakni Nasalet a i hopaii Chisvs mak oke, achi tok.

12. Yohmi ma Chisvs vt ivt Chihowa in tempel
a ont chukowa mvt, tempel anukaka ya nana a kan-
chi micha a chumpa aiena maya tuk ash mominchit
kocha pit tihleli mvt, aiimpa tvli holisso ai itatoba
puta, mikmvt pvchi vlvpoba kanchi abinohli aiena
kash halvllit filemohlit kinahlichi tok.

13. Mihmvt, Um aboha hvv vba pit ai anumpuli
chuka yo hohehifa he, achi kosh holisso tok; yohmi
kia hvchishno vto na-hukopa vhleha in chuka yo
hvsh ikbishke, im achi tok.

14. Mihma lupa micha hanali okpulo puta kv̄t tempel anukaka ya im ai v̄la ma, yummak oka hlakofohlich̄i tok.

15. Mihma na holitompa isht āsha pehlich̄i v̄hleha, micha na holissochi okla aiena kv̄t, yummvt na fehna puta ka yvmihchi, mikma tempel anukaka ya v̄lla vt Lewi Ushi a Hosanna im ahanchashke, achi aiena ka pisa mvt, okla isht ik i yukpo fehna tok.

16. Mihmvt yummak ash o, Ilvppvt nana achit maya ka ish haklo cho? im achi tok; Mihma Chisvs vt, Yau, v̄losi mikmvt p̄ishi puta itih ha Chihowa hv̄t a holitopa he isht apesa tok achi holisso ka, himonna kia hv̄sh ik it im anumpulo chatuk oh cho? im achi tok.

17. Mihmvt yummak ash o issvt tvmaha a kohchvt ia mvt, Beteni a ona cha, yummak o ont nusi tok.

61. Chisvs vt iti v̄lhpoba fik achi nan ik vno a bv̄shit illa he im ahni; mikmvt na yimmi micha anumpa ilbv̄sha anumpuli aiena ka nan isht im aiahli ka ya pim anoli.

18. Atuk osh onnahn̄li ma falamvt tvmaha ia hosh aya mvt, hohchv̄fo tok.

19. Mich̄a fik v̄pi vt tikba ya hikia na pit pisa mvt, yummak ash o ona; yohmi kia nana kia takanli na ont ik ahayucho; amba hishi ak illa tok; mihmvt, Himak a pilla ma nitak nana v̄ni yvt ik chi atobo kashke, im achi tok. Mihma chekosi mak inli h̄o fik v̄pi vt bv̄shit taha t̄ok.

20. Yohmi ma nan ithv̄na hv̄t pisa cha, okla Okokko! aiahni mvt, Chekosi fehna h̄o fik v̄pi vt bv̄shit taha ch̄a, achi tok.

21. Mihma Chisvs vt afalaminchi mvt, Ahli mak o hv̄ch̄i miha lishke, Na yimmi kv̄t hv̄chi anukfoyuka, micha ik hv̄chi nukwiyo hokmvt, fik v̄pi nana a kanihmichi ilvppak bano h̄o hv̄sh yvmihcha hi o keyu, amba nv̄nih chaha ilvppa kanv̄llit ivt okhv̄ta hak o pit ish okvtulashke, hv̄sh im achi aienakma, yvmohma hinla hoke.

22. Micha hvchi yimmi hosh nan oklyha ka nana hō anumpa ilbvsha ishit hvsh asilhha hokvt, hvsh isha hi oke, im achi tok.

62. Kanimi kv̄t nan isht ai v̄lh̄pisa nana hō isht ai yvmoh-mi hatuk a a ponaklo tuk kia, yvmmak ash o Chisvs vt im a tvblich̄i, micha hatak ushi tuklo, micha nā-pilesa v̄hleha p̄k̄vpi a holokechi im pota tuk nan isht apesa hosh Chu okla nan im ai ashvchi a isht otv̄nich̄i.

23. Atuk osh tempel a ona cha, nan ithv̄nanchi hosh ahanta ma, nā holitompa isht āsha p̄hlich̄i v̄hleha, mikm̄vt okla i hochitoka v̄hleha aiena kv̄t im ai v̄la cha, Nan isht ai v̄lh̄pesa nanta mak o ilv̄ppa puta ka isht ish yakohmichi cho? micha kv̄ta hosh nan isht ai v̄lh̄pesa ilv̄ppa chima tok oh cho? achi tok.

24. Mihma Chisvs vt afalaminchi m̄vt, V̄no ak kia nan achv̄fa ka a hv̄chim asilh̄hv̄chi lashke: yvm-mak o h̄vs sv̄m anoli hokma, v̄no vt yvmmak inli chohmit nan isht ai v̄lh̄pesa nana hō ilv̄ppa puta ka ishit yakohmichi li atuk vt hv̄chim anoli lashke.

25. Chani i baptismo vt katimak o a minti hv̄t tok oh cho? v̄ba yakni okm̄á, hatak okm̄á, nanta hv̄t tok oh cho? im achi tok. Yohmi ma, V̄ba yak o minti hv̄t tok: il achi hokma, Yohmi kak o katiohmi hō yvmma hv̄ch̄ ik i yimmo ke tok oh cho? pim acha hinlv̄shke.

26. Yohmi kia moma kv̄t Chani a hopaii o okla ahni hatuk oka, Hatak ak vt tok: achi kv̄t okla h̄a il i nukshopv̄shke, achit ilap b̄ika it im anumpulit maya tok.

27. Micha Chisvs ash o im afalaminchi m̄vt, Kil ithanoshke, im achi tok. Mihma yvmmak ash osh, Yohmi ka v̄no ak osh nan isht ai v̄lh̄pesa nana hō ilv̄ppa puta ka ishit yakohmichi li hatuk vt ak hv̄chim anoloshke, achi tok.

28. Yohmi kia katiohmi hō hv̄sh ahni cho? Hatak achv̄fa hosh ushi vt in tuklo tok; atuk osh t̄ik̄ba yash o, Sv̄so ma! himak nitak a a p̄k̄vpi a holokechi a ont ish toksv̄lashke, ont im achi tok.

29. Mihma afalaminchi mvt, Yohmi la he ak ah-noshke, achi tok: yohmi tnk kia i himmakma inlan-chit anukfilli cha, ia tok.

30. Yohmi ma anonti atukla kash yvmmak inli chohmi ka ont i miha tok. Mihma afalaminchi mvt, Ia lashke, a shahli ma! achi; yohmi tuk kia ik aiyo ki tok.

31. Tuklo yvmmt katimampo kak osh iki nan aiahni tuk a yvmohmi tok oh cho? im achi tok. Mihma, Tikba yatuk á, im achi tok. Mihma Chisvs vt, Ahli mak o hvchim achi lishke, Pvblikan vhleha micha haui puta kvt hvchi tikba Chihowa apehlichika ya pit abehiha hoke.

32. Chani vt ai vlhpiesa ataya mak osh hvchim vla ka, yvmma hvch ik i yimmo tok: yohmi kia pvblikan vhleha micha haui puta kvto i yimmi tok: mihma hvchishno vt yvmmak atuk ma hvsh pisa hayvt, yvmma hvchi yimma hi vt i himmak a inlan-chit hvch ik anukfillo tok, im achi tok.

33. Nan isht vlhpisa inla ka hvsh haklashke. Hatak chuka-chvfa pehlich achvfa hosh pakvpi a hokchit tahli cha, kvti apushi isht a holitvchit apak-fobli mvt, oka-paki aivlhto a yvmma anukaka ya a kulli cha, chuka chaha ya ikbit tahli mvt, hatak na plesa vhleha ho im pota cha, yakni hopaki ho ia tok.

34. Atuk osh nan vni waya ai ona hosi ma, yvm-mak ash vni waya ka ont isha chi ho, in tishu vhleha ha hatak na plesa vhleha hash pit in tihleli tok.

35. Atuk o hatak na plesa vhleha hv in tishu vhleha hash o hoklit ishi cha, achvfa ka boli mvt, anonti achvfa ka vbi cha, anonti achvfa ka tvli isht boli tok.

36. Atuk o anonti inla laua kvt tikba atuk a i shahli ho pit tihleli tok: yvmmak ash kia yvmmak atuk mak inli ho okla itilauechi tok.

37. Yohmi kia ont ishtaiyopi fehna ma, Svso ha holitobla chi hoke, achi mvt, ushi ak o pit im pila tok.

38. Yohmi tuk kia hatak na plesa vhleha hash osh ushi ash o pisa mvt, Ilvppak osh immi mak oke: kiloh vbi cha, immi yatuk a kiloh ai ishi, ilap bika it im achi tok.

39. Mihmvt yvmmak ash o okla iti hoklit pakvpi a holokchi a ishit a kohchi cha, vbi tok oke.

40. Yohmi ka pakvpi a holokchi vt imma atuk vt onakmvt, hatak na pilesa vhleha yvmmak atuk a nanta hak o katimihcha hinla cho? im achi tok.

41. Yohmi ma, Hatak haksi vhleha yvmmak atuk ma issikkopalit tvmoli cha, pakvpi a holokchi yash hatak na pilesa vhleha inla yvto ont ai vhlpiesakma na waya ka ihima he fehna ho, im pota he mak oke, im achi tok.

42. Mihma Chisvs vt, Tvli yvmma chuk-ikbi vhleha hvrt shitilema yash o, yvmmak ash fehna hosh chukbika nutaka in tola holitopa i shahli ho tobvshke: ilvppa Chihowa hosh yvmihchi ho, pi nishkin a i na fehnvshke, achi ka Baibil a himonna kia hvch ik ai it im anumpulo chatuk oh cho?

43. Yohmi hoka Chihowa apelhlichika ya mokofit hvchim ai ishi cha, yvmmak atuk ma isht a waya he fehna oklushi o ima he mak oke, hvchim achi lishke.

44. Micha kvna hosh tvli ilvppa onitulakmvt, litoa he; amba ilap ak osh kvna ho onitula hokmvt, botolichit kancha hi oke, im achi tok.

45. Mihma na holitompa isht asha pehlich vhleha micha Falisi vhleha aiena kvrt, yvmmvrt nan isht apesa ka haklot tahli mvt, yvmmvrt ilap ak o isht anumpuli hatuk a okla akostininchit tok.

46. Yohmi kia yvmmak oka hopaii ak o okla ahni hatuk oka, yvmmak ash o iti hoklit ishi bvna tuk kia okla chito ak o i nukshopa tok.

CHAPTER XXII.

63. Itauwayachi ai impa he tok ik itvnaho ki tok nan isht vlpisa.

1. Mihma Chisvs vt anonti achakalinchit nan isht vlpisa ho isht im anumpulit,

2. Ūba apēhlichika vt hatak miko yosh ushi ohoyo itauwaya chi hō, impa im atahli hō chohmi hoke.

3. Micha im annoa tuk vhleha hā ont i howvt itauwaya ai impa ka isht vla chi hō, in tishu vhleha hā pit tihlehi tok; yohmi kia okla minta hi a ik ahno ki tok.

4. Mihma anonti tishu inla yō pit tihleli mvt, Inta! an tvbokoli impa hā atahli lishke; a wak-hobvk micha nana vlhpitvt nia puta kv̄t illi ma, nan okluha kv̄t vlhtahvshke; itauwaya ai impa ka hvsh mintashke, achit im annoa tuk vhleha hā hvsh im anolashke, im achi tok.

5. Yohmi tuk kia yvm̄mak ash o nan-isht ik ahno hosh kanima pit ilhkolit, achv̄fut im osapa ia ma, anonti achv̄fut im ai itatoba ia tok.

6. Yohmi ma akashampa kv̄to in tishu vhleha hatuk ash it̄i hoklit ishi cha, kanimachi fehnvt, polāka okla illichī tok.

7. Atuk o miko vt yvm̄mak ash o haklo mvt, anukshomunta fehna tok: mihmvt in tvshka chipota laua ka pit tihlelit, hatak vbi vhleha yvm̄mak ash o vbit tahli mvt, in tv̄maha hā hukmit tahli tok.

8. Yohmi mvt in tishu vhleha hash o, Itauwaya ai impa hamo vlhtahvshke. Yohmi kia im annoa tuk vhleha hokv̄to ahalaia hi o keyu tuk oke.

9. Yohmi hoka hina ai itafamoa puta ka itv̄nowvt, laua kv̄t kaniohmi hō hvsh pisakmvt, moyumvt itauwaya ai impa ka aya he hvsh im anolashke, im achi tok.

10. Yohmi ma tishu vhleha yvm̄mak ash osh ilhkoli mvt, hina ai itafamoa puta ka itv̄nowvt, okpu-lo, mikmvt hochukma aiena laua kv̄t kaniohmi hō pisa mvt, mominchit hoyot itahobi tok: yohmi ma itauwaya ai impa yash osh im annoa tuk vhleha hā isht alotvt kv̄nia tok.

11. Atuk o im annoa tuk vhleha hash pisa chi hosh miko vt ant chukowa mvt, hatak vt ai itauwaya aya he i nafohka ya ik fohko hosh yv̄mma asha na pisa tok.

12. Micha yvm̄mak ash o, A kana ma! katiohmi hō ai itauwaya aya he i nafohka vt iksho hō ilv̄ppa

ant ish chukowa tuk oh cho? im achi tok. Mihma yummak ash osh nan ik acho ki tok.

13. Yohmi ma miko vt in tishu vhleha hash o, Iluppa ibbak, mikmvt iyi aiena ka ho takehi cha, isht ivt kocha aiokhlilika ya ont hvsh kanchashke: yummak oka yahaya mikmvt noti ahampa aiena mak osh aiasha hi oke, im achi tok.

14. In annoa hokvto laua kia, amba vlhtoka kak osh achafoa hoka, achi tok.

64. Chisvs vt Falisi vhleha, micha Helotian okla aiena kv Sesa ya tuli holisso im itahobi ka vlhpesa chishba, ahnit im ponaklo tok, mihma Chisvs vt afalaminchit nana i miha.

15. Yumma foka ma Falisi vhleha hv ilhkoli mvt, kaniohmit yummak oka ilap im anumpa ho isht a yukacha hinla kv isht anumpulit maya tok.

16. Mihmvt ilap nan im ai ithvna vhleha ha, Helotian iksa ai itapeha ho pit in tihleli mvt, Nan ithvnanchi ma! chishno vt aiahli chia achukma chatuk; mikmvt Chihowa i hina aiahli mak o ish ithvnanchi chatuk, hatak nana kia nan isht ik chim ahobo chatuk; mikmvt hatak vt chim it i shashohli keyu chatuk a il ithaiyanvshke.

17. Yohmi hokvt kaniohmi chim anukfila hokmvt ish pim anolashke: noshkobo isht chumpa tuli holisso a Sesa yak o ima he ai vlhpesa hokma, keyukma, nanta cho? pit achi tok.

18. Yohmi kia yummvt im anukfila ai vlhpesa keyu atuk a, Chisvs vt akostininchi mvt, Katiohmi ho nan ilahobi vhleha hvchia hv imomaka hv sa pesa cho?

19. Noshkobo isht chumpa tuli holisso a ho haiak-uchí, achi tok. Mihma iskvli achvfa ho okla isht im vla tok.

20. Mihma yummak ash o, Iluppvvt kvta hak o holbvt toba ho, mikmvt kvta ho a hohchifo ho? im achi ma,

21. Sesa yak oke, okla im achi tok. Yohmi ma yummak ash osh, Yohmi hoka nana kv Sesa yak o

immi hokma, Sesa yak o hvsh imashkē: mikmvt nana kv̄t Chihowa yak o immi hokm̄vno, Chihowa yak ashke, im achi tok.

22. Yohmi ma okla haklo mvt nukhlakancha cha, yvm̄mak ash o issvt, okla ilhkoli tok.

65. Chisvs vt Satusi v̄hleha hv̄t illi yvt falamvt tana hi oka ik yimmo chatuk a isht anumpuli.

23. Mih nitak mak inli ka Satusi v̄hleha hv̄t, illi yvt falamvt tana he keyu, achi chatuk osh im ai v̄la cha, ant im ponaklot,

24. Nan ithvn̄nanchi ma! Hatak vt v̄lla yvt ik im iksho hosh illi hokma, nakfish vt tekchi atuk a itauwaya cha, itibapishi hatuk a v̄lla isht im ai ikbashke, Moses vt achi tok.

25. Yohmi tok o itibapishi hv̄t untuklo hosh pitin-takla ya maya tok: atuk o akni hash osh ohoyo itauwaya tuk osh illi tok: mihmvt v̄lla yvt ik im iksho hatuk okvt, tekchi atuk a nakfish ak o im a tosholechi tok.

26. Atuk o atukla kak osh yohmi ak inli tuk o, anonti ont atuchina kv̄t mihinli ma, mahaya mvt isht untuklo kash osh yohmi tok.

27. Atuk o ont ishtaiyopi fehna ma, ohoyo hash kia illi ak inli tok:

28. Yohmi ka yvm̄ma momvt okla itauwaya tok oka, illi yvt falamvt tani kano, untuklo ka katima mak o tekchi mak a hi oh cho? achi tok.

29. Mihma Chisvs vt afalam̄nchi mvt, Baibil, mikmvt Chihowa nan im aiahlika aiena ka hv̄ch ik ithano hatuk osh hv̄sh ashv̄chishke.

30. Illi yvt falamvt tani hokvt okla itauwaya he keyu mvt, anonti itauwaya he im v̄lhpisa he keyu, amba Chihowa im enchil v̄hleha v̄ba aiasha kak o, chiyuhma hi oke.

31. Amba illi yvt falamvt tana he yvm̄mak okvno, Chihowa hv̄t hv̄chim anumpohonli mvt,

32. Uno ak osh Eblaham in Chihowa sia, mikmvt Aisaak in Chihowa sia, micha Chekob aiena ka in Chihowa sia hoke, achi tok holisso ka hv̄ch ik it im

anumpolo chatuk oh cho? Chihowa hv̄t illi ak o in Chihowa keyu, amba okchaya ak oke, im achi tok.

33. Yohmi ma okla laua yvt ilvppa haklo mvt, nan isht ai ithvnanchi ka anukhlakancha tok.

66. Nan v̄lhpisa chinto moma i shahli.

34. Amba Falisi v̄hleha hokv̄to, yv̄mmak ash osh Satusi v̄hleha h̄a nana acha he keyuchit tahli tok a haklo mvt, okla itah̄oba tok.

35. Yohmi ma achv̄fa hosh yv̄mmut v̄ba nan v̄lhpisa ithvnanchi yosh, imonaka pisa hosh nan im ponaklot,

36. Nan ithvnanchi ma! v̄ba nan v̄lhpisa katima kak osh nan v̄lhpisa holitopa kv̄t moma i shahli cho? achi tok.

37. Mikma Chisus vt, Chitokaka chin Chihowa hoka chi chukv̄sh a mominchit, mikmvt chi shilombish a mominchit, anonti chim anukfila h̄a mominchit isht ish holitoblashke;

38. Achi ilvppak osh nan v̄lhpisa in tikba mikmvt moma i shahli mak oke.

39. Mikma atukla kv̄t yv̄mmak inli h̄o chohmi hoke; Chin chuka-panta hatak a ish holitobli kv̄t chishno ak inli chim itilauashke, achi kak oke.

40. Nan v̄lhpisa tuklo ilvppak o nan v̄lhpisa moma micha-hopaii holissochi tok aiena kv̄t a shaiyahli hoke, im achi tok.

67. Kaniohmi kak osh Kilaist vt Lewi in Chitokaka yvt, anonti Lewi ushi ahinla ka, Chisus vt a ponaklo.

41. Falisi v̄hleha hv̄t itv̄nahvt ekiya takla ma, Chisus vt im ponaklot,

42. Kilaist a katiohmi isht hv̄chim anukfila cho? yv̄mmvt kv̄ta hak o ushi o? achi ma, Lewi ak o ushi oke, okla im achi tok.

43. Mihma yv̄mmak ash osh, Yohmi ka katiohmi h̄o Lewi vt Shilombish isht anukfoyuka mvt, yv̄mmak oka hochifo cha,

44. Chitoka yvt an Chitokaka ya, Svbbak isht-impakimma ya ish binili na chin tunvp vlheha chiyi ai o hikia yo ikbi lashke, im achi tok oh cho?

45. Yohmi ka Lewi vt yvmmak oka Chitokaka hochifo tok okma, anonti yvmmt katiohmi hosh ushi ahinla cho? im achi tok.

46. Yohmi ma hatak nana hosh yvmmak ash o anumpa achvfa kia im afalaminha hinla kvv iksho ma, anonti nitak yvma ai vhlit mihinti ka himmak-ma hatak nana kia ik nukwaiyo hosh nan im ai asilhvchi kvv iksho ki tok.

CHAPTA XXIII.

68. Chisvs vt nan im ai ithvna vhleha hvv naholissochi micha Falisi aiena kvv nana isht ithvnanchi kvno im antia he, amba nana a kaniohmi yekvno okla ik iakaiyo ka hi a im apesa.

1. Yvma foka ma Chisvs vt okla chinto, mik-mvt ilap nan im ai ithvna vhleha aiena kash o im anumpuli mvt,

2. Na holissochi vhleha micha Falisi vhleha aiena kvv Moses im aiasha ya chieyashke.

3. Yohmi hoka nan okluha puta ka nana ho hvsh holitobla hi a hvchi miha hokma, yvmmak atuk ma holitoblit a hvchi yvmohmashke: amba okla nana a kaniohmi hokvno hvch ik holbo kashke: yvmmak okvt anumpuli tuk mak osh yohmi keyu hoka.

4. Shapoh weki shali ka palvma hinla ho tak-chit tahli cha, hatak puta tahchi ma onochi hoka: yohmi kia ilap ak inli kvto yvmmak oka ibbak ushi achvfona kia okla pit ishit kanvllicha hi a ahni keyu hoke.

5. Amba nana a kaniohmi puta kvv, hatak vt pisa chi kak o, yvmohmi hoke: in failaktili ya okla hopvt-

kvlli mvt, anonti im anchi aposhokvchi ma hofalohli chatuk,

6. Mikmvt impa asha ka aiasha holitopa i shahli puta kak o im ai achukmakmvt, anonti sinikak puta anukaka ma ai-o-minili holitopa i shahli puta kak o im ai achukma chatuk,

7. Mikmvt ilhpak a kanchi ai it aiokpvchi, micha hatak pvta kvt Labai, Labai, im achi aiena kak o im ai achukma chatuk oke.

8. Yohmi kia hvchishno yokvto Labai ik hvchi hohchifo kashke; hvch i shahli hvto achvfa, yummvt Kilaist ak oke. Yohmikma hvsh moyuma kvto iti-bapishi hvchia hoke.

9. Micha yakni paknaka ya hatak nana kia hvch iki hvch ik hohchifo kashke: achvfa hosh hvch Iki okvto vba yak o binili hoka.

10. Micha i shahli vhleha ik kvchi hohchifo kashke: achvfa hosh hvch I shahli, yummvt Kilaist ak oke.

11. Amba kvna hosh moma i shahli kvt hvch iba-foka hokmvt, hvchin tishu mak a hi oke.

12. Mikma kvna hosh ilefehnvchi hokmvt, aka ona he; mikma ile akanlosechi hokmvt, holitopa he oke, im achi tok.

69. Chisvs vt na holissochi micha Falisi vhleha aiena kv im a yvmohma he vhpesa hoka, na palvmmi kv onitula chi ka tikbanli anoli.

13. Amba na holissochi vhleha micha Falisi vhleha, nan ilahobi hvchia ma! na hvchim palvmma he mak oke: vba apehlichika ya hatak inla puta ka hvsh im okhishta hokvt: mikmvt hvchishno vt yvmma pit hvch ik abeho mvt, anonti pit abeha he tuk a, ant ik abeha hvch ik im ahnoshke.

14. Na holissochi vhleha micha Falisi vhleha, nan ilahobi hvchia ma! na hvchim palvmma he mak oke: ohoyo i hatak illi in chuka puta ka wehpullit hvsh tahli, mikmvt peh ilahobi kv vba pit anumpuli hosh hvsh falaiachi hoka: yohmi hokvt na palvmmi chito i shahli ho hvsh pisa hi oke.

15. Nā holissochi vhleha mikmvt Falisi vhleha, nan ilahobi hvchia ma! nā hvchim palvmma he mak oke; nā hvchim ai ithvna achvfa kia ikbi hvchi bvna kvrt, okhvta micha yakni aiena ka hvch ulhfullihinchi hoka: atuk o yvmmak ash osh tobakma, anonti aiokpuloka im vlla fehna kvrt hvchishno a chohmi tuklo hō hvsh ikbi hoke.

16. Kvna hosh anumpa kvllo a tempel ak o isht ai a miha hokvno, nana keyu; amba kvna hosh tvli holisso lakna tempel anukaka asha kak o anumpa kvllo isht ai a miha hokmvt, nan il aiahlicha he vllhpesa, hvsh achi, nā pehlichi lva hvchia ma! nā hvchim palvmma he mak oke.

17. Nan im anukfila iksho, micha lva aiena hvchia hoka, tvli holisso lakna yak okmá, keyukmvt tempel a tvli holisso lakna yvt isht a holitopa kak okmá, nanta hosh i shahli hō?

18. Micha kvna hosh anumpa kvllo a alta yak o isht ai a miha hokvno, nana keyu; amba kvna hosh vba pit isht aiokpvchi vt yvmma pakna onitonla kak o, nan il aiahlicha he vllhpesa, hvsh achi.

19. Nan im anukfila iksho, micha lva aiena hvchia ma! vba pit isht aiokpvchi ak okmá, keyukmvt alta ya vba pit isht aiokpvchi vt isht a holitopa kak okmá, nanta hosh i shahli hō?

20. Yohmi hoka kvna hosh anumpa kvllo a alta yak o isht ai a miha hokmvt, yvmmak ash o, micha nana hosh yvmma onitonla ka mominehit anumpa kvllo a isht ai a miha hoke.

21. Micha kvna hosh anumpa kvllo a tempel ak o isht ai a miha hokmvt, yvmmak ash o, micha yvmma anukaka ai ahanta aiena kak o anumpa kvllo a isht ai a miha hoke.

22. Yohmikma kvna hosh anumpa kvllo a vba yak o isht ai a miha hokmvt, Chihowa im aiasa, micha yvmma om binili hatuk ma aieninchit anumpa kvllo a isht ai a miha hoke.

23. Nā holissochi vhleha micha Falisi vhleha, nan ilahobi hvchia ma! nā hvchim palvmma he mak oke: mint, mikmvt anise, micha kvmmn aiena kvrt ont ishit pokoli kash osh hvchi kvnia hoka; yohmi mvt nan vllhpisa kvllo i shahli, nana ai vllhpiesa, micha

nana i nukhaklo, mikmvt na yimmi aiena hokvno hvsh a haksichishke: ilvppa puta hoka hvchi yvmoh-ma he vlhpesa hatuk, yohmikmvt yummak ash kia hvsh a haksicha he tuk keyu hoke.

24. Na pehlichi lva ma! shvshi osh asha hokvno hoiyvchit hvsh kohchi tuk osh, kamel okvno ishit hvsh nanvbli hoke.

25. Na holissochi vhleha micha Falisi vhleha, nan ilahobi hvchia ma! na hvchim palvmma he mak oke: isht-ishko micha ampo aiena ka paknaka yokvno hvsh kashofi hoka; yohmi kia anukaka yokvto na wehpulli micha nan ik vlhpeso aiena hosh isht alotowa hoke.

26. Falisi lva chia ma! isht-ishko ampo aiena ka anukaka yak o tikba ish kashofi ha yo, paknaka yokak heto kashofa mak inlashke.

27. Na holissochi vhleha micha Falisi vhleha, nan ilahobi hvchia ma! na hvchim palvmma he mak oke: seprlka tohbit vlhtaha yak o hvsh chiyuhmi hoka; yummak okvt paknaka yokvto pisa ka aiokli fehna ho mvhli chatuk; yohmi kia anukaka yokvto hatak illi foni, micha nan liteha okpulo moma kvt isht alotowa chatuk oke.

28. Yohmi ka hvchishno ak kia paknanli vt vlhpiesa ho hatak a hvsh im ahoba; yohmi kia anukaka yokvto nan ilahobi micha nan ik vlhpieso aiena bano hosh ishit hvchi alotowa kvt, yummak inli ho hvsh chiyuhmi hoke.

29. Na holissochi vhleha micha Falisi vhleha, nan ilahobi hvchia ma! na hvchim palvmma he mak oke: hopaii vhleha hvrt tok nan isht ithaiyana he seprlka ya hvsh im ikbi mvt, anonti hopoyuksa vhleha hvrt tok isht ithaiyana he seprlka ya hvsh aioklichi chatuk,

30. Mihmvt, Pi tikba vhleha aiasha nitak ak o il ashwa tok mak osh, hopaii puta im issish hlatvbli ka il ibatakla he tok keyu, hvsh achishke.

31. Yohmi hatuk osh hopaii puta vbi tok vhleha ha in chipota hvchia hatuk vt, hvchishno inli kak osh hvsh il ai atokolishke.

32. Yohmi hokvt hvchin tikba vhleha nan isht im vlhpisa ya hvsh alotolashke.

33. Sinti hvchia, sinti chilita isht unchululi hvchia hv̄t, katiohmi kak osh aiokpuloka ai ilbvsha ya hvsh i hlakofa hinla cho?

34. Yohmi hoka, Inta! hopaii vhleha, micha hatak hopoyuksa vhleha, mikmvt na holissochi vhleha aiena ka pit hvchin tihleli lishke; yohmi ka kanimi ka hvsh ba he, mikmvt, iti-taiyukhvna hvsh a honahlichi aiena he; mikmvt kanimi ma hvchi sinakak puta hvsh a fvm̄mikmvt, hvsh ilbvshachi kv̄t tvm̄aha puta ma isht hvsh aya hi oke.

35. Yohmi hokvt hvchishno ak o hopoyuksa puta im issish yakni pakna a hlatahampa tok, hatak hopoyuksa Ebel a im issish vt tok ai vhlit mihintit, Sakalias, Balakias ushi, yv̄mma tempel micha alta aiena itintakla ya hvsh ai vbi tok im issish ant ai vhli kv̄t, momvt hvchi onitula hi oke.

36. Ahli mak o hvchim achi lishke, Ilvppa moyuma kak osh okla himonasi ilvppa asha ka onitula he mak oke.

70. Na palv̄m̄mi kv̄t ai imma tikeli ka ithana hatuk osh Chelusalem a Chisvs vt isht yaiya.

37. Chelusalem, Chelusalem, hopaii vhleha vbi, micha auet chi kanchi tuk ma tv̄li ishit boli chia ma! akaka yosh ushi vhleha ha sinahchi nuta ya pit ai itahobi chatuk mak o, chiyuhmit chim vlla vhleha ha itahombi la he ahni li tuk nana kia, hvchishno ak osh v̄lhpesa hvch ik aiahno ho kv̄no.

38. Inta! hvchin chuka yvt hvchin chukillissvt taiyaha mak oke.

39. Himak a pilla ma, Hvs sa pisa chi keyu; amba, Chitokaka i hohchifo ho mihinti hokvt holitopa mak oke, hvsh acha chi hok mak a he oke, hvchim achi lishke, im achi tok.

C H A P T A X X I V .

71. Chisvs vt ishtaiyopi mak o tempel a a kohcha tuk osh, yummvt okpula he oke, tikbanli anoli : micha ilapa yokvt mihintikma, nan isht atukowa kv̄t yvmohma he, micha na palummi kv̄t ibafoka he miha : mikmvt nana a mihija kv̄t ont aiahla hi oka, iti v̄lhpoba fik achi kv̄t hishi toba chi hosh bokobli chatuk a nan isht apesvt anumpuli : micha ahah ! ahnit im v̄lhtaha he im apesa.

1. Yvmohmi mvt Chisvs vt kohcha mvt, tempel a issvt kanima ia tok : mihma nan im ai ithvna v̄hleha hv̄t, tempel vt toba kv̄t kaniohmi puta ka pisacha chi hosh im ai v̄la tok.

2. Mihma Chisvs vt, Na yakohmi puta moma ka hv̄ch ik peso cho ? ahli mak o hv̄chim achi lishke, Ilvppak oka tv̄li vt achvfona kia aka ik itolo ke tuk osh, it on tv̄lkanchit itonla kv̄t iksho ka hi oke, im achi tok.

3. Yvmohmi tuk o yummak ash osh nv̄nih chaha Alif paknaka ya asha ma, nan ithvna v̄hleha hv̄t lumvt im ai ona mvt, Nitak kaniohmik mak o nana kv̄t ai yakohma hi o, micha ish minta he, mikmvt yakni vt ont im ishtaiyopa he aiena kv̄t kaniohma hi a nana hosh isht atokowa hi okma, ish pim anolashke, achi tok.

4. Mihma Chisvs vt afalaminchi mvt, Ahah ! hv̄sh aiahni na hatak nana kia ik hv̄chi yoshublecho kashke.

5. Lawa hosh sa hohchifo ha ish̄it hochifo kv̄t itv̄nowa cha, Kilaist sia hoke, acha hi oka ; mikmvt lauachit yoshublich̄a he oke.

6. Yohmikma tv̄nv̄p asha, micha tv̄nv̄p asha he annoa aiena ka hv̄sh kakla hi oke : ahah ! hv̄sh aiahni cha ik hv̄chi komunto kashke : ilvppa puta kv̄t moyumvt ont a yvmohmi pulla hi oka : yohmi kia ont ai ishtaiyopi kv̄no keyu k̄isha hi oke.

7. Okla achvfa kv̄t okla mak inli ka it amokvfa he, mikmvt apehlichika achvfa kv̄t apehlichika mak

inli ka it amokvfa hi oka : yohmikma hohehvfo chinto, micha ililli puta, mikmvt yakni winakvchi aiena kv̄t yakni kaniohmi ka ai itulvt aya he oke.

8. Ilvppa puta kak osh nanukhaklo ai ishtia vmmona mak oke.

9. Yohmikma hvch issikkopa chi ka hvch ishit okla ibbak hvchi fohki, mikmvt hvch illicha hi oke ; micha sa hohehifo pulla hatuk mak o oklushi moyumvt hvchi nukkilli hi oke.

10. Yvmma fokakma ibetvbli kv̄t laua he, micha ilap bika atuk kia ishit okla ha im issa, micha ilap bika iti nukkilli hi oke.

11. Mikma hopaii ilahobi vt hiohli kv̄t laua cha, laua o yoshublicha hi oke.

12. Mikma nan ik vlvpeso bieka hatuk mak o na holitobli atuk vt kapvssvt taha kv̄t laua hi oke.

13. Yohmi kia kvna hosh achunanchit mahayvt ai vhli ka ona hok mak osh mihi yosh okchaya hi oke.

14. Yohmi ka vba apehlichika isht anumpa hanta ilvppvt oklushi moyuma ka isht im ai atokowa he mak osh yakni mominchit ai annoa he : yvmma fokak mak o ont ishtaiyopi vla hi oke.

15. Yohmi hoka nan okpvni a i nukkilli vlvpesa ka hopaii Tanel vt isht anumpuli tok a, aholitopaka ya kaniohmi foka ho o hikia na hvsh pisa hokma, kvna hosh ilvppa it im anumpuli hokmvt, akostinin-chashke.

16. Yohmikma kvna hosk Chutea ya maya tuk mvt, nv̄nih chaha puta ka pit o yihlepakma ;

17. Aboha pakna yo anta tuk vt akowvt, im aboha ya nana kia ont kohchit ik esho kashke ;

18. Mikma osapa anuka yo anta tuk mvt, falamvt im ilefoka ya ont ik esho kashke.

19. Yohmikma nitak yvmma fehna ka kvna hosh vlla i foka hatuk, micha pishechi atuk aiena hokvto im palvmma he mak oke.

20. Yohmi kia hvsh yihlepa hi a hvshstula yokma, keyukmvt nitak hullo nitak okma, ik nano ka hi a vba pit hvsh asihlashke.

21. Yvmma fehnakma na palvmmi kv̄t chinto fehna hosh takanla ke, yakni vt toba vmmona tok ai vhlit mihintit himak a ai vla ka, yvmma chohmi kv̄t

takali chatuk keyu, mikmvt himmakma nitak nana yvmma chohma he keyu ka hi oke.

22. Yohmi ka nitak yvmma chohmi ka ik falaiacho hq keyukma, hatak nana hosh okchaya he keyushke: yohmi kia nan vlhtoka vlheha ak pulla tuk mak o nitak yvmma puta kvt ik falaio ka hi oke.

23. Yvmohmikma hatak nana kia, Yake! ilvppa Kilaist vt antvshke, achi; keyukmvt yvmma antvshke, hvchim achi hoh kia, ik hvchi yimmo kashke.

24. Kilaist ilahobi vhleha, micha hopaii ilahobi vhleha aiena kvt hiohlit nan isht atokowa chinto puta mikmvt na fehna puta aiena ka okla otvnicha he; yvmohmi cha, yvmmvt yohma hinlakma, nan vlhtoka vhleha fehna atuk kia yoshublichia hi oke.

25. Inta! tikbanli hvchim anoli lishke.

26. Yohmi hoka, Yake! yvmmvt yakni kaiaka ya anta hoke, hvchim achi hoh kia, kohevvt hvch ik aiyo kashke: micha, yake! vba potvlhpo a lumaka yak o yvmmvt anta hoke, hvchim achi hoh kia, ik hvchi yimmo kashke.

27. Malvtha kvt hvshi akochaka imma yo a kohchakmvt, hvshi aiokvtula ya pit tohwikelichi chatuk oka, Hatak Ushi vt minti kak kia yvmmak inli hq chiyuhma hi oke.

28. Kanima yo nan illi vt itonla hokma, mihi yo osi puta mvt ai itahomba hi oke.

29. Na palummi nitak yvmmak atuk a in chekosikma, hvshi vt okhlilikma, anonti hvshi ninak aya mvt ik tommo ka he: mikma fochik puta kvt vba ya asht aka fohopakma, nan isht aiahlika puta vba shutik ash osh faiokvcha hi oke.

30. Yvmma fokakma, Hatak Ushi a isht atokowa kvt vba ya auet a haiaka hi oke: yohmikma oklushi moma yakni paknaka aiasha kvt yahaya he, mikma Hatak Ushi vt nan isht aiahlika micha isht a holitopaka chinto aiena ka il ai eshi hosh vba hoshonti anukaka ya mihinti na okla pisa hi oke.

31. Atuk ma yvmmak ash osh im enchil vhleha ha isht-pufa ola chinto ieshi hq tihlihinlikma, ilap atokoli tok vhleha ha a mahli ushta shutik ont ai vhli achvfa ka vhlit ivt in tvnnvp pit a fullota ka a hoyot itahohomba hi oke.

32. Yohmi ka fik vpi nan isht vlhpisa ka hvsh ai ithvnashke. Yvmmak okvt hishi toba chi hosh bokblit tahakma, tofa yvt olanlosi vla ka hvsh ithana chatuk:

33. Yohmi hokvt nā yakohmi puta ka hvsh pisakmvt, ai vlaš hosi, okhissa ak kia ai itikonofa hoka, hvsh ithanashke.

34. Ahli mak o hvchim achi lishke, Himak a okla aasha ilvppvt ont ik taho kisha hō, nā yakohmi puta kvt ont aiahla chi hoke.

35. Uba shutik micha yakni aiena kvtō ont ai iksho ka he, amba vno vm anumpa puta hatuk vto ont ai iksho ka he keyu hoke.

36. Yohmi ka nitak yvmmak a he, micha hvshi kanvlli vlhpisa a he aiena hokvno, hatak nana hosh, mikmvt enchil puta vba aiasha mak osh pit ithana keyu hō, amba Aki ak bano hoke.

37. Yohmi ka Noah hvv ahanta nitak a kaniohmi tok ma, Hatak Ushi vt mhinti kak kia yvmmak inli hō chiyuhma hi oke.

38. Oka falama yvt ik aiyo kisha nitak foka ma, impa micha nan ishko, itauwaya mikmvt itauwaya he im vlhpisa aiena hosh aiasha na Noah hvv peni chukowa he nitak vt ona tok,

39. Yohmi ma ik ithano hosh okla aiasha na oka falama yvt vla cha, mominchit ishit kaiyanchi tok a: Hatak Ushi vt mihinti kak kia yvmmak inli hō chiyuhma hi oke.

40. Yvmma fokakma tuklo kvt osapa ya ashwa tuk ma; achvfa hō ai eshi na achvfa kvtō anta he.

41. Ohoyo tuklo kvt nana a botoli a botoli kvt ashwa tuk ma; achvfa hō ai eshi na achvfa kvtō anta hi oke.

42. Yohmi hoka hvchishno vt hvchin Chitokaka yvt ai vla he hvshi kanvlli vlhpisa hā hvsh ithana keyu kvt, okchvt hvsh hoyashke.

43. Yohmi kvt hatak chuka-chvfa pehlichy yatuk mvt hvshi kanvlli vlhpisa kaniohmi kak o nā hukopa yvt aya hinla ka ithana hatuk okmvt, okcha pulla cha, im aboha yatuk mvt tiwa hi a ahna he tuk keyu, ilvppa hvsh ithanashke.

44. Yohmi koka hvchishno ak kia hvchim vlhtah-ashke: yvmmak a he hvch ik aiahno hvshi kanvlli vlhpisa takla kia, Hatak Ushi vt vla hi oke.

45. Yohmi ka kvt hak osh tishu aiahli, hopoyuksa achukma aiena tuk o, i shahli hvit ilap in chuka chvfa ya apesvchit ont ai vlhpiesakma ilhpak ipihinta chi ka, atokoli tok oh cho?

46. Yvmohmi hosh ahanta ho, i shahli hatuk vla cha ant pisa chi ka, tishu yvmmt na yukpa hi oke.

47. Ahli mak o hvchi miha lishke. Yvmmak atuk ma nana im asha ka moma apesvchi mak o ikba he oke.

48. Yohmi tuk kia tishu yvmmak ash osh ik vlhpeso kish chukvsh anyakaka, A shahli hvit ai vla he tuk vt vbanvblichishke, achi;

49. Yohmi cha tishu bika vhleha hash o bolit ishtia, yohmi mvt ishkot haksi vhleha ha it ibai im-
pvt ibai ishkot ahanta hokmvo;

50. Tishu yvmma i shahli hatuk vt, yvmmak ash osh vla chi ik ahno nitak, mikmvt ik akostinincho i hvshi kanvlli vlhpisa ho vla hi oke. •

51. Yohmikmvt yvmmak ash o chanlit ita hokofi cha, nan ilahobi vhleha isht ai im vlhtoba mak o iba-fohkit im apesa he: yvmmak oka yahaya micha noti ahampa aiena he mak oke.

CHAPTA XXV.

72. Chisvs vt nitak ishtaiyopi vla hi oka isht anumpuli: yohmi kvit i yimmi aiahli vhleha hoka a kanimihchit ilap o apelihchika ya isht ona he, mikmvt vbanvpuli keyu hokvno aiokpuloka pit kancha he aiena kvit anoli kvit, ohoyo himita hatak haleli keyu pokoli, micha talent aiena ka nan isht apesvt anumpuli.

1. Yvmma fokakma vba apelihchika yvt ohoyo himithoa hatak ik halelo pokoli hosh pvla sholit, hatak himona itauwaya chi ka afamvt ilhkoli tok o chohma he.

2. Mihmvt tahlapi hosh hopoyuksa yokma, anonti tahlapi kvto ik hopoyuksho yvt tok.

3. Ik hopoyukso vhleha hatuk ash osh pvla ha okla ishi kia, bila yano okla ik esho ki tok.

4. Amba hopoyuksa hatuk okvto bila yvt aivlhto a abeha ho pvla ha aieninchit okla ishi tok.

5. Hatak himona ohoyo itauwaya chin tuk ash osh ile svlahachit anta na nosilhhvt taha cha okla nusi tok.

6. Atuk o ninak ont iklvnna ma tahpahanla kv, Inta ! hatak himona ohoyo itauwaya chin tuk ash osh mintishke, ivt ont oh afamá, achi tok.

7. Yohmi ma ohoyo himithoa yvmmak ash osh ta-nit im pvla ha okla aiiskiachi tok.

8. Mihma ik hopoyukso vhleha hash osh hopoyuk-sa vhleha hash o, Pim pvla hv mosholi hoka, hvchi bila ya hvsh pipetashke, im achi tok.

9. Yohmi kia hopoyuksa vhleha ash osh afalamin-chi mvt, Yohma he keyu ; yvmmak keyukma, pishno micha hvchishno aiena ka hvpin ona he heyu hoka : amba ivt kanchi vhleha hak o ont hvsh in chumpa he, hvsh ahna he vlvhesvshke, achi tok.

10. Atuk o chumpvt ilhkoli takla ma, hatak himo-na itauwaya chin tuk ash osh vla tok ; mihma im vlv-taha tuk vhleha hash osh apihvt ai itauwaya ya pit abeha na okhissa yvt vlvkvma tok.

11. I himmak o anonti ohoyo himithoa kashapa kash osh ai vla mvt, Chitokaka ma ! Chitokaka ma ! ish pin tiwashke, achi tok.

12. Yohmi kia yvmmak ash osh afalaminchi mvt, Ahli mak o hvchim achi lishke, Hvch ithanali keyush-ke, achi tok.

13. Yohmi ka Hatak Ushi vt ai vla he nitak, mik-mvt hvshi kanvlli vlvpisa aiena hoka pit hvsh ithana keyu hokvt, okchvt hvsh hoyashke.

14. Uba apelihchika yvt, hatak osh yakni hopaki nowrt aya chi hosh in tishu vhleha ha itahobi cha, nana im asha tuk vt ibbak fohki tok o chohmi hoka.

15. Mihmvt achvfa ho talent tahlapi ho ima mvt, anonti achvfa ka tuklo ho ima, anonti achvfa ka achv-fa ho ima tok ; hatak vt kanimibcha hinla aiyuka kv ai vlvhtokowa mak o ima tok ; micha mih mak inli ho nowrt aya tok.

16. Yohmi ma talent tahlapi ishi tuk ash osh ia mvt, yummak ash o isht itatobvt, anonti talent tahlapi mak inli ka isht ikbi tok.

17. Mihma tuklo ho ishi tuk ash ikia, yummak ash inli ho chohmit tuklo mak inli ka isht ahayuchi tok.

18. Amba achvfa ho ishi tuk okvto ia mvt, yakni o ont kulli cha, i shahli in tvli holisso atuk ash luhmi tok.

19. Atuk o hopakit taiyaha ma tishu vhleha yvma i shahli hash osh vla cha, yummak ash i hotinvrt pisa tok.

20. Yohmi ma talent tahlapi ishi tuk ash osh, anonti talent tahlapi mak inli ka aieninchit isht vla mvt, Chitokaka ma! yake! talent tahlapi ho is svma tok: yummak atuk a talent tahlapi mak inli ka isht ahayuchi li tuk oke, achi tok.

21. I shahli hash osh, Ulhpiesvshke, tishu aiahli achukma chia ma! nana kanomosi ka aiahli chi achukma hoka, nana lava pehlich i a chikbi la chi hoke: chi shahli nan isht im itaiyukpa ya ish chukowashke, im achi tok.

22. Mihma talent tuklo ho ishi tuk ash kia vla mvt, Chitokaka ma! yake! talent tuklo ho is svma tok: yummak atuk a talent tuklo mak inli ka isht ahayuchi li tuk oke, achi tok.

23. I shahli hash osh, Ulhpiesvshke, tishu aiahli achukma chia ma! nana kanomosi ka aiahli chia achukma hoka, nana lava pehlich i a chikbi la chi hoke: chishahli nan isht im ilaiyukpa ya ish chukowashke, im achi tok.

24. Yohmi ma talent achvfa ho ishi tuk ash osh vla mvt, Chitokaka ma! hatak palvmmi chia chatuk; chishno ak osh ish hokchi keyu kia ish ai vmo chatuk; mikmvt chishno ak osh ish mvslich i tuk keyu kia ish pehli chatuk oke, chit hanali tuk:

25. Yohmi hatuk osh sa nukshopa cha, ivt chin talent a yakni anyka yo luhmi li tuk oke: yake! chimmi hatuk vt yak chin tonlvshke, achi tok.

26. Mihma i shahli hash osh afalaminchi mvt, Tishu haksi nan intakobi chia hvrt, vno ak osh hokchi li tuk keyu kia ai vmo likmvt, anonti vno ak osh a mvslich i li tuk keyu kia a pehli li chatuk a, ish ithana;

27. Yohmi hokvt an tvli holisso a tvli holisso abohli ya ont ish bohla he: yohmi tuk ma minti li kv̄t v̄m̄mi atuk micha ushi atuk a aieninchit ishi la he tuk oke.

28. Yohmi hoka talent a oh im ai eshi cha, talent pokoli ishi kak o oh imá.

29. Kv̄na hosh ishi hok mak o ima na lauv̄t im aiasha hi oka: amba ik im iksho hatuk okv̄no ishi tuk ash kia, im ai isha he oke.

30. Mikmv̄t tishu ik ahobo yokv̄no kocha aiokhli-
lika mak o pit hv̄sh kanchashke: yv̄mmak oka yaha-
ya micha noti ahampa aiena mak a hi oke, im achi tok.

73. Chisvs vt vla cha nana apesa hi okvt isht anumpuli.

31. Hatak Ushi vt, enchil v̄hleha moma kv̄t apiha ho, ilap isht aholitopaka il ai ishit vla he, yohmikmv̄t im aiasha holitopa yatuk ma om binila he oke.

32. Yohmikma itikba ya oklushi moma kv̄t ai ita-
hoba he: yohmikma yv̄mmak ash osh yv̄mma acha-
folichit iti filamohlichy kv̄t, chukfv̄lhpoba apesv̄chi vt
chukfv̄lhpoba ya isi kosoma iti filamohlichy chatuk
mak o chiyuhma he.

33. Mikmv̄t chukfv̄lhpoba ya im ibbak isht-impak
imma yak o ashachikmv̄t, amba isi kosoma yokv̄no
v̄lhfv̄bekimma yo ashacha he.

34. Yohmikmv̄t Miko ash osh im ibbak isht-impak-
imma asha kash o, Aki i holitopa hv̄chia ma! ho
minti, v̄ba apehlichika yakni vt ik tobo kisha mak o
hv̄chim v̄lhtaha tok vt hv̄sh ai ahantashke.

35. Uno vt sa hohchv̄fo ma, ilhpak a hv̄s sv̄peta
tok: sa tukshila ma, nana ho hv̄s sv̄shkochechi tok:
hatak ik ithano sia hatuk a, aboha ya ik chukowa, hv̄s
sv̄m aiahni tok:

36. Sa nipi bano ma, nana hv̄s sa fohkichy tok: si
abeka ma, ant hv̄s sa pesa tok: v̄no vt aboha kv̄llo
foka li ma, ant hv̄s sa nowa tok okvt, im acha he.

37. Yohmikma hopoyuksa v̄hleha hash osh im
afalaminchy kv̄t, Chitokaka ma! katiohmi kash o
chishno vt chy hohchv̄fo tuk a, e chy pisa cha nana e

chipeta tok o? micha chi tukshila tuk a, nana e chish-kochechi tok o?

38. Katiohmi kash o hatak ik ithano chia hatuk a e chi pisa cha, aboha ya ik chukowa, e chim aiahni tok o? mihmvt chi nipi bano tuk a, nana e chi fohki-chi tok o?

39. Micha katiohmi kash o chi abeka, mikmvt aboha kullo ish foka aiena tuk a, e chi pisa cha, a chi nowa tok oh cho? acha he.

40. Mikma Miko vt afalaminchikmvt Ahli mak o hvchi miha lishke, Itibapishi li vhleha yakohmi ka moma ik lauwo achvfona ka kanihmi ho hvsh ai i yvmohmi tuk okvt, vno ak o hvs sa yvmohmi mak atuk oke, im acha hi oke.

41. Yohmikmvt ibbak vlhfvbeka imma asha tuk ash kia, Issikkopa he vlhpesa hvchia hv, a filvmmi luak ataha iksho, Setan micha imi shilombish okpulo vhleha aiena im vlhtaha tok mak o, hvsh ilhkolashe.

42. Uno vt sa hohchvfo ma, ilhpak nana kia hvch ik sapeto ki tok: sa tukshila ma, nana kia hvch ik svshkochecho ki tok: hatak ik ithano sia hatuk a, aboha ya ik chukowa hvch ik sv ahno tok: si abeka, micha aboha kullo foka li aiena ma, ant hvch ik sa nowo ki tok okvt, im acha he.

44. Yohmikma yvmmak ash kia afalaminchi kv, Chitokaka ma! katiohmi kash o chi hochaiyaf, mikmvt chi tukshila, micha hatak ik ithano chia, mikmvt chi nipi bano, chi abeka, mikmvt aboha kullo ish foka aiena ka e chi pisa cha ke chi apelacho ke tuk oh cho? acha he oke.

45. Yohmikma yvmmak ash osh afalaminchikmvt, Ahli mak o hvchi miha lishke, Yakohmi ka moma ik lauwo achvfona kia kanihmi ka a hvch ik i yvmohmo tok mvt, vno ak o hvch ik sv a yvmohmo tok mak oke, acha hi oke.

46. Yohmikma yakohmi kash osh ai issikkopa bilia mak o pit ilhkola he, amba hopoyuksa yokvto aiokcha-yvt bilia yq ia hi oke.

CHAPTER XXVI.

74. Na pehlichi vbleha hvt it afama cha Chisvs a vba chi
kvt isht anumpuli.

1. Atuk o yakohmi tok; Chisus vt anumpa iluppa
moma ka ahanchit ont in taiyaha mvt, nan im ai
ithvna vhleha hash o,

2. Nitak tuklokma vbanvblit-ontia impa hv̄t ašha
chi, mikma Hatak Ushi vt iti-taiyukhv̄na ahonvhlit
illa chi mak o, ish̄it okla ibbak fohka chi ka hv̄sh
ithaiyanvshke, im achi tok.

3. Yvmma foka ma nā holitompa isht ašha pehlichī v̄hleha, mikmvt nā holissochi v̄hleha, mikmvt okla hā i hochitoka v̄hleha aiena kv̄t nā holitompa isht ašha pehlichī Kaiafas hochifo hō im aboha holitopa yā ai itynaha tok.

4. Mihmvt haksichi hosh Chisvs a okla ishi cha,
vba hinla kvv it im anumpulit maya tok.

5. Yohmi kia, Impa chito ¹asha nitak ak ²o keyu ho, yummak keyukma okla hvt ³i sanali fehna hinla hoke, achi tok.

75. Ohoyo hosh nan-ahama ya Chisvs noshkobo isht im a
hummi.

6. Atuk o Chisvs vt Beteni a Saimon leplosi vbi
vt tok in chuka ya asha ma,

7. Ohoyo pash-ahama holitompā fehna alabasta
itombushi achvfa hō ishi kv̄t im ona mv̄t, impa hosh
asha ma, noshkoba a ont o fohobli tok.

8. Yohmi kia nan im ai ithvna vhleha hash osh pisa kv̄t, okla ik im vllpeso fehna m̄vt, Katiohmi mak o ilvppvt yakohmit okpulo cho?

9. Pash-ahama ilvppvt lawa kia isht vlhtoba cha, ilvrsha vhlaha ha i holhpela hinla tuk oka, achi tok.

10. Chisvs vt akostininchi mvt, Nanta katiohmi hō ohoyo hā hvsh ataklvmnichī cho? ilvppak okvt nan achukma mak o isht v̄m ai yvmihchi hoka.

11. Ilbvsha yokvto hvchīm āsha bilīa chā tuk: amba vno yokvto hvch ībatakla lī bilīa keyushke.

12. Pash-ahama ilvppa sa haknīp ā o fohobli hokvt, sa holopa chī kak o v̄m atahli hosh yvmihchi hatuk oke.

13. Ahli mak o hvchī miha lishke, Yakni moma ka kaniṃa fehna yō vbanumpa ilvppvt isht ai anu-lumpakma, nana ka ohoyo ilvppvt yakohmichi tuk ā yvmmak ash o isht ithaiyana hī ā, anohowa he oke, im achi tok.

76. Chutas Iskaliot vt Chisvs ā tvli hvta pokoli tuchina hō ishit kanchi.

14. Yvmma foka ma auah tuklo tuk ash achvfv̄t Chutas Iskaliot hohchifo hosh ivt nā holitompa isht āsha pehlichī v̄hleha hash o im ona tok.

15. Mihmvt, Yvmmak oka ishit hvchīm issa la chī ka nanta hō hv̄s sv̄ma hinla cho? yvmmak ash o im achi tok. Mihma tvli hvta boshulli pokoli tuchina hī o okla ī kahli tok.

16. Yohmi ma nitak yvmma ai v̄hliṭ māhaya ka yvmmak ash o kaniohmichit ishit im issa he ai v̄lh-piesa ka akostininchi bahana tok.

77. Chisvs vt nan im ai ithvna v̄hleha hā nan vbanvblit-ontia it ibai impa; mihmvt opiaka nā holitopa impa isht v̄lh-pisa ka apesa.

17. Yohmi tuk o pvska ik shatv̄mmo v̄pa nitak v̄mmona hō nan ithvna v̄hleha hv̄t Chisvs ā im ai ona mvt, V̄banvblit-ont ia ish impa chī ka, katima yak o ont e chim ai atahla hī ā ish ahni cho? im achi tok.

18. Mihma yvmmak ash osh, Ivt tv̄maha hā hvsh ona mvt, hatak yvmmak o hvsh im ona cha, Nan ithvnanchi vt, Nitak vt v̄m ai onā hosishke: chin chuka ak o nan v̄m ai ithvna v̄hleha hā pehlichit

vbanvblit-ontia ya a holitobli la chi hoke, achi kano, hvsh im achashke, achi tok.

19. Yohmi ma nan ithvna vhleha hash osh, Chisvs vt ai im atokoli tuk mak o yvmohmi tok; micha vbanvblit-ontia ya okla atahli tok.

20. Yohmi ma ont opivt taha ma, auah tuklo kash o pehlichu cha impa chi hosh binili tok.

21. Atuk osh okla impvt maya ma, Ahli mak o hvchi miha lishke, Hvsh achvfona kvv svshit okla ha hvs svv issa chi hoke, achi tok.

22. Mihma okla nukhaklo fehna mvt, achvfaiyukvt momvt, Chitokaka ma! vno ak oh cho? im achi tok.

23. Mihma yvmmak ash osh afalaminchi mvt, Kvna hosh ampo a ibbak a pit svb ai okvchikmvt, mihi yosh svshit okla ha vm issa chi mak oke.

24. Kaniohmit ishit holihiso tok mak o Hatak Ushi vt a yvmohmi hoke: amba Hatak Ushi a ishit inla ya im issa hatak okvto im palvmma chi mak oke; hatak yvmmak okvt ik tobo tok okmak osh im achukma he tuk mak a chi hoke, achi tok.

25. Yohmi ma ishit inla ya im issa Chutas ash osh afalaminchi mvt, A shali ma! vno ak oh cho? achi ma, Ahli, ish mihvshke, achi tok.

26. Mihmvt okla impa hosh maya ma, Chisvs vt pvska ya ishi cha, vba pit aiokpvchi mvt, tushahlichu cha, nan ithvna vhleha hash o pit ima mvt, Ilvppvt sa haknip mak oke; ishit oh vpa, achi tok.

27. Mihmvt isht-ishko ya ishi cha vba pit aiokpvchi mvt, yvmmak ash o pit ima mvt, Hvsh moma kvv hvsh ishkashke.

28. Ilvppak okvt svssish nan isht vlvhvisa himona, laua kvv nan ai ashvchika puta isht i kashofa he mak o, hlatapa hatuk oka.

29. Yohmi kia himak a pilla ma pakvpi vnit waya ilvppa ak ishko mak atuk osh himonvchit Aki apvchika ya a hvch ibai ishko la he nitak mak a hi oke, hvchim achi lishke, achi tok.

78. Chisvs vt kohchvt nvni^h chaha Alif a ona; mihmvt Pita yvt ik ithano miha chi ka tikbault anoli.

30. Mihma vba isht taloa ya okla talovt issa mvt, okla kohchvt nvni^h Alif a pit ilhkoli tok.

31. Yohmi ma Chisvs vt yvmmak ash o, Himak ninak a vno ak atuk mak a hvsh moma kv^t hvch ibetvbla chi hoke. Chukfvlhpoba apesvchi a issot kanchi likma, chukfvlhpoba atuk vt itafimimpvt aya he, achi hosh holisso hatuk oka.

32. Yohmi kia falamvt tani li hayo kvto, hvchi tikba Kalili a ona la hi oke, im achi tok.

33. Pita yvt afalaminchi mvt, Moma kv^t chishno ak atuk mak o ishit ai ibetvbli kia, vno yokvto nitak nana si ibetvbla he keyushke, im achi tok.

34. Mihma Chisus vt, Ahli mak o chi miha lishke, Himak ninak a akaka yvt ik olo kisha ho, hituchina ha chik svthano ka ish miha chi hoke, im achi tok.

35. Pita yash osh, Chi awant sulla chi ik nana kia, ak chithano miha la he keyushke, im achi tok. Mihma nan ithvna vhleha hv^t momvt yvmmak inli ho miha tok.

79. Chisvs vt Ketsemane osapushi ont chukowa cha vba pit anumpuli.

36. Yvmma foka ma Chisvs vt yvmmak ash o pehlichⁱ cha yakni Ketsemane hohchifo ho ona mvt, nan im ai ithvna vhleha hash o, Ivt yvmma ont vba pit anumpuli li takla ka, ilvppak inli ho hvsh chiyashke, im achi tok.

37. Mihmvt Pita, micha Sebete ushi tuklo aiena kvno pehlichⁱ cha ia tok; mihmvt nukhaklo fehvt i wekit kvnia tok.

38. Yohmi mvt yvmmak ash o, Sa shilombish vt nukhaklo fehna, illa he ak kia chiyuhmishke: ilvppak inli ho chi^yvt hv^s svb ai okchashke, im achi tok.

39. Mihmvt achakalit ivt misha ituma ona mvt, hlipvt itula cha, vba pit anumpuli mvt, Aki ma! yohma hinla yoba hokma, isht-ishko ilvppvt a kanvl-

lashke : yohmi kia vno ak osh ahni li kak keyu, amba chishno ish ahni kak ashke.

40. Mihmvt mintit nan ithvna aiasha kash o vla mvt, nusi hosh maya na ant pisa cha Pita yash o, Hvs svb ai okcha na hvshi kanvlli achvfa ka ona hinla keyu mak oh cho?

41. Okchvt vba pit hvsh anumpohonli cha, ayoshuba ya hvch ik iba chukowo kashke : shilombish okvto im vltaha ho mvhli, amba nipi ak osh tikambishke, im achi tok.

42. Anonti atukla ma ia cha, ont vba pit anumpuli mvt, Aki ma ! isht-ishko ilvppa ai ishko li ha yo keyukma, a kanvlla he keyu hokma, chishno nana ish aiahni ka yvmohmashke, achi tok.

43. Micha vla mvt, anonti nusi hosh maya na ant pisa tok : nishkin ak osh weki hatuk okvt.

44. Mihma anonti issvt ia mvt, ont atuchina ma vba pit anumpuli kvv, anumpa yvmmak ash inli ho miha tok.

45. Yohmi mvt nan im ai ithvna aiasha kash o vla mvt, Himmak mak o mayvt nusit hvsh fohashke ; inta ! hvshi kanvlli vlpisa hvv ai ona mak oke ; yohmi ka Hatak Ushi a haksichit nan ashvchi vhleha ibbak a fohka chi mak oke.

46. Ho tani, kiloh ilhkoli, yake ! sa haksichit okla ibbak sa fohka chi hokvt olanlosi vlvshke, im achi tok.

30. Chutas Iskaliot vt hatak na-halupa sholi bieka ho pehlichu cha Chisvs a ont ishi.

47. Mihma anumpohonli moma ho, auah tuklo atuk achvfa Chutas vt na holitompa isht asha pehlichu vhleha micha okla i hochitoka vhleha aiena im anumpa ho okla chinto bvshpo falaia puta, mikmvt iti tvptua aiena sholi ho, pehlichu cha vla tok.

48. Yohmi kvv haksichit okla ibbak fohka chi, yvmmak okvt isht akostinincha hi a im anoli kvv, Kvna ho ont i suksowa likma, yvmmak osh mih mak a chi hoke ; kvvlohit hvsh ishashke, achi tok.

49. Mihmvt yvmmak ash osh Chisvs a im ona mvt, A shahli ma ! na chi yukpashke, achi mvt, i suksowa tok.

50. Mihma Chisvs vt, A kana hvt katiohmi ho ish la cho? im achi tok. Yohmi ma okla ai onvt Chisvs ash o iti hoklit ishi tok.

51. Yohmi ma Chisvs a apehvt aya tuk vt achvfa hosh ibbak atuk ma i bvshpo falaia ya pit ishit shufi mvt, na holitompa isht asha pehlich i in tishu ho ishit fahamvt, haksobish a chanlit tvbli tok.

52. Yvmma foka ma Chisvs ash osh, Chim bvshpo falaia afalaminchit afohka ya pit ish fohkashke: kva hosh bvshpo falaia yo ishi hokvto, bvshpo falaia yo isht illa he bano hoka.

53. Himonasi ak kia Aki a pit im asilhha li hok ma, ashalika enchil vhleha lechvn auah tuklo atampa ka auet vma hinla ka ik chim ahobo cho?

54. Yohmi hokma katiohmi hosh yakohma hi vt tok vt Baibil vt ont aiahla hinla cho? im achi tok.

55. Chisvs vt hvshi kanvlli vhlpisa yvmmak inli ho okla laua yash o, Hatak hukopa yo ayvt i kohcha ho chiyuhmit bvshpo falaia, mikmvt iti tvptua aiena sholi hosh hvs svsha chi kvv hvsh itvnowa cho? tempel anukaka ya nana ai ithvnanchit nitak moma hvch itintakla binili li ka iti hoklit hvch ik sasho chatuk oke, im achi tok.

56. Yohmi kia hopaii vhleha hvt holissohonchi tok a ont aiahla chi mak o, ilvppa moma kvv yakohmi tok. Yohmi ma nan ithvna vhleha hatuk vt momvt yvmmak ash o issvt yihlepa tok.

81. Okla hvt Chisvs a ishi mvt na holitompa isht asha pehlich i in chuka holitompa isht ona mvt, okla hash osh kalakchishit on tvstua.

57. Yohmi ma Chisvs a iti hoklit ishi tuk vhleha hash osh yvmmak ash o ilaue lit i vt na holitompa isht asha pehlich i Kaiasfas a isht im ona tok; yvmmak o na holissochi vhleha mikmvt hochitoka vhleha aiena kvv ai itvnavvt maya hatuk oka.

58. Yohmi ma Pita yvt auet i mishemanchit pit iakaiyvt nahayvt na holitompa isht asha pehlich i im aboha holitopa hatuk ma ont chukowvt, ont ishtaiyopi ka pisa chi hosh tishu vhleha ha takla ont binili tok.

59. Mihma nā holitompa isht āsha pehlichi v̄hleha, micha hochitoka v̄hleha, mikmvt nan-apesa moyvma kv̄t Chisvs ā v̄ba chī kv̄t anumpa ik āhlo isht atokola hi ā hoyot aiasha tok.

60. Yohmi kia ik ahayucho tok. Anumpa ik āhlo isht atokli hokv̄to lauv̄t ai ahanla mv̄hli kia, ai v̄lhpesa hi ā ik ahayucho tok, Ont ishtaiyopi ma anumpa ik āhlo isht atokoli vt tuklo hosh v̄la tok;

61. Mihmvt, Ilv̄ppvt Chihowa in tempel ā okpv̄ni li tuk mvt, anonti nitak tuchinakma ikbit tahli la hinla hoka, achi kv̄no, achi tok.

62. Yohmi ma nā holitompa isht āsha pehlichi vt wakaya mvt, afalaminchit, Afalaminchit nana kia chik acho cho? nanta mak o yakohmit ishit chi atokoli cho? im achi tok.

63. Yohmi kia Chisvs vt nana ik acho ki tok. Mihma nā holitompa isht āsha pehlichi vt anumpuli mvt, Chishno ak osh Kilaist Chihowa Ushi chia hatuk okmvt, keyukma nana hatuk okmvt, ish pim anola he mak o Chihowa okchaya pulla ka isht a chim apesa lishke, im achi tok.

64. Mihma Chisvs vt, V̄lhpesa ish mihv̄shke: yohmi kia, Himak a pilla ma Hatak Ushi vt nan okluha im aiya im ibbak-ishtimpakimma yā binili, micha v̄ba hoshonti anukaka mihinti aiena hō hv̄sh pisa hi oke, hv̄chim achi lishke, im achi tok.

65. Yohmi ma nā holitompa isht āsha pehlichi ash osh im ilefoka, im anchi aieninchit ita hlilv̄ffi mvt, Chihowa ik ahobalot anumpa hā anumpulishke; himmakma nan-isht ai atokowa katiohmi hō iloh ahna hinla cho? inta! himak okv̄no Chihowa ik ahobalot anumpuli kā hv̄chishno vt hv̄sh hakloshke.

66. Katiohmi hv̄chim anukfila cho? achi ma, okla afalaminchi mvt, Illa he ak o v̄lhpesa hoke, achi tok.

67. Yohmi mvt nashuka yā on tuftua mvt, ibbak ā bonullit isht isso mvt, kanimi kv̄t ibbak ā ishit pasalichi mvt,

68. Kilaist chia ma! kv̄na hosh chisso hokma, akostininchit pim anoli, achi tok.

82. Pita yvt in Chitokaka ya ik ithano il ahobi : yohmit ashvchi tok vt nukhāklo.

69. Yohmi ma Pita yvt aboha holitompa kocha ya asha tok : mihma ohoyo himita yosh yvmmak ash o vla mvt, Chishno ak kia Chisvs Kalili vta ya awant ish aya kamo, achi tok.

70. Yohmi kia moma itikba yatuk ma ik ithano ilahobit, Nana ish miha hoka, ak akostininchoshke, achi tok.

71. Micha kohchvt ivt apishia ona ma, ohoyo himita inla yosh pisa mvt, yvma maya kash o, Ilvppak kia Chisvs Nasalet vta ya awant aya kamo, im achi tok.

72. Mihma anonti anumpa kullo isht il onochit ik ithano ilahobit, Hatak yvma ithana li keyushke, achi tok.

73. Atuk o in chekosi ma bilikasi hiohmaya tuk ash osh ai vla mvt, Pita yash o, Chishno ak kia okla yvma ish ib ai achvfa yatuk o pullvshke ; chim anumpa hvv chi otvnichi hoka, im achi tok.

74. Yohmi ma yvmmak ash osh, Hatak yvma ithana li keyushke, achit ik ahobalot anumpulit anumpa kullo isht il onochit ishtia, tok. Mihma chekosi mak inli ho akaka yvt ola tok.

75. Yohmi ma Pita yash osh, Akaka yvt ik olo kisha ho, hituchina ha chik svthano ish miha chi hoke, im achi tok, Chisvs im anumpa hash pit ithaiyana tok. Mihmvt kocha ia cha, yahaya fehna tok oke.



CHAPTA XXVII.

83. Na holitompa isht asha pehlich i vhleha hash osh Chisvs a Pailat Loman i miko ak o isht im ona ; mihma Chutas Iskaliot vt ile nuksiteli.

1. Ont onnvt taha ma na holitompa isht asha pehlich i vhleha hvv moma, micha okla i hochitoka vhleha

aiena kv̄t Chisv̄s a v̄ba chi hokv̄t isht it im anumpu-
lit maya tok.

2. Micha yv̄mmak ash o okla takchi mvt, ilaue-
lit isht iv̄t, nahullo miko Pantiv̄s Pailat ibbak a ont fohki
tok.

3. Yv̄mma foka ma yv̄mma ishit okla ha im issa
tuk Chutas ash osh yv̄mma illi issa na pisa mvt,
inlv̄t im anukfila cha, tv̄li hv̄ta boshulli pokoli tuchina
kash o falaminchit na holitompa isht asha pehlich-
i v̄hleha micha hochitoka v̄hleha aiena ka isht im ona
mvt,

4. Nan ashv̄chi keyu issish o ishit okla ha im issa
li hokv̄t ashv̄chi lishke, achi tok. Mihma, Yv̄mmv̄t
nanta ishit pi ahalaia cho? yv̄mmak okv̄no chishno
ak inli hosh ish pisashke, achi tok.

5. Mihma tv̄li hv̄ta boshulli a tempel anukaka ya
pit fohobli cha, kocha ia mvt, ont ile nuksiteli tok.

6. Yohmi ma na holitompa isht asha pehlich-
i v̄hleha hash osh tv̄li hv̄ta boshulli ash ishi mvt, Tv̄li
holisso ai itahoba holitopa ya pit fohka he v̄lhpesa
keyu, issish o isht v̄lhtoba hatuk oka, achi tok.

7. Yohmi mvt okla isht im anumpulit maya cha,
oklushi inla hatak puta ka a holopa hi vt shuti-tv̄na
im osapa yo ishit chumpa tok.

8. Yv̄mohmi hatuk o osapa yv̄mmv̄t, Osapa issish
hehchifo tok vt himak nitak a moyuma hoke.

9. Yv̄mohmi ma hopaii Chelemaias vt anumpuli
mvt, Israel ushi v̄hleha hv̄t ai v̄lhtoba he okla apesa
tok mak o ai v̄lhtoba he v̄lhpesa tuk v̄lhtoba tv̄li hv̄ta
boshulli pokoli tuchina ka okla ishi tok.

10. Micha Chitokaka yvt vm apesa tok mak o
shuti-tv̄na atuk im osapa yo ishit atobbi tok; achi tok
a ont aiahli tok.

84. Pailat vt Chisv̄s a i hotofi bv̄nna: mihma tekchi vt
Chisv̄s a nana ik kamimicho hok bano im ahni; yohmi kia
na holitompa isht asha v̄hleha hv̄t nan ahni kak o v̄lhpesa
im ahni cha Balabas ak o peh i hotofi mvt, Chisv̄s v̄to illa
chi mak o miha.

11. Mihma Chisv̄s vt nahullo miko itikba ya hikia
tok; mihma nahullo miko vt yv̄mmak ash o im ponak-

lot, Chishno ak osh Chu okla hā i miko chia mak oh cho? achi tok. Mihma Chisvs vt, Ulhpesa hō ish mihvshke, im achi tok.

12. Atuk o nā holitompa isht asha pehlichi vhleha, mikmvt hochitoka vhleha aiena kvt nan isht mihachi ka, nanasi kia ilapvt afalaminchit ik miho ki tok.

13. Yohmi ma Pailat ash osh, Nana lāwa ka isht a chi atokoli ka chik haklo ho tuma? im achi tok.

14. Yohmi ma yvmmak ash osh anumpa achvfa kia ik im afalamincho ki tok; yohmi hatuk o nahullo miko ash osh nukhlakancha fehna tok.

15. Micha impa chito ashakma, kvna hō okla ahnikma, nahullo miko vt yukvt talakchi atuk a okla hā imi hotofi chatuk vt tok.

16. Atuk o yvmma fehna ma annohowa fehna chatuk yukvt talakchit Balabas hohchifo hosh okla hā im anta tok.

17, 18. Yohmi hatuk o Pailat ash osh yvmma okla isht i yukpo kak osh ishit okla hā im issa hatuk a, ithana hatuk osh, okla itvnahvt taiyaha ma, Kvta mak o hvchimi hotofi la he a hvsh aiahni cho? Balabas ak okmā, keyukmvt, Chisvs osh Kilaist hohchifo kak okmā, katimampo kak a chi cho? im achi tok.

19. Mihmvt nan-apesa aiasha ya ont binili ma, tekchi vt pit im anolit, Yvmmak atuk mak o himak nitak a si holhpokunvt nana isht ik svm ai achukmo kvt an laua hatuk oka, hatak ahli achukma yvmma nana chik kanihecho kashke, achi tok.

20. Yohmi kia nā holitompa isht asha pehlichi vhleha, micha hochitoka vhleha aiena hokvto Balabas ak o okla asilhha cha, Chisvs ak o vba chi ka, okla laua ya atohnochi tok.

21. Nahullo miko ash osh afalaminchi mvt, Tuklo ka katimampo hvchimi hotofi la hi a hvsh aiahni cho? im achi ma, Balabas ak o, okla achi tok.

22. Pailat ash osh, Yohmikmvt Chisvs osh Kilaist hohchifo kvno, nanta hak o katimihchi la hinla cho? im achi ma, Iti-taiyukhvna yak o ahonvhlvt illashke, momvt okla achi tok.

23. Mihma nahullo miko ash osh, Katiohmi hō? nan okpulo nanta mak o yvmohmi tuk oh cho? achi

tok. Yohmi kia i shahlehit tahpvlvt, Iti-taiyukhvna yak o ahonvhlvt illashke, okla achi tok.

24. Pailat ash osh ilapvt na kanihma he keyu, amba yahapa kak osh i shahlit toba pulla hi a akostininchimvt, oka kapvssa ya ishi cha okla itikba ya ibbak ai achefa mvt, Hatak ahli achukma ilvppa im issish a ishit si ahalaia keyu mak oke: hvchishno ak osh isht hvsh ashashke, im achi tok.

25. Yohmi ma okla momvt afalaminchi mvt, Im issish vt pishno, micha pim vlla aiena kak o onitonlashke, im achi tok.

26. Yohmi ma yvmmak ash osh Balabas ak o okla ha imi hotofi tok: micha Chisvs ash o fvmmit issa mvt, iti-taiyukhvna ahonvhla chi mak o im issa tok.

85. Loman tvshka chipota vhleha vt Chisvs a ishi cha kvti halupa yo noshkobo ha isht iachukolechi.

27. Yvmma foka ma nahullo miko in tvshka chipota vhleha hash osh Chisvs a ishtivt nana aiapesa yo isht ona mvt, tvshka chipota vhleha ha mominchit ont im itvnali tok.

28. Mihmvt nafoka ya i shoeli cha tvshka chipota pehlich i nafoka humma yo ishit fohkvchechi tok.

29. Mich a kvti iachuka yo okla tvnvt tahli mvt, noshkobo ha iachukolechi cha, anonti ibbak isht impakimma ya kvshak o pit fohki tok: mihmvt itikba ya okla i hvchukbihlepa cha, ishit yopulvt, Chu okla i miko ma! na chi yukpashke, achi tok.

30. Mihmvt yvmmak ash o okla on tuftua, micha kvshak ash ishi cha, noshkobo ha ishit boli aiena tok.

31. Mihmvt yvmmak ash o okla ishit yopulvt issa mvt, tvshka chipota i nafoka humma yash o i shufi cha, ilap i nafoka yash inli ho fohkvchechi mvt, iti-taiyukhvna ahonvhlich a chi hosh ilaue lit ishtia tok.

86. Tvshka chipota yvt Chisvs a ishit Kalkohla ona cha, im ilefoka yash na shoeli isht apesvt im ishi mvt, Chisvs ash iti-taiyukhvna ahonvhlichi.

32. Atuk osh okla ont kocha wiha fehna mvt, Sai-leni hatak Saimon hochifo ho okla pisa tok: mihmvt im iti-taiyukhvna ya yvmmak osh shola he a okla atohnochi tok.

33. Atuk osh yakni Kalkohla hohchifo yvmmt, Noshkobo foni aiasha, achi mak o ona ma,

34. Yvmmak ash o ishka chi ka wineka yosh basunlvsh okchi hvv ib vlhto ho ipeta tok: mihma yvm-mak ash o ishkot pisa mvt, ishka he keyu ki tok.

35. Mihma yvmmak ash o iti-taiyukhvna okla ahonvhlichi mvt, na shoeli o im ilefoka atuk a isht it i hopela tok; hopaii vt, anumpuli mvt, Um ilefoka yatuk puta ka okla iti hopela mvt, anonti vm ilefoka lumbo atuk a okla nan-isht a shoelishke, achi tok vt aighla chi mak vt tok.

36. Micha okla hash osh yvmmak o aka binohli cha yvmmak ash atoni tok.

37. Mihmvt noshkobo paknaka namihachi holisso hvv, ILUPPAK OSH CHISVS CHU OKLA I MIKO MAK OKE, achi ho takalichi tok.

38. Yohmi ma hatak hukopa tuklo hosh apihvt iti-taiyukhvna ahonvhla tok; achvfa kvv ibbak isht impakimma yo takali ma, anonti achvfvv vlvfvbekimma yo takali tok.

39. Mihma yvmma bilikasi ont ihiya kvv yvmmak ash o ik ahobalot pit i yuchunukli beka tok.

40. Mihmvt, Tempel a okpvn cha, anonti nitak tvchinakma ikbit tahli chia hvv, ish ile okchalinchashke, Chihowa a Ushi chia hokmvt, iti-taiyukhvna ya auet akowá, achi tok.

41. Na holitompa isht a sha pehlichi vhleha ak kia naholissochi vhleha, micha hochitoka vhleha ai itapeha kvv yvmmak ash o ishit yopulvt,

42. Inla yokvno okchalinchichi hatuk okak osh, ilap inli kvvto ile okchalinchichi he keyushke. Ilvppak osh Israel a i miko yatuk okmvt, himonasi ak o iti-taiyuk-

huna ya auet ik akowá, yohmik mak o iloh i yim-mashke.

43. Chihowa ya ai anukeketo atuk oka, yummak osh i hullo hatuk okmvt, himonasi a ant ik hlakofichí; Chihowa Ushi sia hoke, achi hatuk oka achi tok.

44. Hatak hukopa tuklo yumma apihvt iti-taiyuk-huna ahonvhlá tuk kak kia ik ahobalo kv̄t, yummak inli ho chohmichi tok.

45. Yohmi ma hvshi kanvlli v̄lhpisa ont ishit hanalik fehna ai vhlit ivt, hvshi kanvlli, v̄lhpisa ishit chakali ona ka, yakni moma ka ai okhlilit kv̄nia tok.

46. Yohmi ma hvshi kanvlli v̄lhpisa ont ishit chahali foka ma, Chisvs vt chitoli fehna hosh tahpvlvt, Eli, Eli, lama sabakhlani? achi tok; yummvt an Chihowa ma! an Chihowa ma! nanta katiohmi ho is sa kanchi cho? achi hoke.

47. Mihma yumma hiohmaya tuk vt kanimi kv̄t haklo mvt, Hatak ilvppvt Elias a pit i howvshke, achi tok.

48. Mihma mih mak inli ho achvfv̄t malelit ia mvt, na shatvmmi o ont ishi cha wineka alotali mvt, kv̄shak o takalichi cha, yummak ash o ishka chi ka pit ipeta tok.

49. Mihma inla ka yash osh, Ik asha, Elias vt okchalinchit aya hinlakmá, nanakmá, keho pesá, achi tok.

87. Chisvs vt chitoli fehvt tahpula mvt illit kv̄nia tok, illi ma na fehna kv̄t ai yvmohmi tok isht annoa.

50. Mihma Chisvs vt atukla ma chitoli fehna hosh tahpula mvt, fiopissa tok.

51. Yohmi ma nantvna tempel anyakaka takali vt paknaka ak o a hlilav̄t ai mvt, aka ont taha cha tuklo tok: mihma yakni vt winakahanchi ma, tv̄li hochito puta kv̄t bakahli tok.

52. Mihma hatak aholopi puta kv̄t tiwa ma, v̄banumpuli puta haknip mav̄vt nusi tuk vt lava kv̄t tani tok.

53. Atuk osh Chisvs vt illi tuk vt falamvt tani ma, aholopi pula ka akohcha wihvt ia mvt, tv̄maha holitopa ya onvt lava ka i haiaka tok.

54. Sintulion vt, micha apihvt mayvt Chisvs a apesvchi tuk aiena kash osh yakni winakvchi, mikmvt nana kvrt ai yakohmi puta na pisa mvt, okla nukshopa fehna mvt, Ilvppak okvt Chihowa ha Ushi ho mvhli tuk pullvshke, achi tok.

55. Yohmi ma ohoyo lava Chisvs a apehvt Kalili a asht mintit yvmma nan im atahli yatuk vt yvmma maya cha, auet mishema ho pit pisa tok.

56. Yvmma takla maya kvrt, Meli Maktalen, micha Meli, Chemis, mikmvt Choses aiena ishki, mikmvt Sebeta ushi vhleha ha ishki ak osh fiena tok.

88. Chosef Alimahlea vta yak osh, Chisvs vt iti-taiyukhvna takali tuk a ishit kvchi, micha hatak illi ai asha himona ilap immi ak inli ho fohkit bohli.

57. Ont opivt taiyaha ma hatak nan in lava Alimahlea vta Chosef hohchifo hosh, yvmmak kia Chisvs a nan im ai ithvna ak inli tuk osh vta tok.

58. Mich a mvt, Chisvs haknip a Pailat a ont im asilhha tok. Yohmi ma haknip atukma ima he a Pailat vt miha tok.

59. Mihma Chosef vt haknip atuk a ishi mvt, yvmmak ash o nantvna kashofa linen achukma ho a bonulli tok.

60. Mihmvt yvmmak ash o ilap i sepvka himona tvli chito yo a kulli hosh ikbi tuk osh ont fohki tok: mihmvt sepvka okhissa ash o tvli chito yo tonolichit pit isht akamali cha ia tok.

66. Mihma Meli Maktalen, micha Meli achvfa itatuklo kvrt sepvka i chapaka ya chiya tok.

89. Na holitempa isht asha pehlich i vhleha hak osh asihihla ma, Pailat vt tvshka chipota ya atohnochi na Chisvs aholopi a atoni.

62. Yohmi ma nana ai vlhtaha nitak atuk auet achakaya nitak o na holitempa isht asha pehlich i vhleha, micha Falisi vhleha aiena kvrt Pailat a ant im ai itvnaha cha,

63. Pi shahli ma! na haksichi yummvt okchaya momvt ahanta mvt, Nitak ont atuchinakma falamvt tani la hi oke; achi tok a il ithaiyanvshke.

64. Yohmi hoka ish apesa na sepvlka vt kvllot vlhkama na nitak atuchina ka onashke; yummak keyukma nan im ai ithvna vhleha hvt ninak a ai vlvvt hukopvt ishit kunia cha, Illi tuk vt falamvt tanishke, okla ha im acha hinla hoke: yohmikma ishtaiyopi ka ishit haksi kak osh ik ai vlhpeso kvrt vmmona tuk a i shahla hinla hoke, achi tok.

65. Mihma Pailat ash osh, Nan atoni vt hvchim ashvshke: oh ilhkoli cha, kanimihchit hvsh a kvllocha hinla kvrt hvsh yvmihchashke, im achi tok.

61. Mihma ilhkoli mvt, tvli ash o in chunli cha, nan atoni a ashachit, sepvlka ash a kvllochit kaiyan-chi tok.



CHAPTA XXVIII.

90. Nitak ont atuchina onnahinli fehna ohoyo tuklo kvrt Chisvs aholopi tuk a ona; ymma enchil vt ai afama; micha Chisvs vt illi tuk vt falamvt tani tuk a, im anoli; mihmvt nan im aiithvna vhleha ha ia cha, ont im anola chi ka i miha.

1. Yvmohmi tuk o nitak hullo vt ont taha tuh wek nitak vmmona chi hosh onnvt mihinti ma, Meli Mak-talen, micha Meli achvfa itatuklo kvrt sepvlka ya pisvt aya hosh itonachi tok.

2. Yohmi ma yakni vt winakvchi fehna tok: Chitokaka im enchil osh vba mintit vla cha, tvli okhissa itula tuk a kanompit tonolichi cha, paknaka ya on asha hvt tok,

3. Mihma haknip vt malvtha ak o chiyuhmi ma, im ilefoka yvt tohbi kvrt okti pushi ak o chiyuhmi tok.

4. Mihma nan atoni vhleha hatuk vt ymma i nukshopa kvrt wvnihinchi mvt, illi yo chiyuhmi tok.

5. Yohmi ma enchil *vt* anumpuli *mvt*, ohoyo hash *o*, Ititaiyukhvna ahonahlvt illi tuk Chisvs ak *o* hvsh hoyo ka hvchim ithanali hoka, ik hvchi nukshopo kashke.

6. Ilvppa ikshoshke; miha tuk okvt *falamvt* tani tuk oke. Mintit Chitokaka yvt ai itola tuk *a* ant ho pesá.

7. Micha tushpvt *ivt*, illi tuk *vt* *falamvt* tani cha, hvchi tikba Kalili *a* ia tuk ma, yvmmak *o* ont hvsh a pisa chi hoke: nan im ai ithvna *vhleha* *ha* ont hvsh im anolashke: inta! hvchim anoli li mak oke, im achi tok.

8. Yohmi ma nukshopa mikmvt *nayukpa* fehna aiena hosh sepvka ya *ashwvt* tushpvt itiachi tok; mihmvt nan im ai ithvna *vhleha* hatuk *a* anumpa isht im ona chi *kvt* tihlahaya tok.

9. Atuk *o* nan im ai ithvna *vhleha* *ha* im anolit ia hosh ayvt okla ma, Chisvs *vt* afama cha, Na hvchi yukpashke; achi tok. Mihma *ivt* yvmmak ash *o* iyi *a* ont halvlli cha, aiokpahanchit okla tok.

10. Yohmi ma Chisvs ash osh, Ik hvchi nukshopo kashke: Oh ia cha, itibapishili *vhleha* *ha* ont hvsh im anolikma, Kalili *a* okla ai onvt yvmma ont sa pesashke, im achi tok.

91. Kaniohmi hosh Chisvs aholopi ya atonit aiasha tuk *vt* *falamvt* tmaha chito ya ona cha, aholopi nana a kaniohmi tuk *a* na holitompa isht *asha* pehliche *vhleha* *ha* im anoli.

11. Yohmi na itiachi hosh ayvt okla *ma*, nan atoni *vhleha* hatuk kaniohmi *kvt* tmaha *ha* ona cha, nana *kvt* kaniohmi tuk *a* mominchit na holitompa isht *asha* pehliche *vhleha* *ha* im anoli tok.

12. Mihma yvmmak ash osh hochitoka *vhleha* ai itapihv *itvnaha* cha, it im anumpulit okla in taiyaha *mvt*, tvshka chipota *vhleha* hash *o* tvli holisso lava ka ima cha,

13. Nan im ai ithvna *vhleha* hv *ninak* *o* ai *vla* cha, nusi hosh e maya takla ma, ant hukopvt ishit *kvnia* tuk oke, hvsh achashke.

14. Yohmikma ilvppak atuk mvt nahullo miko haksobish a'afohka hokma, yvmmak oka e hopohluchi cha, e hvchi hlakofichashke, achi tok.

15. Yohmi ma tvli holisso ash o okla ishi mvt, nan im avuchi tok mak o okla ai yvmohmi tok : yvmohmi tok o anumpa ilvppvt himak nitak ak kia Chu okla itintakla ya ai annohoa hoke.

92. Chisvs vt nan im ai ithvna auah achvfa ka Kalili ak o ai i haiaka, micha vbanumpa ha oklushi puta ka isht im anumpohonlit itvnohowa he im apesa.

16. Yohmi ma nan ithvna auah achvfa kash osh Kalili a ilhkolit, nvni h chaha Chisvs vt ai im atokoli tok mak o ona tok.

17. Micha yvmmak ash o pisa mvt, okla ai okpachanchi tok : yohmi kia kanimi kvto anuktuklo tok.

18. Yohmi ma Chisvs vt vla cha, ant im anumpuli mvt, Uba yakni, micha yakni ilvppa aiena nan-isht im ai ahlika puta moma kvv vmmi toba hoke.

19. Yohmi hoka hvsh ilhkoli cha, oklushi moma ka nan ithvna ikbit, Iki, micha Ushi, mikmvt Shilombish Holitopa aiena ho isht a hochifochit hvsh baptismo-honchashke :

20. Nan okluha ka nana ho hvchim apesa li tuk a holitobla he mak o hvsh im abahanchashke : yohmikma yake ! vno vt hvchi awant aya li bilia ho, yakni vt ont ai vhla hi oke, achi tok oke. Amen.







AYER

Choctaw

13

